

Siunnersuummut oqaaseqaatit

Nalinginnaasunik oqaaseqaatit

1. Aallarniut

Takornariatitsisarnermut akuersissuteqartarneq pillugu inatsisip 2012¹ -imi pilersinneqarnerata tunuliaqutaraa piffissamut ungasinnerusumut isigisunik takornariatitsisarnernut atatillugu aningaasaliissuteqartarnermi atugassarititaasunik pitsanngorsaaniarneq. Aningaasaliisoqarneratigut ingerlatsinerit annertunerulissapput sumiiffinnilu ineriartortitsissallutik. Sumiiffinni kisermaassilluni, tassa neqerooruteqarsinnaasut allat neqerooruteqarsinnaanngippata, ingerlatsisinnaaneq aqutugalugu niuernikkut tunngaveqartumik ingerlatsisinnaaneq periarfissaalissaq. Akuersissutit tunngavigalugit sumiiffinni allani takornariatitsisarnikkut kiffartuussissutit assigisaannik neqerooruteqarsinnaaneq killilersorneqanngilaq.

Inatsisartut inatsisaat kingornagut 2015² -imi allanngortinneqarpoq. Allannguinerup siunertaraa takornariatitsisarnermik ingerlatsisarnermut atatillugu qinnuteqartitsisarnertit assigiissaarneqarnissaat pisariinnerulersinnissaallu. Assigiissaarinerup tamatuma ilagaa atuuffiusinnaasup annertunerulersinneqarnera, taamaalilluni sukisaarsaatigalugu eqalunniartartut inatsimmi ilanngunneqarmata. Suliassaqarfik taanna siusinnerusukkut immikkut Inatsisartut inatsisaatigut³ aalajangersarneqarsimagaluarpog. Taakkua saniatigut Inatsisartut inatsisaat 2015-imeersumi Naalakkersuisunik immikkoortumut pilersaarummi sumiiffinnik takornariatitsiviusartunik aalajangersaasarnermik, kiisalu ingerlatsinerit qanoq ittut akuersissummi ilaasarnissaannik pisinnaatitaapput.

2022-mi Nunanut Allanut, Inuussutissarsiornermut Niuernermullu Naalakkersuisoqarfiup sumiiffinnut aalajangersimasunut takornariatitsisarnermut akuersissuteqartarnermut Inatsisartut inatsisaannik allannguinnissamik siunnersuusiorneq aallartippaat. Allannguinermi akuersissuteqartarnermut suliaqarnermut atatillugu kommunit peqataatinneqarnerulernissaat siunertaavoq. Siunnersuut tamanut ammasumik tusarniaassutigalugu nassiunneqarpoq piffissami 31. maj 2023-imiit 28. juni 2023-imut. Tusarniaanermut atatillugu siunnersuummut

¹ Sumiiffinni nunami aalajangersimasuni takornariatitsisarnermut akuersissuteqartarnissaq pillugu Inatsisartut inatsisaat nr. 19, ulloq 3. December 2012-imeersoq.

² Sumiiffinni nunami aalajangersimasuni takornariatitsisarnermut akuersissuteqartarnissaq pillugu Inatsisartut inatsisaat nr. 19, 3. december 2012-imeersup allanngortinnissaa pillugu Inatsisartut inatsisaat (Inatsisip atuuffigisaa sukisaarsaatigalugu aalisarnermut akuersissutinut sumiiffikkaanullu pilersaarutinut piginnaatitsissummik ilaqartilergalugu annertusissaaq)

³ Sukisaarsaatigalugu aalisartunik aalisartitsisarnermut akuersissuteqartarneq pillugu Inatsisartut inatsisaat nr. 20, ulloq 22. November 2011-imeersoq.

oqaaseqaatinik tunngaviusunik arlaqartunik tigusaqartoqarpoq. Allannguutissatut siunnersuusiornermi suliap qanoq angitiginera tassani paasineqarpoq, taamaattumik Inatsisartut inatsisissaannik nutaamik suliaqartoqarnissaa aalajangiunneqarpoq. Taamaakkaluortoq Inatsisartut inatsisissaattut suliaqarnermi nutaami suliaasaqarfik pillugu inatsisit atuuttut aallaavigineqarput, allannguutillu “2. Siunnersuummi immikkoortut pingaarnerit”-ni nassuiarneqarput.

2. Siunnersuummi immikkoortut pingaarnerit

2.1 Takornariartitsinermi neqeroorutinut kisermaassineq

Siunnersuummi ilaatigut Naalakkersuisut sumiiffiit ilaanni takornarissanut neqeroorutigineqarsinnaasut pillugit kisermaassilluni ingerlatsisinnaanermut akuersissutinik tunniussinissamut aalajangersaasinnaalissapput. Tamanna pisinnaavoq Naalakkersuisut nalunaarummi malittarisassat malillugit sumiiffiit ilaanni kisermaassilluni ingerlatsisinnaanermut aalajangersaaneratigut, takornarissanut kiffartuussissutit pineqartut sumiiffimmi pineqartumi kisermaassilluni ingerlanneqarsinnaassapput.

Taamaattoqassappat sumiiffimmi takornarissanut ingerlatsisunut, soqutigisalinnullu allanut nalunaarut sumiiffimmi kisermaassilluni takornarissatut kiffartuussinissamik imalik tusarniaassutigineqassaaq, taamaaliortoqassaaq assersuutigalugu sumiiffimmi pilersaarutaareersumut arlaatigut oqaaseqaateqartoqarsinnaanissaa piniarlugu.

Sumiiffimmi immikkut toqqakkani takornarissanut neqeroorutit pillugit aalajangersaasoqarsimappat imaluunniit sumiiffimmi kisermaassilluni ingerlatsisoqartariaqarpat, taava Naalakkersuisut neqeroortitsisoqareernerata tusarniaasoqareerneratalu kingorna nalilersuineranut ataatsimiititaliamik pilersitsisinnaapput takuuk siunnersuummi § 9-mi suleriesissatut allassimasut, taanna malillugu takornariaqarnermut neqeroorut kisermaassilluni ingerlatsisinnaanermik pisinnaatitsinertalimmik tunniunneqarsinnaavoq. Taamaasilluni takornarissanut neqeroorut kiserlaassilluni ingerlatsinertalimmik akuersissutigineqassaaq.

Kisermaassilluni ingerlatsisinnmaatitaaneq pillugu Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfimmit arsaarinnissuteqartarneq eqqarsaatigineqassanersoq eqqarsaatigineqarsimavoq. Tunngaviusumik Inatsimmi § 73-imi imm. 1-imi allassimasut malillugit kinaluunniit pigisalik pigisaminik tunniussisussaatitaasinnaangilaq inooqatigiit ataatsimut piunnaasaqanngippata. Tamannalu taamaallaat inatsisitigut pisinnaavoq tamakkiisumik taarsiissuteqarnikkut.

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfimmit paasinnittaasiat malillugu aaqiissutissatut

siunnersuutaasumi tunngaviusumik inatsimmi § 73-imi illersorneqartoq inummut aammalu inummut inatsisinut attuumassuteqartumut sumiiffimmi takornarissanut neqerooruteqarsinnaanermut inatsisitigut pisinnaatitaaffilik, kisermaassilluni ingerlatsisinnaaneq tunngavigalugu piumasaqateqarfigineqalersoq sunnerneqarsinnaavoq. Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalackersuisoqarfimmillu paasinittaaserineqartoq malillugu iliuserineqartussat Tunngaviusumik inatsimmi § 73-imi allassimasut malillugit arsaarinnissutaasartunut attuumassuteqarnaviannigillat.

Taamaattumik siunnersuummi inatsisit atoreersut atuinnarlugit ingerlatsisoqarnissaa pingaartinneqarsimavoq, aammalu siunnersuummi sumiiffiit immikkuullarissut aalajangersaaffiginiarneqarput, soorlu akiliilluni piniartitsiffiusartut aammalu sumiiffiit piffissami killiligaasumi, annertunerusumik ukiuni marlunni, sivitsorneqarsinnaasumilli akuersissummik tunniussiffiusartut. Taakkua saniatigut sumiiffiit nutaat akuersissummik tunniussiffiusinnaasut tusarniaassutigineqassapput, taakkunungalu soqutigisallit oqaaseqaateqarsinnaapput, tassunga ilanngullugu sumiiffimmi pineqartumi takornarissanut neqerooruteqartareersut. Tamanna isumaqarpoq sumiiffimmi akuersissummik tunniussisoqarniartillugu takornariaqarnermut neqeroorutaasut atuuttut sumiiffimmilu neqeroorutaasut isiginiarneqassasut. Taassumalu saniatigut siunnersuummi pingaartinneqarpoq sumiiffiit assersuutigalugu akiliilluni piniartitsiffiusartut kisermaassilluni ingerlatsivissatut akuerineqassanngitsut, siunnersuummittaaq aamma sumiiffimmi allami akiliilluni piniartitsisarneq atulersinniarneqanngilaq. Siunnersuummittaaq § 8-mi piumasaqaatini allassimasunit immikkut akuersissuteqarsinnaaneq allassimavoq, taannalu sumiiffimmi killilikkami takornarissanut kiffartuussisinnaanermut attuumassuteqarpoq, taamaaliortoqarsinnaavorlu Tunngaviusumik inatsimmi § 73-imi allassimasut malillugit arsaarinninnissamut tunngatillugu piumasaateqartoqarsinnaatillugu.

Taamaakkaluartoq siumut oqaatigineqareersinnaanngisaannarpoq pisuni immikkuullarissuni takornarissanik sullissisut ataasiakkaat pineqartillugit annertuunik sunnerneqarnikkut arsaarinninnermik oqaaseqartoqarsinnaanissaa. Tassunga peqqutaavoq arsaarinnissuteqarnermut tunngatillugu ataasiakkaat nalilersorneqartariaqarmata, taamaaliortoqassappallu ilaatigut suliffeqarfinnut ataasiakkaanut paasissutissat misissorneqartariaqarput. Taamaattumik inatsimmi arsaarinnissuteqartoqarsinnaanera siunertaanngikkaluartoq immikkut akuersissuteqarsinnaaneq ilanngunneqarsimavoq. Iliuseqarneq piumasaqaatit aallaavigalugit arsaarinnissutaasutut naleqassappat, pineqartoq ilaannakortumik tamakkiisumilluunniit taarsiiffigineqarnissaminut piumasaqarsinnaavoq. Pisoq pillugu ingerlatsisut eqqartuussivimmud suliassanngortitsisinnaapput.

Siunnersuut aallaavigalugu takornarissanut neqerooruteqarsinnaanermut akuersissutinik neqeroortitsisoqarnerani qinnuteqartoq akuersissummik tunineqarsinnaassaguni siunnersuummi §§ 12-imiit 15-imut piomasaaqaatit allassimasut naammassisinnaasariaqarpai aammalu § 16-imi allassimasut aamma naammassisinnaasariaqarlugit. Piomasaaqaatit naammassineqarsinnaanngippata qinnuteqaat itigartitsissutigineqassaaq.

Neqeroortitsisoqarnerata kingorna qinnuteqaatinik nalilersuineri Naalakkersuisut Inatsisartut inatsisaanni matumani § 10-mi piomasaaqaataasut aammalu minnerpaamik § 11-mi piomasaaqaataasut tunngavigalugit aalajangiissapput.

Neqeroortitsisoqarsimaguni, tassanilu takornarialerisunut akuersissummik piomasaaqaatinik naammassinnittunik akuersissummik tunniussisoqarsinnaasimanani, taava nutaamik neqeroortitsisoqanngikkaluarluni, sumiiffimmi takornarissanut neqeroortitsisinnaanermut akuersissummik tunniussisoqarsinnaavoq. Taamaattoqassagaluarpalli, qinnuteqaat qinnuteqarnissamut killiliussaq annerpaamik qaammatit 18-it qaangiutsinnagit tunniunneqarsimasariaqarpoq.

Tamatuma kingorna takornariartitsisinnaanermut akuersissut aallaavigalugu pisinnaatitsissut tunniunneqartoq assigiinngitsunik pisussaaffilersorneqassaaq, takuuk siunnersuummi § 17-18-imi allassimasut, soorlu aamma takornarissanut neqerooruteqarsinnaanermut akuersissummik tunineqarsimasut ukiumut akitsuummumut akiligassaat § 20-mit 23-mut allassimasut akilerneqartassasut.

Siunnersuut malillugu Naalakkersuisut takornarissanut neqerooruteqarsinnaasut akuersissummik pisinnaatitsissummillu pillit nakkutigiumaarpaat, soorlu aamma Naalakkersuisut inatsisartut inatsisaat una atorlugu pisinnaatitsissummik pillit allallu unioqutitsisoqartillugu aaqqiissuteqaqquneqarsinnaasut imaluunniit taamaatitsisinnaasut.

2.2 Nalilersuineri ataatsimiititaliamik pilersitsineq

Takornariaqarnermut neqeroorsinnaanermut akuersissummik tunniussisoqassatillugu kommunimi akuersissuteqarfiusussami siunnersuut tunngavigalugu Naalakkersuisut nalilersuineri ataatsimiititaliamik pilersitsisinnaapput. Nalilersuineri ataatsimiititaliamik pilersitsisarnissap siunertaa tassaavoq takornarissanut akuersissutinik suliaqartoqartillugu kommunimit sumiiffimmiillu peqataatitsinerunissaaq.

Naalakkersuisut nalilersuineri ataatsimiititaliami ilaasortanik toqqaasoqarsinnaanerannut, siulittaasumik toqqaasinnaanissaannut kiisalu nalilersuineri ataatsimiititaliami taasisariaasissaaq pillugu malittarisassiortoqarnissaa siunnersuutaavoq.

2.3 Suliassanut oqartussaannermik kommuninut suliassanngortitsisinnaaneq

Siunnersuut aallaavigalugu takornarissanut neqerooruteqarsinnaanermut akuersissutinik tunniussisoqarnissaanut suliaqartoqartillugu Naalakkersuisut kommunimut suliassanik ingerlatsitseqqiisinnaanerannik allassimasoqarpoq. Siunnersuummi allassimavoq nakkutilliineq pisorta qarfinnut suliffeqarfinnuunniit allanut Namminersorlutik Oqartussat kommunillu ataanniittunut suliassanngortinneqarsinnaasoq.

2.3 Toqqaanermi piumasaqaatit aamma qinnuteqartunut piumasaqaatit

Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat atuuttumi piumasaqatinut tunngatillugu oqaatsitigut allannguinnissaq siunnersuutaavoq. Siullertut qinnuteqartup suliarmut piginnaanerisassaanut aamma aningaasatigut tunuliaqutarisaanut tunngatillugu erseqqissaasoqarpoq. Tamatuma saniatigut siunnersuummi akuersissummik tunineqarnermi suliniutip pineqartup Kalaallit Nunaanneersunut suliffissaqartitsinera aammalu kalaallinik nioqquteqartartunik kiffartuussisartunillu atuinissaata nalilersorneqartussaanaera ersarissarneqarpoq.

Qinnuteqartumik nalilersuinissamuttooq qinnuteqartup akuersissuteqarfigilersinnaasamini sumiiffimmi tamakkiisumik ilaannakortumilluunniit ingerlatsinera imaluunniit pilersaarusiaa aalajangersimasut qanoq ussassaartuginiarnerai, neqeroortuginiarnerai, tunniunniarnerai ilanngunneqassapput. Taamaaliormi neqerooruteqartitsinnginnermi qinnuteqartut sumiiffimmi ingerlatsereersut, neqeroortitsisoqarnerani qinnuteqarusuttut, iluaqutissaqassapput.

Tamatuma saniatigut piumasaqaatini § 10-mi imm. 1-imi nr. 5 aallaavigalugu piujartitsinermut attuumassutilimmik aalajangersaapput. Piujuaannartitsineq ima paasineqassaaq: “pinngortitamik, avatangiisunik, silaannarmik, sulinermik inuussutissarsiortut pisinnaatitaaffiinik inuiaqatigiinnilu isiginiagassanik soqutigisanik nalinginnaasunik mianerinninneq illersuinerlu.”

Kapitalimittaaq allassimavoq Naalakkersuisut neqeroortitsinermut atatillugu piumasaqaatit minnerpaaffissaannik aalajangersaasoqarsinnaasoq, taakkualu qinnuteqartup naammassisinnaagunigit aatsaat akuersissummik tunineqarnissamut periarfissaqassalluni.

Akuersissuteqarnermut atatillugu Naalakkersuisut pisinnaatitsissummik piginnittumut malittarisassiorsinnaapput, taakkualu aallaavigalugit kalaallinik sulisoqarnissaq, aammalu kalaallinit nioqqutissanik pilersuisoqarnissaq kiffartuussisoqarnissarlu piumasarineqarsinnaavoq.

Takornarissanut neqerooruteqarsinnaanermut akuerissummik tunineqarnissamut piumasaqaataavoq inuk imaluunniit inatsisitigut inuk akuersissummik tunineqartussaq

Naalakkersuisunut 100.000 kr.-inik qaffasinnerusumik akiitsoqannginnissaa. Piumasaqaalli naammassineqarsimasutut isigineqassaaq akiliinissamat isumaqatigiissusiortoqarsimappat, isumaqatigiissutaasullu eqquutsinneqarpata.

Takornarissanut neqeroorsinnaatitaanermut inuit akuersissummik tunniussinissamat pineqartup Kalaallit Nunaanni inuit allartorsimaffianni nalunaarsorneqarsimanissaannut piumasaqaatip sakkortusinissaa siunnersuutigineqarpoq, taamaalilluni akuersissummik taamaallaat tunineqarsinnaasut tassaassallutik inuit Kalaallit Nunaanni inuit allartorsimaffianni ukiuni 5-ni nalunaarsorneqarsimasut. Taamatut aalajangersaanerup kingunerisaanik aamma aningaasaliissutissanut piumasaqaammik siunnersuummi § 13, imm. 1, nr. 3-mi allassimasut malillugit inissiisoqarpoq, tassanilu allassimavoq ingerlatseqatigiiffiup nammineq aningaasaataasa affai sinnerlugit toqqaannartumik toqqaannangitsumilluunniit inuit piginnittuusut § 12-imi allassimasunik naammassinnissasut kiisalu taasisinnaasut affai sinnerlugit toqqaannartumik toqqaannangitsumilluunniit § 12-imi allassimasunik aamma naammassinnissinnaasasut. Tamannalu aamma § 13, imm. 1, nr. 4-mi allassimasunut aamma atuuppoq.

2.5 Takornarissanut neqerooruteqarsinnaanermut akuersissummik tunineqarsinnaanermut piumasaqaatit

Takornarissanut neqerooruteqarsinnaanermut akuersissummik tunineqassagaanni piumasaqaatit assigiinngitsut naammassineqarsinnaanissaat siunnersuutigineqarpoq.

Siunnersuummi § 10-mi piumasaqaatissatut allanneqarsimasut aammalu § 11-mi minnerpaamik piumasaqaatit naammassineqartariaqartut naammassisimagaanni taamaallaat akuersissummik tunineqarsinnaanernut eqqarsaatigineqarsinnaavoq.

Piumasaqaatit pineqartut pisinnaatitsissummik tunineqartup sillimaniarnermut pilersaarussiaanut aammalu qularnaveeqqutip annertussusaanut allatigulluunniit sillimaniarnermut attuumassuteqarput. Ilaatigut siunnersuummi § 16-imi allassimasut malillugit Naalakkersuisut aalajangersaasimatillutik sulisunik pilersuisunilluunniit kalaallinik atuinissaq piumasaqaataasinnaavoq.

Piumasaqaatit naammassineqarsimanngippata, takornarissanut neqerooruteqarsinnaanermut akuersissuteqarnissamat qinnuteqaat itigartitsissutigineqassaaq. Pisunili immikkuullarissuni Naalakkersuisut siunnersuummi § 8-mi allassimasut aallaavigalugit immikkut akuersissuteqarsinnaapput.

Piumasaqaatit piffissami akuersissuteqarfiusumi tamani naammassineqarsinnaassapput.

2.6 Immikkut akuerineqarsinnaaneq

Inatsisartut inatsisaanni §§ 12-imit 15-imut aammalu §§ 17-imit 18-imut kiisalu Inatsisartut inatsisaanni matumani piumasaqaataasutut allassimasut pillugit Naalakkersuisut immikkut akuersissuteqarsinnaanerannut siunnersuusiortoqarsimavoq.

Immikkut akuersissuteqarsinnaaneq ilanngunneqarsimavoq piginnaatitsissummik pigisallit allaffissornikkut aningaasatigullu eqqarsaatigineqarnissaat pillugu.

Assersuutigalugu Naalakkersuisut immikkut akuersissuteqarniarneranni isiginiarneqarsinnaasut tassaapput, takornariaqarnermik suliaqartoq takornarissanik sullinerminut atillugu sulisukinnera, ilinniarnerninut napparsimanerminulluunniit atatillugu nunani allamiittariaqarnera, imaluunniit nalinginnaasumik akuersissuteqartoqassappat suliaqartoq allaffissornikkut aningaasatigullu annertuumik nammakkerneqarsinnaanera. Assersuutit taaneqartut kisiisa aallaaviussanngillat.

Takornarissanut neqerooruteqarsinnaanermut akuersissut aallaavigalugu piginnaatitsissummik pilik piffissap ingerlanerani, pisinnaatitsissummik pigisallip atugarisaatigut allanngortoqartillugu, immikkut akuersissummik qinnuteqarsinnaavoq

2.7 Akuersissummik tunineqartarnek piffissap akuersissuteqarfiusimasup naareernerani
Piffissaq akuersissuteqarfiusoq naagaangat, akuersissummik nutaamik neqeroortitsisoqartussaanaera erseqqissarneqarsimavoq. Pisinnaatitsissummik piginnittuusimasoq akuersissummik tunineqaqqissinnaavoq, neqeroortitsinermi piumasaqaataasut aallaavigalugit nalilersuineq malillugu.

2.8 Piffissaq akuersissuteqarfiusartog

Siusinnerusukkut akuersissummik tunniussiniarnermi ukiut tallimat angullugit sivissusilimmik tunniussisarnek atorpeqartarsimavoq. Siunnersuummilu matumani ukiunut 10-nut sivitsorneqarpoq. Tamatumalu saniatigut akuersissut ukiunik 20-nik sivitsorneqarsinnaanera ilanngunneqarsimavoq, taamaaliortoqarsinnaavorlu suliassanut pilersaarutaasut kiisalu aningaasatigut sinneqartoornissamut periarfissaasut aallaavigalugit. Massakkumut ukiut akuersissuteqarfiusinnaasut 30-usut attatiinanrneqarnissaa siunnersuutigineqarpoq. Taamaalilluni takornarissanut neqeroorsinnaanermut akuersissutit ukiut 30-t sinnerlugit atuutsinneqarsinnaassanngillat. Tamatuma kingorna akuersissutit neqeroorutigineqaqqaartariaqassapput.

2.9 Takornarissanut neqerooruteqarsinnaanermut akuersissummik tunniussisoqarnerani pisussaafit

Siunnersuummi takornarissanut neqerooruteqarsinnaanermut akuersissut aallaavigalugu pisinnaatitsissummik tunineqartoq assigiinngitsunik pisussaaffinnik naammassisariaqagaanik peqarpoq.

Pisinnaatitsissummik piginnittoq ilaatigut suliaminik aallartitsigani akuersissut aallaavigalugu takornarissanut neqeroorutigisassani pillugit ingerlatsinissamut pilersaarusiortoqartariaqarpoq, taannalu Naalakkersuisunit akuerineqassaaq.

Aalajangersakkami Naalakkersuisut ingerlatsinissanut pilersaarusiamik akuersissuteqartussaananeratt annertusineqarpoq, massakkullu naapertuussusaa aallaavigalugu sumiiffinni immikkut toqqakkani takornariartunut kiffartuussinernik ingerlatsinissamut akuersissuteqartarneq pillugu Inatsisartut inatsisissaat malillugu suut imarineqassanersut allanneqartussanngorluni.

Nalunaaruteqarnissamut aalajangersakkat aallaavigalugit sumiiffinni immikkut toqqakkani takornariartunut kiffartuussinernik ingerlatsinissamut akuersissuteqartarneq pillugu Inatsisartut inatsisissaanni atuuttumi ersarissarneqarpoq, nalunaarusiorneq ukiut tamaasa pisassasoq. Taakkua saniatigut nalunaarusiornermut tunngatillugu Naalakkersuisut aalajangersaasinnaalerput, nalunaarusiornermi paasissutissat suut nalunaarutigineqassanersut qanorlu akulikitsigisumik nalunaarusiortoqartassanersaq.

Tamatuma saniatigut nalunaarusiani paasissutissat tunniunneqartut Naalakkersuisut oqartussaqaarfinnut allanut Namminersorlutillu Oqartussat ingerlatsiviutaannut avitseqaqartarsinnaanerannik aalajangersaasoqarsimavoq.

Ilanngullugulu akuersissutit pillugit naatsorsuusiornernut tunngatillugu Naalakkersuisut paasissutissanik saqqummiisinnaanerannut aalajangersaasoqarsimavoq.

2.10 Nakkutilliineq

Nakkutilliinermut tunngatillugu umiiffinni immikkut toqqakkani takornariartunut kiffartuussinernik ingerlatsinissamut akuersissuteqartarneq pillugu Inatsisartut inatsisissaanni atuuttumi allannguisoqarsimavoq. Nakkutilliinermut atatillugu nakkutilliisutut oqartussat illuutinut il.il. isersinnaaneratt eqqartussivitsigut akuerisaanngitsumik peerneqarpoq. Taakkualu saniatigut nakkutilliinermut atatillugu Naalakkersuisut aalajangersaasinnaalerput, taakkualu pisortaqarfiit Namminersorlutillu Oqartussat Kommunillu suliffeqarfiutaannut attuumassuteqartortaqarput.

2.10 Akuersissummik utertitsineq

Inatsisartut inatsisaaat malillugu peqqussuteqarneq aallaavigalugu Naalakkersuisut inatsisartut inatsisaaat una malillugu akuersissutinik tunniussaminnik utertitsisinnaaneratt erseqqissarneqarsimavoq.

Ilanngulluguttaaq akuersissummik utertitsisinnaanermut ersarinnerusunik malittarisassiorsinnaanermut pisinnaatitsisoqarpoq.

2.12 Akitsuutunik inissiineq

Siunnersuummi pisinnaatitsissummik piginnittoq akuersissuteqarnermut atatillugu akitsuutunik akiliisussaananeranut tunngasunik ersarissaasoqarpoq. Taakkualu saniatigut akitsuutit annertussusaat pisariillisarneqarsimalluni. Siornatigut sumiiffiit akuersissutillu sivisussusaat aallaavigalugit annertussuseq allanngorartinneqarsimavoq. Taakkualu saniatigut akuersissutit suussusaat aallaavigalugit annertussuseq aamma allanngorarsimalluni. Allaffissornikkut suliat annikillisarnerlugit assigiissaariniartoqarsimavoq. Taakkua saniatigut akiliilluni aalisartitsisarnermut akuersissutinillu allanut assigiinngissutsit atuutsiinnerneqarput. Assigiinngissutsit taakkua inatsimmi atuuttumi aamma atuupput.

3. Aningaasaqarnikkut aamma allaffissornikkut pisortanut sunniutissai

Siunnersuut tunngaviummik aningaasaqarnikkut aamma allaffissornikkut pisortanut sunniuteqarnissaa naatsorsuutigineqanngilaq.

§ 9-mi imm. 2-mi allassimasut malillugit sumiiffinni akuersissuteqarfiusartuni neqeroortitsinikkut siusinnerusukkat akuersissuteqarfiusimanngitsunut tunngatillugu allannguinerit allaffissornikkut sipaaruteqarfiusinnaapput. Sumiiffinnut taakkununga oqimaatsunik allaffissornikkut neqeroortitsisoqannginnissaa sipaarutaasassaaq.

Akitsuutunik inissiinissamut allannguutit Siunnersuummut aningaasaqarnikkut sunniuteqarnissaa naatsorsuutigineqanngilaq. Uanili piffissat akuerissuteqarfiusut assigiinngillat, Siornatigut sumiiffik sivisunerusumik ingerlatsiviusimagaangat akitsuut qaffasinnerusarsimavoq. Allallu akuersissummik sivikinnerusumik peqarsimasut annikinnerusumik akitsuuteqartarsimallutik. Akitsuutit annertussusaa siornatigut akitsuutinut akiliutaasartumut sanilliullugu siunnersuummi akunnattumut inissinneqarsimavoq. Maannakkumut akiliilluni piniartitsisinaanermut 11-nik akuersissuteqartoqarpoq, nannunik takornariartitsinissamut akuersissut ataaseq tunniunneqarsimavoq kiisalu heliskiingimullu akuersissut ataaseq tunniunneqarsimalluni. Taamaattumik ingerlatsisut amerlanngillat, taamaattumik Nunatta karsiata isertitai siornatigormut sanilliullugu taamaaginnarnissaat naatsorsuutigineqarpoq.

Akitsuutit allaffissornikkut pisariinnerulersinneratigut pitsaasumik tamanna kinguneqassanganinneqarpoq. Tamannalu tunngavigalugu suliap suliarineqarnissai sivikinnerussanganinneqarlutik.

4. Aningaasaqarnikkut aamma allaffissornikkut inuussutissarsiortunut sunniutissai

Akuersissutit ukiunut 20-nut nalunaarutigineqarsinnaaneri, sulilu aamma ukiunik 20-nik sivitsuisoqarsinnaanera, taamaattoq suli annerpaamik ukiunut 30-nut

tunniussisoqarsinnaanera, inuussutissarsiortunut pitsaanerusunik suliniutitut aningaasaliisoqarnissaanut periarfissiissasoq naatsorsuutigineqarpoq.

Akitsuutitut akiliutit aaqqiffigineqarneri, akuersissutit ingerlanneranut annertunerusumik sunniuteqarnissaat naatsorsuutigineqanngilaq, aamma aningaasat annertussusaasa annikinneri eqqarsaatigalugit. Akitsuutitut akiliutaasartut pisariinnerulersinneqarneri inuussutissarsiortunut pitsaasumik sunniuteqassasorineqarpoq, tassami sullinneqarneq sivikinnerulissagami.

5. Avatangiisinit, pinngortitamut aamma innuttaasut peqqissusiannut sunniutissai

Siunnersuut avatangiisunut, pinngortitamut aamma innuttaasut peqqissusiannut sunniuteqarnissaa naatsorsuutigineqanngilaq.

6. Innuttaasunut sunniutissai

Siunnersuut innuttaasunut sunniuteqarnissaa naatsorsuutigineqanngilaq. Sumiiffimmi pineqartumi akuersissuteqarnermut atatillugu piumasaqaatersuuteqaraluartoq innuttaasut malittarisassat nalinginnaasut malillugit sumiiffimmi piniarsinnaapput, aalisarsinnaapput pinngortitamiissinnaallutillu assigisaannillu. Kisermaassisussaatitaaneq taamaallaat atuutissaaq takornarissanut neqeroorteqarnermi, qulaanilu ingerlatsinerit taakkartorneqartut takornarissanut neqeroortitsinerimut attuumassuteqanngillat, inuk pineqartoq sammisassamik ingerlatsinissamut akiliisimasoq eqqaassanngikkaani.

7. Allatigut pingaaruteqartunik sunniutissai

Siunnersuut allatigut pingaaruteqartunik sunniuteqassanngilaq.

8. Tusarniaaneq pisortanik aamma kattuffinnik il.il.

Siunnersuut piffissami 29. aprili 2024 -miit 28. Maaji 2024 tusarniaassutigineqarpoq, tamanut saqqummiunneqarluni Namminersorlutik Oqartussat tusarniaasarnermut quppersagaanni, ukununngalu tusarniaavigisartakkanut nassiunneqarluni:

Naalakkersuisut Siulittaasuata Naalakkersuisoqarfia

Ineqarnermut Attaveqaasersuutinullu Naalakkersuisoqarfik

Aningaasaqarnermut Akileraartarnermullu Naalakkersuisoqarfik

Aalisarnermut Piniarnermullu Naalakkersuisoqarfik

Isumaginninnermut, Ilaqtariinnermut, Suliffeqarnermut Nunamullu Namminermut

Naalakkersuisoqarfik

Ilinniartitaanermut, Kultureqarnermut, Timersornermut Ilageeqarnermullu

Naalakkersuisoqarfik

Namminersornermut Nunanullu Allallanut Naalakkersuisoqarfik

Nunalerinnermut, Imminut Pilersornermut, Nukissiuuteqarnermut Avatangiisinullu
Naalakkersuisoqarfik
Meeqqanut Inuusuttunullu Naalakkersuisoqarfik
Peqqissutsimut Naalakkersuisoqarfik
Avannaata Kommunia
Qeqqata Kommunia
Qeqertalik Kommunia
Kommuneqarfik Sermersooq
Kommune Kujalleq
Sulisitsisut / Grønlands Erhverv
Sulinermik Inuusutissarsiuteqartut Kattuffiat (SIK)
Akademikernes Sammenslutning i Grønland (ASG)
Lærernes Fagforening i Grønland (IMAK)
Nunatsinni Perorsaasut Kattuffiat (NPK)
Peqqinnissaq Pillugu Kattuffiat (PPK)
Kalaallit Nunaanni Aalisartut Piniartullu Kattuffiat (KNAPK)
Avannaata Erhverv
Qeqertalik Business Council
Arctic Circle Business
Sermersooq Business
Innovation South Greenland
Kommunit Pilersaaruserinnermut Oqartussaasui
Explore North Greenland
Destination Arctic Circle
Sermersooq Business
Innovation South Greenland
Destination Diskobay
Eastgreenland.com
Visit Greenland
Nalik Ventures
Air Greenland
Nuna advokater
Arctic Law
Eqqartuussissuserisut / Advokatfirmaet Malling & Hansen Damm
Eqqartuussissuserisoq / Advokatfirmaet Meinel
Eqqartuussissuserisoq / Advokat Gedion Jeremiassen
Inuit Law
Eqqartuussissuserisoq / Advokat Naja Joelsen
Eqqartuussissuserisoq / Advokat Aviâja Helms
Eqqartuussissuserisoq / Advokat Marie Louise Frederiksen

Kukkunersiuisut / Grønlands Revision
Kukkunersiuisut - Deloitte
EY
BDO
Air Greenland
Grønlandsbanken
Banknordik

Taakkua saniatigut tusarniaassutigineqartut takornarialerisunut akuersissutinik pigisaqartunut nassiunneqarsimapput.

Tusarniaanermi akissuteqaatit tiguneqartut aamma Naalackersuisoqarfiup taakkununga isummersuutai tusarniaanermut atatillugu allakkiamiipput ilanngussami 1-imi.

Siunnersuummi aalajangersakkanut ataasiakkaanut oqaaseqaatit*§ 1 -imut*

Imm. 1

Aalajangersakkami allassimavoq siunnersuut takornarissanut neqeroortitsinissamut akuersissutinut attuumassuteqartoq. Taannalu aamma pisinnaatitsissutinik piginnittunut takornarissanullu neqeroorutaasartunut una attuumassutilinnut atuutissaaq. Siunnersuummi taaguutit siunnersuutip § 2-ani nassuiarneqarsimapput.

Imm. 2

Aalajangersakkami allanneqarsimavoq siunnersuut illulianut inissiaasunut, illulianut allanut, sanaartukkanut, aqqissuussanut, aqqusinernut aamma attaveqaasersuutinut assigisaannullu atuutsinneqartoq. Takornarissanut neqeroortitsineq pillugu inatsisartut inatsisaat una atorlugu neqerooruteqarnermi, tuniniaanermi sullissinermiluunniit illuutit, aqqusernit, sanaartukkat allat assigisaallu nunaannarmiittut imaluunniit imartaniittut imaluunniit aningaasarsiornikkut Kalaallit Nunaata killeqarfiata iluaniittut aalajangersakkamut matumunnga ilaatinneqarput.

Imm. 3

Inatsisartut inatsisissaanni siunnersuutigineqarpoq, takornarissanik sullissisut sumiiffinni Takornariartitsinermut, sumiiffinni nunami aalajangersimasuni zone-nut agguasaarneq il.il. pillugu inatsisissatut siunnersuutaasoq malillugu akuersissutilinnut atuutsinneqassanngitsoq.

Soorluttaaq siunnersuutigineqartoq inatsisartut inatsisissaat una Takornariartitsinermut, sumiiffinni nunami aalajangersimasuni zone-nut agguasaarneq il.il. pillugit inatsisartut inatsisissaanni atuuffii sunnerneqassanngitsut aammalu sumiiffiit ilaat inatsit malillugu akuersissuteqarfiusut tikinneqarnissaat killilersorneqarsimalluni.

§ 2 -mut

Imm. 1 -imut

Siunnersuut naapertorlugu takornariartutut isigineqartarpoq inuk angalasoq inuup pineqartup nalinginnaasumik najortakkami ineqarfigisamiluunniit avataanut, aammalu angalaneq tamarniusoq taassumaluunniit ilaa nuannaarniutigalugu, qasuersaarluni imaluunniit sulinnigiffeqarluni ingerlattaraa, tamatumunngalu atatillugu kiffartuussinernik pisiortortarluni. Takornariartoq kiffartuunneqarnerminut tamatumunnga akiliuteqartarpoq. Apeqqutaatillugu kiffartuunneqarnerup qanoq ittuunera takornariap nioqqutit assigiinngitsut pisiarisinnaasarpai imaluunniit atugassarilertarlugit nammineq, assersuutigalugu angalaarsinnaaneq imaluunniit

sisorarsinnaaneq sumiiffinni immikkut ittuni, imaluunniit takornariatoq assiginngitsunik ingerlatsisinnaalluni piginnaatitsissummik pigisaqartoq peqatigalugu, imaluunniit taassuma sinniisua, ingerlatsinernik neqeroortoq, assersuutigalugu helikopterimik angalaarnerit.

Siunnersuummi allassimavoq angalaneq tamakkerlugu ilaannaaluunniit nuannaarniutigalugu, qasuersaarluni imaluunniit sulinngiffeqarluni ingerlatissagaa. Tamanna isumaqarpoq inuk pineqartoq Kalaallit Nunaannut suliartorluni angalasoq, ullulli ilaanni nuannaarniutigalugu, qasuersaarluni imaluunniit sulinngiffeqarluni angalasinnaasoq. Pineqartoq inatsisartut inatsisaat una malillugu angalanermini ullut suliffigisaanni takornarissatut isigineqassanngilaq. Taamaakkaluartorli ullut nuannaarniutigalugu, qasuersaarluni imaluunniit sulinngiffeqarluni ingerlassinnaasaanni takornarissatut isigineqarsinnaassaaq, soorlu Kalaallit Nunaata pinngortitaanik uumasuinilluunniit nammineq nuannaarniutigaluguluunniit misigisaqarniaruni. Taamaattoqassappallu angalanerminut atatillugu pineqartoq kiffartuussissutinik pisisimassaaq.

Aalajangersakkami matumani siunnersuutaasumi taaguut takornariatoq aalajangersagaavoq immikkut ittunik neqerooruteqarnertut, neqeroorummi namminerimi aamma neqeroorutip ingerlanneqarnerani, ilaannikkut sumiiffinni immikkut ittuni, ilutigisaanillu qularnaarneqartarluni sumiiffimmi pineqartumi najugaqartut angalaarsinnaanerisa killilersorneqannginnissaa anguniarlugu. Takornarissamik taaguusiinermi nunamut aalajangersimasumut najugaqarfimmulluunniit pitussimanngitsoq aalajangiunneqarsimavoq. Taaguusersuut naapertorlugu takornariartut kiffartuunneqarnissamik, neqeroortumut akiliuteqarnikkut akileqquneqartumut isumaqatigiissusiorsimagaanni, taava nammineq najugarisap eqqaani takornariaasoqarsinnaavoq.

Imm. 2 -mut

Siunnersuummi takornarissanut neqeroorutitut taaneqartoq tassaavoq suliaq / ingerlataq takornarissanut akiliuteqarnikkut tunniunneqartoq. Takornarissanut neqeroortut assersuutigalugu ulluinnarlugu ingerlatsinerusinnaavoq, takornariartitsinerusinnaavoq, angallassinerusinnaavoq qimussiussinerusinnaallunilu. Takornarissanut neqeroorummi suliarineqartumut atatillugu tuniniaasoqarsinnaavoq soorlu atortussat, angallassineq, nerisassat, imeruusaatit unnuinerillu.

Imm. 3 -mut

Aalajangersakkami takornarissanut neqeroorutigineqarsinnaasunut akuersissut suusinnaanersoq aalajangersarneqarsimavoq. Akuersissummi sumiiffimmi killilersukkami takornariartitsinermut ataatsimik arlalinnilluunniit neqerooruteqarsinnaatitaaneq pineqarpoq. Akuersissut pisinnaatitsissummik piginnittumut siunnersuummi § 2-mi imm. 4-mi allassimasut malillugit nalunaarutigineqartarpoq.

Imm. 4-mut

Siunnersuut malillugu pisinnaatitsissummik piginnittoq inuusinnaavoq imaluunniit inatsisitigut inuussinnaavoq, taannalu akuersissummik nalunaaruteqarneq aallaavigalugu sumiiffimmi killilersukkami takornarissanut neqeroorummik aalajangersimasumik neqeroorsinnaanermut pisinnaatitsissummik pissarsitinneqarsimavoq. Akuersissuteqartoqarneratigut pisinnaatitsissummik piginnittoq assigiinngitsunik pisussaaffilersorneqartarpoq.

Imm. 5 -mut

Inatsisartut inatsisaat una naapertorlugu neqeroortitsinertut paasineqassaaq nalinginnaasumik tamanut ammasumik qinnuteqartitsineq takornariartitsisarnermut akuersissuteqarnissamut atatillugu ingerlanneqartoq. Takornarissanut neqeroorsinnaanermut akuersissuteqarnissamut neqeroortitsisoqartarneq siunnersuummi § 9-mi allassimasut malillugit aalajangersarneqarsimavoq.

Imm. 6-imut

Kalaallit sulisut siunnersuummi pineqartut tassaapput sulineramik inuussutissarsiteqartut Kalaallit Nunaanni inuit allattorsimaffianni allassimasut nalunaarsugaallutik.

Imm. 7-imut

Kalaallit pilersuisut Inatsisartut inatsisaat una naapertorlugu pineqartut tassaapput nioqquteqartartut / tunisaqartartut Kalaallit Nunaanni najugaqartutut nalunaarsorsimasariaqartut. Nalunaarsorsimaneq pineqartoq tassaavoq Qitiusumik Suliffeqarfinnik Nalunaarsuiffimmi (CVR).

§ 3 -mut

Imm. 1 -imut

Aalajangersagaq aallaavigalugu sumiiffinni nunami aalajangersimasuni takornarissanut neqeroortitsinissamut Naalakkersuisut akuersissuteqartoqartariaqarneranik piumasaqarnissamut aalajangersaasinnaanerat periarfissinneqarpoq.

Sumiiffik pineqartoq tassaasinnaavoq nunaminertaq pilerinartoq akiliuteqartitsisarnikkut piniartitsisarfit, sisorarfittut imaluunniit ingerlatassanut allanut, naatsorsuutigineqartoq takornariartitsisarnermik inuussutissarsiortut kaaviiartitsilluarnissaannut aqutissiuussinnaasut, ingerlatsisut immikkut atugassaqartinneqarnerisigut takornariartitsisarnernik tunisaqartarnikkut. Naalakkersuisut aalajangersaasinnaappata akuersissummut piumasagaatinik sumiiffimmut aalajangersimasumut, taava Naalakkersuisut akuersissutinik neqerooruteqarsinnaapput neqeroortitsisarnernut aalajangersakkat siunnersuummi kapitalimi 3-mi allassimasut naapertorlugit. Akuersissummik tunineqartoq imaluunniit tunineqartut sumiiffimmut killilimmut, taamaalillutik takornarissanut

neqerooruteqarsinnaapput, taakkualu akiliuteqartitsisarnikkut tunisaqartalersinnaapput. Naalackersuisut akuersissummut atugassarititaasussanik sumiiffimmut pineqartumut atatillugu aalajangersaasimangippata taava takornarissanut neqeroorutaasoq pineqartumut piunasaqaateqassanngilaq, taamaalilluni sumiiffimmi pineqartumi takornarissanut neqeroorutaasoq siunnersuummi matumani aalajangersaaffigineqassanngilaq.

Ilaatigut ilanngunneqarsimavoq aalajangersaaniarnermi pilersaarusionerq aamma nunaminertat atorineqartarnerat pillugu inatsit inatsisilluunniit allat akerlerineqassanngitsut.

Malittarisassatiguttaaq siunnersuutigineqarpoq pilersaarusionerq aamma nunaminertat atorineqartarnerat pillugu inatsit malillugit sumiiffik pillugu kiffartuussisoqarnissaanut pilersaarutaareersut inatsimmilu matumani aalajangersakkat assignagit malittarisassiaareersut ataqineqassasut.

Taamaaliornikkut ilaatigut kommunit sumiiffik pillugu inatsisilluunniit allat atuuttut akerleralugit sumiiffimmi aalajangersimasumi inuussutissarsiortut ingerlatsisinaanannut aalajangersaannginnissaq qulakkeerniarneqarpoq.

Sumiiffimmi killilersukkami takornarissanut neqeroorummik aalajangersimasumik neqeroorsinnaanermut pisinnaatitsissummik tunniussisoqartariaqartillugu nalunaarutit malittarisassartai tamanut tusarniaassutigineqartariaqarput.

Taamaaliornikkut soqutigisallit sumiiffimmi takornarissanut neqerooruteqarsinnaanermut akuersissuteqarsinnaanermut sunniuteqarsinnaasunik paasissutissaatillit paasissutissiisinnaapput.

Imm. 2 -mut

Aalajangersakkami allassimavoq akuersissummut piunasaqaatini sumiiffimmi pineqartumi takornarissanut neqeroorutit allaanerit ingerlanneqarsinnaasut. Tamanna isumaqarpoq pisinnaatitsissummik piginnittoq sumiiffimmi takornarissanut neqeroorutit akuersissummi pineqartut avataatigut allaanerusunik neqerooruteqarsinnaasut. Tamannalu aamma isumaqarpoq akuersissuteqarnermi piunasaqaataanngitsunik ingerlatsisut allat sumiiffimmi takornarissanut neqeroorutininik allaanerusunik neqerooruteqarsinnaasut. Assersuutigalugu takorloorneqarsinnaavoq sumiiffimmi pineqartumi akuersissutinik marlunnik tunniussisoqarsinnaasoq, akuersissut pineqartoq ukiup qanoq ilineranut attuumassuteqarsinnaavoq, taamaalilluni pisinnaatitsissummik pigisalik sumiiffimmik piffissami pineqartumi atuinani.

§ 4-mut

Imm. 1 -imut

Naalackersuisut takornarissanut neqerooruteqarsinnaanermut akuersissutinik nalunaaruteqarsinnaaneri siunnersuutigineqarpoq.

Taamaaliornissamut siunnersuummi § 9-mi allassimasut, tassa neqerooruteqartitsineq, malillugu ingerlatsisoqarnissaa siunnersuutigineqarpoq.

Siunnersuutigineqarportaaq takornarissanut neqeroortitsisinnaanermut akuersissutinik tunniussinissamut nalilersuinermi piumasagaatit siunnersuummi § 10-mi allassimasut minnerpaamillu piumasagaatit naammassisariaqakkat § 11-mi allassimasut aallaaviussasut.

Siunnersuutigineqarportaaq takornarissanut neqeroortitsisinnaanermi akuersissutinik tunniussineq kisermaassinertalerlugu nalunaarutigineqassasoq. Aalajangersagaq aallaavigalugu allassimavoq pisinnaatitsissummik piginnittoq imaluunniit piginnittuusut akuersissut aallaavigalugu sumiiffimmi takornarissanut neqerooruteqarsinnaatitaasut, takornarissanut neqeroorummik pineqartumik suliaqarsinnaasut. Taamaattumik pisinnaatitsissummik piginnittoq imaluunniit piginnittuusut kisiartaallutik sumiiffimmi akuersissummi pineqartumi takornarissanut neqeroorummik akiliisitsillutik kiffartuussisinnaapput.

Takornarissanut neqeroortitsisinnaanermut akuersissut malillugu sumiiffimmiissinnaanermut inatsisit allat atorunnaarsineqanngillat. Assersuutigalugu imaassinnaavoq sumiiffimmi akiliilluni aalisartitsisinnaanermut akuersissuteqarfiusumi pisuttuortoqarsinnaasoq, soorlu aamma akuersissutit aallaavigalugit allat sumiiffimmi aalisarsinnaatitaanerat sunnerneqarnavianngitsoq.

Imm. 2-mut

Imm.1-imi allassimasut aallaavigalugit takornarissanut neqerooruteqarsinnaanermut akuersissummik nalunaaruteqarfigineqassagaanni, qinnuteqartoq siunnersuummi §§ 12-mit 15-imut allassimasut aammalu § 16-imi allassimasut naammassisinnaasariaqarpai. Tassa aalajangersakkami qinnuteqartoq akuersissummik tunineqarsinnaanermi eqqarsaatigineqassaguni, taava piumasagaatit atuuttut naammassisinnaasariaqarpai, taakkualu siunnersuummi § 10-mi allassimasut minnerpaamillu piumasagaatit naammassisariaqakkat § 11-mi allassimasut aallaaviussapput.

Piumasagaatit pineqartut pisinnaatitsissummik tunineqartup sillimaniarnermut pilersarusiaanut aammalu qularnaveeqqutip annertussusaanut allatigulluunniit sillimaniarnermut attuumassuteqarput. Ilaatigut Naalackersuisut aalajangersaasimatillutik sulisunik pilersuisunilluunniit kalaallinik atuinisaaq piumasagaataasinnaavoq.

Takornarissanut neqerooruteqarsinnaanermut akuersissummik qinnuteqartup piunasaqaatit naammassisinnaanngippagit, qinnuteqaataa itigartitsissutigineqassaaq.

Piunasaqaatit piffissami akuersissummik nalunaaruteqarfiusumi allanngoqqusaanngillat. Akuersissummik nalunaaruteqarnermi piunasaqaatit pineqartut akuersissummik nalunaaruteqarnermut attuumassuteqarput. Pissutsit allanngussappata qulakkeerneqarsinnaanngilaq pisinnaatitsissummik piginnittup piunasaqaatit akuersissummik nalunaaruteqarnermut atatillugu inissinneqarsimasut naammassisinnaagai.

Imm. 3-mut

Takornarissanut neqerooruteqarsinnaanermut akuersissut Naalakkersuisut allakkatigut akuersitinneratigut allanut tunniunneqarsinnaanissaa siunnersuutigineqarpoq,

Pisortaqarfiit akuersissutaannik allanut tunniussisoqarniartillugu akuersissuteqarnermut atatillugu pisinnaatitaassutsimik piginnittumut pisussaaffiit ilaatigut piunasaqaatit naammassineqarnissaat qulakkeerneqartariaqarpoq, tunniussisoqartillugu pisussaaffiit ajornerulissanngillat peerneqassanatillu.

Imm. 4-mut

Atuisut paasisutissanik pissarisinnaanissaat tunngavigalugu pisinnaatitsissummik pigisallit kikkut akuersissutinik pissarsisimanersut, akuersissut sumi atorneqarsinnaanersoq akuersissutillu sivisussusaa Naalakkersuisunit tamanut saqqummiunneqarsinnaavoq. Assersuutigalugu nittartagaq tamanit takuneqarsinnaasoq atorneqarsinnaavoq. Naalakkersuisut pisinnaatitsissummik taama ittumik atussagunik, taava takornarissanut neqeroorsinnaanermut akuersissutit aallaavigalugit pisinnaatitsissummik pigisallit tamakkerlutik takuneqarsinnaalissapput, taamaaliornikkut immikkoortitsisoqarsinnaanera avaqunneqassaaq.

Imm. 5 -imut

Suleriaasissat assigiissarneqarnissaat qulakkeerniarlugu Naalakkersuisut nalunaarummik suliaqarsinnaapput tassanilu takornarissanut neqerooruteqarsinnaanermi akuersissutinik tunniussinermi atugassarititaasut sukumiinerusumik aalajangersaaffigineqarsinnaapput.

Imm. 6 -imut

Aalajangersagaq aallaavigalugu kommunini takornarissanut neqeroortitsinissamut akuersissuteqarnissamut oqartussaaffiup kommuninut ingerlatinneqarsinnaaneranut periarfissiivoq. Akuersissutinik tunniussisinnaanermut pisinnaatitsissut atorneqartussaattillugu, tamanna kommunalbestyrelsemi aalajangiiffigineqassaaq, § 3-mi imm. 1-imili allassimasut malillugit Naalakkersuisut sumiiffinni nunami aalajangersimasuni takornariartitsinermut

neqerooruteqarsinnaanermut akuersissuteqarfissami aalajangersaasinnaanera allanngortinneqassanngilaq.

§ 5 -imut

Imm. 1 -imut

Aalajangersakkat piffissamut akuersissutip atuuffigisagaanut tunngasuupput. Aalajangersakkap nalunaarppaa takornariartitsinermik inuussutissarsiummut akuersissut malitassatut pingaarnertut piffissamut ukiunik 20 -nik sivisussusilimmut tunniunneqartarnera. Tamanna isumaqarpoq akuersissummik tunniussisoqarnissaanut ukiunik 10-nik sivisussusilimmik tunniussisoqarsinnaasoq, immikkuullarissunillu pisoqartillugu sivisunerusumik tunniussisoqarsinnaavoq. Immikkuullarissutut isigineqarput suliniutit angisuut. Tamatumani pisariaqassusia suliniummi ingerlatsinissamut pilersaarusiame aamma aningaasartuutissanut missingersuusiani ersersinneqarsimassaaq.

Piffissaq akuersissuteqarfiusussap inissinniarnerani, takornarissanut neqerooruteqarnissap sivisussusissaattut naatsorsuussaq kiisalu neqerooruteqarnermi aningaasatigut iluanaarutissat aallaavigalugit aalajangiisoqartassaaq.

Imm. 2 -mut

Naalackersuisut ukiut 20-t tikillugit akuersissut sivitsorsinnaavaat. Sivitsuineq nalileereernikkut atugassarititaasunik allannguuteqartitsinani allanngortitsilluniluunniit pisinnaavoq.

Piffissaliussamik sivitsuisarnermi isiginiagassat marluupput, tassalu pisinnaatitsissummik pigisaqartup piffissamik sivitsuinissamik soqutigisai aamma illuani pisortat soqutigisaat tassa piffissamik sivitsuivallaannginnissaq, tassami ingerlaavartumik takornariartitsinermi inuussutissarsiutit niuerfiusunut naleqqussartarnissaat akornuserusunnginneqarami. Pinaveersaartinniarsarisaq tassaavoq pisinnaatitsissummik pigisaqartup piffissami naapertuutinnigitsumi nunaminertami inuussutissarsiutinik ineriartortitsinani "issiaannarnissaa". Taamaattumillu pisinnaatitsissummik pigisaqartup kisermaassinerup inuussutissarsiummik ineriartortitsinermut atorneqarneranik suliffeqarfimmilu piffissami naapertuuttumi piujuartitsinermut tunngaveqarluni aningaasarsiorsinnaanermut takussutissaqartitsinissaa pingaaruteqartinneqarpoq.

Akuersissutinik sivitsuinermi ukiut 20-t tungaannut sivitsuisoqarsinnaavoq, tamannalu pisinnaavoq ingerlatassanut pilersaarut nutaap ingerlanneqarnissaanut aammalu aningaasatigut iluanaaruteqarsinnaanissaq anguniarneqassatillugu.

Taamannak aalajangersaanermut peqqutaavoq Naalakkersuisut suliffeqarfiit suliniutiminnik misileraasarnissaannik, akuersissummilu tunngaviusunik misileraasarsinnaanissaannik Naalakkersuisut periarfisseerusunnerat. Suliffeqarfiup ilisimasat aamma misilittakkat pigilersimasai tunuliaqutaralugit nioqqutit neqeroorutaasut annertusisinnaavaat. Taamaattoq matumani isumaavoq periarfissap pineqartup atorneqartarsinnaanissaa suliffeqarfiit oqimaatsunik aningaasaliissuteqartussaatiillugit. Assersuutigalugu akuersissuteqarnermut atatillugu suliffeqarfiup atortussanik akisuunik pisineratigut, imaluunniit attaveqaasersuutininik, sanaartukkanik assigisaannillu pilersitsineratigut. Annerulersitsinermi aningaasaliissutaasut suliniutip aningaasaliiffigineqarnissaanut qulakkeerinnissutaasinnaanissaat isiginiarneqassaaq.

Ingerlatsineq pilersaarutaareersutut ingerlatillugu takornariartitsisarnermut akuersissutinik sivitsuiniarnermut nalilersuiniarneq piumasaqataatinik allannguinaartaqanngitsumik nalilersuiffiussaaq. Assersuutigalugu ingerlatsinissamut pilersaarummi nassiuuneqarsimasumi anguniakkat anguneqarsimasut. Sivitsuineq piumasaqaatinik allannguilluni pisinnaavoq ingerlatsinissamut pilersaarummut akuerineqaqqaartumut sanilliullugu suliniut malunnaatilimmik allannguuteqarsimappat.

Imm. 3 -mut

Akuersissutit ukiut 30-t sinnerlugit sivissussuseqartannginnissaat siunnersuutigineqarpoq.

Aalajangersagaq isumaqarpoq piffissap ukiunik 30 -nik sivissussusillip naanerani akuersissutip pigiinnarnissaa kissaatigisimatillugu akuersissummik nutaamik qinnuteqartoqartassasoq. Tamanna isumaqarpoq nutaamik neqeroortitsisoqassasoq, akuersissummillu peqaqqaartuusimasoq taamaasinerani ilimanassagunarlu periarfissamigut ingerlatsinermi suliniutit pilersereersimasat akuersissuteqartoqqaarneraniit tunngavigalugit inissisimalluarnerussasoq.

§ 6-mut

Imm. 1 -imut

Aalajangersakkap qinnuteqartoq paasissutissiinissamut pisussaaffilerpaa. Paasissutissiisusaanermi isumagineqarpoq siullertut pisut qinnuteqartup namminerisamik erseqqissaasusnaanera pissutsinut akuersissummut tunngassuteqartunut, pisortat qinnuteqaammik suliaqarnerannut attuumassuteqarsinnaasunik. Tamatumani assersuutigalugu pineqarsinnaapput nioqqutigisanik tunisaqartarnermi naatsorsuutigeriinngisanik pisarsimasinnaasut. Pissutsit taamaattut assersuutigalugu pisariaqartitsilersinnaapput Naalakkersuisut isumaliuteqartariaqarnerannut sillimaniarnermi atugassarititaasunik naleqqussaasariaqarnermik, nioqqutinut assingusunut atatillugu.

Aappaattut Naalakkersuisunut noqqaassuteqarneratigut pineqartoq

paasissutissiisussaataavoq. Tamatumani assersuutigalugu pineqarsimasinnaapput nioqqutinik qassinik tunisaqarsimaneq imaluunniit tiguneqarsinnaasut pillugit apeqqutit.

Imm. 2 -mut

Aalajangersagaq aallaavigalugu paasissutissiisussaanermi annertussutsinut paasissutissallu qanoq tunniunneqarsinnaaneritut tunngasunik Naalakkersuisut aalajangersaasinnaapput. Assersuutigalugu Naalakkersuisut immersugassaq aalajangersimasoq malillugu paasissutisseeqqusisinnaapput. Imaluunniit nalunaarutit digitalimik portali aalajangersimasoq atoqquneqarsinnaalluni.

§ 7 -imut

Imm. 1-mut

Aalajangersakkami aalajangiunneqarpoq Naalakkersuisut pilersitsisinnaanermik ingerlatsisinnaanermillu ataatsimiititaliamik nalilersuisartussamik kommunimi pineqartumi akuersissuteqarfiusartunut atatillugu aalajangiisinnaanerit. Aalajangersagaq oqaasertaligaavoq piomagunik aatsaat aalajangersaasinnaasut, tassungalu pissutaavoq kommunimi pineqartumi qinnuteqaammik suliassaartoqalerpat aatsaat takornariartitsisarnernut akuersissuteqarnissamut nalilersuisartunik pilersitsinissaq pisariaqalissamat.

Siusinnerusumut sanilliullugu takornariartitsinermi akuersissutinik qinnuteqaatinik suliaqarnerni akuersissutinillu nalunaaruteqartarnerni najukkani oqartussaasunik peqataatitsinerunissaq anguniarlugu taamatut aalajangersaasoqarsimavoq.

Takornariartitsinermut neqerooruteqarsinnaanermut akuersissutinik tunniussisoqartussaataillugu pisortaqarfik aalajangiisinnaatitaasoq naliliinissamut ataatsimiititaliamik pilersitsileruni siunnersuummi allassimasut malillugit ataatsimiititaliamik pituttugaanngitsumik pilersitsissaaq. Tassunga atatillugu aalajangiinissamut ataatsimiititaliaq, avataaniittunut avitsisoqarsimanngippat, pisortat ingerlatsineranni suliassat sularineqartarnerat malillugu aammalu pisortat ingerlatsinerat pillugu paasitinneqarsinnaatitaaneq malillugu inassuteqaasiussaaq.

Imm. 2-mut

Sumiiffimmut akuersissuteqarfiusussamut qinnuteqaatit taakkunungalu attuumassutillit allat akuersissutillu tunniunneqarsimasut aallaavigalugit nalilersuinermit ataatsimiititaliaq innersuussuteqartarnissaa siunnersuutaavoq. Tamannalu Naalakkersuisut noqqaassuteqarneratigut pisassaaq.

Nalilersuisarnermut ataatsimiititaliaq nalilersuinertik aallaavigalugu tunngavilersukkanik inassuseqaasiussapput. Isumaqatigiittoqarsinnaanngippat aalajangiineq taasinikkut pissaaq.

Amerlanerussuteqartut aallaavigalugit nalilersuisarnermut ataatsimiititaliaq inassuteqaasiussaaq.

Nalilersuisarnermut ataatsimiititaliami ilaasortassatut toqqakkat affai peqataatillugit aalajangiisoqarsinnaavoq. Taamaakkaluartoq minnerpaamik Namminersorlutik Oqartussa qarfiup kommunillu aallartitaat ataatsimiinnermi peqataassapput. Taamaaliornermi sumiiffimmit peqataatitsinissaq kiisalu sinaakkutit tunngaviusut malinneqarnissaat qulakkeerniarneqarpoq.

Takornariaqarnermut neqerooruteqarsinnaanermut akuersissummi pissutsit assigiinngitsut aallaavigalugit nalilersuinissamut ataatsimiititaliap inassuteqaasiornissaa naatsorsuussaavoq.

Siullertut sumiiffimmi akuersissuteqarfiusussami neqeroortitsitsisoqarneratigut qinnuteqaatit nassiunneqartut nalilersuisarnermut ataatsimiititaliap suleqataaffigissagai siunnersuutigineqarpoq.

Aappaattut nalilersuisarnermut ataatsimiititaliap siunnersuummi § 17-imi allassimasut aallaavigalugit akuersissummik nalunaaruteqarsinnaanernut pisinnaatitsissummik pigisallip ingerlatsinissaminut pilersaarussiaa qanoq naapertuutsiginersaq kiisalu ingerlatsinissamut pilersaarummi suut naapertuunnersut nalilersuiffigissavaat.

Pingajuattut akuersissummut piunasaqaataassut pillugit naammassinnissinnaannginneq aallaavigalugu siunnersuummi § 25 imm. 1-imi allassimasut malillugit peqqussuteqartoqarsinnaanernut tunngatillugu nalilersuisarnermut ataatsimiititaliaq nalilersuisinneqarsinnaavoq. Assersuutigalugu imaassinnaavoq nalilersuisarnermut ataatsimiititaliaq isumaqartoq akuersissuteqarnerup atorunnaarsinneqarnerani illuutit sanaartukkalluunniit allat peerneqarnissaannut peqqussuteqartoqarsinnaasoq. Pisinnaatitsissummik piginnittoq unioqqutitsineratigut aamma aaqqiissuteqartoqarnissaanik peqqussusiortoqarsinnaavoq.

Pingajuattut takornarissanut neqerooruteqarsinnaanermut akuersissut ingerlatsisumut allamut tunniunneqarniartillugu nalilersuisarnermut ataatsimiititaliaq suliniutip tigusissaanut piunasaqaatinik naammassinninersaq nalilersuisinneqarsinnaavoq. Pingajuattut akuersissutaasup sivitsorneqarnissaanut qinnuteqarnermi nalilersuisarnermut ataatsimiititaliaq nalilersuisinneqarsinnaavoq.

Qulaani taakkartorneqartut taakkuinnaanngillat, allatigut Naalakkersuisut nalilersuisarnermut ataatsimiititaliamut nalilersortikkusutaa aamma nalilersuiffigineqarsinnaavoq.

Imm. 3-mut

Naalakkersuisut nalilersuisarnermut ataatsimiititaliamut ilaasortassanik siulittaasussamillu toqqaasinnaanermut kiisalu taasisarnermut malittarisassanik aalajangersaasinnaapput.

Aalajangersagaq aallaavigalugu siullertut Naalakkersuisut nalilersuisarnermut ataatsimiititaliamut ilaasortassanik toqqaasarnermut suleriesissanik aalajangersaasinnaapput, tassunga ilanngullugu ilaasortat amerlassusissaat ilaasortallu agguataarneqarnerat.

Aalajangersagaq aallaavigalugu aappaattut Naalakkersuisut siulittaasussamik toqqaasarnermut suleriesissanik aalajangersaasinnaapput, tassunga ilanngullugu piginnaasassatut assigisaattullu piumasaqaatit.

Aalajangersagaq aallaavigalugu pingajuattut Naalakkersuisut nalilersuisarnermut ataatsimiititaliami taasisarnermut suleriaasissanik aalajangersaasinnaapput, soorlu assersuutigalugu toqqaasinnaassusillit aallaavigalugit inernerit.

§ 8-mut

Inatsisartut inatsisaanni § 3-mi, §§ 12-15-mut aammalu §§ 17-18-imilu aalajangersakkat aammalu inatsisartut inatsisaanni matumani aalajangersakkanut allanut immikkuullarissumik pisoqartillugu piumasaqaatinut Naalakkersuisut immikkut akuersissuteqarsinnaanerit periarfissaavoq.

Immikkut akuersissuteqarsinnaaneq siunnersuutigineqarpoq pisinnaatitsissummik piginnittup ilaatigut allaffissornikkut aningaasatigullu inissisimaffia mianeriniarlugu. Naalakkersuisut pisuni ataasiakkaani immikkut akuersissuteqartoqartariaqarnerisooq nalilersuisassapput.

Siunnersuut aallaavigalugu Naalakkersuisut sillimaniarnermut pilersaaruteqarnissamut piumasaqaammut immikkut akuersissuteqarsinnaapput, taamaaliorinnaappullu akuersissut aallaavigalugu takornarissanut neqeroorutaasussap navianaataa Naalakkersuisunit nalilersorneqarsimappat.

Tamannalu aamma pisinnaavoq pisinnaatitsissummik piginnittoq immikkut mianeriniartillugu, assersuutigalugu pisinnaatitsissummik piginnittup sulisui ikippata, ilinniarnini napparsimaniniluunniit pequtigalugu nunani allaniittariaqartarpat imaluunniit pisinnaatitsissummik piginnittup piumasaqaatinik attassiniarnermini naapertuutinningsumik allaffissornikkut suliaqassaguni aningaasartuuteqassagunilu. Taakkartukkat kisimik aallaaviussanngillat.

Siunnersuummittaag § 3-mi sumiiffimmi killilimmi akuersissut aallaavigalugu takornarissanut neqerooruteqarsinnaanerit piumasaqataasunut immikkut akuersissuteqartoqarsinnaavoq.

Sumiiffimmi killilikkami takornarissanut kiffartuussisinnaanermut Tunngaviusumik inatsimmi § 73-imi allassimasut malillugit arsaarinninnissamut tunngatillugu piunasaateqartoqarsinnaatillugu pineqartup immikkut akuersissummik tunineqarsinnaanissaa siunertaavoq.

Takornarissanut neqerooruteqarsinnaanermut akuersissut tunngavigalugu pisinnaatitsissummik piginnittup piffissap ingerlanerani atugassarititaasutigut allannguuteqartoqarneratigut, takornarissanut neqerooruteqarsinnaanermut akuersissummi piunasaqaatinik naammassinnissinnaajunnaarnerminut atatillugu immikkut akuerineqarnissaminut qinnuteqarsinnaavoq.

§ 9-mut

Imm. 1-mut

Siunnersuut malillugu takornarialerisunut akuerissummik tunniussisoqarsinnaavoq neqeroortitsisoqareerneratigut aammalu nalilersuineranut ataatsimiititaliamut naapertuuttumut tusarniaasoqareernerata kingorna takuuk siunnersuummi § 7.

Aalajangersagaq aallaavigalugu takornariartitsisarnermut akuersissuteqartoqarnissaanik siunertaqartumik nalinginnaasumik tamanut ammasumik qinnuteqaqqusisoqassaaq, taannalu neqeroortitsinermik taaneqartarpoq. Tamatumunnga tunuliaqutaavoq sumiiffimmi takornarialeriffiusinnaasumik pilerinartumut suliffeqarfiit arlallit ingerlatserusussuseqarsinnaaneri. Tamanut ammasumik nalinginnaasumik qinnuteqaqqusisarnerni Naalakkersuisut tamanut nalunaaruteqartarput qinnuteqaqqusillutik taannalu minnerpaamik ulluinnarnik 45 sivisussuseqassaaq. Tamanut saqqummiisoqartarpoq Naalakkersuisut quppersagaanni tusagassiorfitsigullu.

Imm.2-mut

Aalajangersagaq aallaavigalugu Naalakkersuisut periarfissaqarput siusinnerusukkut neqeroortitsiffioreersup iluani nutaamik neqeroortitseqqeqqaanngikkaluarlutik sumiiffimmut akuersissuteqarnissamut, tamannalu pisinnaavoq qinnuteqaat kingusinnerpaamik neqeroortitsinerup naaneraniit qaammatit 18-it tikitsinnagu tigusimagaanni. Aalajangersakkap siunnersuummi matuma tunuliaqutaraa sumiiffinnik akuersissuteqarfiusinnaasunik peqartarnera qinnuteqarfigineqanngitsunik. Pisuni ataasiakkaani qinnuteqarfissap qaangiunneraniit qinnuteqaatinik nassiussisoqarsinnaasarpog. Innersuussilluni sumiiffimmut qinnuteqartoqarsimanninneraniit naatsorsuutigineqarpoq allaniit sumiiffimmut qinnuteqartoqarnianninnera, taamaammallu nutaamik qinnuteqartitsineq kinguneqassanngitsog piukkunnartumik akuersissuteqarnissamut.

Imm. 3-mut

Aalajangersakkami aallaavigalugu neqeroortitsisoqareerneratigut Naalakkersuisut akuersissummik tunniussisariaqavinninnerat aalajangersarneqarpoq. Taamaasillutik Naalakkersuisut suleriaaseq imm. 1-imi taakkartorneqartoq aallaavigalugu qinnuteqartoqaraluartoq akuersissuteqanngitsuinnarsinnaatitaapput, tamannalu pisinnaavoq neqeroortitsinermi piumasqaatit qinnuteqartut akornanni naammassineqarsinnaanngippata.

Tamatuma kingorna Naalakkersuisut imm. 1-imi allassimasut aallaavigalugit nutaamik akuersissutinut qinnuteqaaqusissummik ingerlatitseqqissinnaapput, imaluunniit sumiiffik piumasqaatitalimmik akuersissuteqarfiusarunnaassanersoq aalajangiiffiqineqassalluni.

§ 10-mut

Imm. 1 -imut

Aalajangersakkami nalunaarsorneqarput toqqaasarnermi piumasqaatit akuersissuteqarnermi tunngavigineqassasut. Piumasqaatit taamaasillutik inatsisinik tunngavilimmik kinaassusersiunngitsumillu piumasqaataapput qinnuteqartut sumiiffimmut ataatsimut arlaqartut nalilersuivigineqarnissaannut. Toqqaasarnermi piumasqaatit qinnuteqartitserernermi qinnuteqaatinik nalilersuisoqalinnginnerani qanoq oqimaalutarneqarnissai aalajangerneqassaaq. Toqqaasarnermi atugassarititaasut tullerriaarneri atuuttut taamaasilluni oqimaalutaanermik tunngaveqanngilaq.

Nr. 1 -imut

Aalajangersakkami pineqarput qinnuteqartunik toqqaasarnermi piumasqaatit teknikkikkut pisinnaasat. Qinnuteqartup siusinnerusukkut neqeroornermi, nioqquteqarnermi, tunisaqartarnermi piviusunngortitsisarnermilu ingerlatereersimanera toqqaarnermi oqimaannerusinnaapput. Takornarialerisoq neqeroorutaasup assinganik ingerlatsinikuunngikkuni, taava takornarissanut neqeroorutaasussanut assingusunik ingerlatsisimaneq aamma oqimaaqutaasinnaavoq. Pisinnaatitsissummik pigisaqartoq takornariassanut neqeroortitsinissamut naleqquttunik piginnaaneqartariaqarpoq. Tamannalu suliffeqarfiup isumannaatsumik akilersinnaasumillu ingerlanneqarnissaanut piumasqaataavoq.

Nr. 2 -mut

Aalajangersakkami qinnuteqartup aningaasaqarnikkut aningaasalersuisinnaanikkullu qanoq ittunik periarfissaqarneranik piginnaanerinillu, tassunga ilanngullugu aningaasaqarnikkut sinaakkutigisaanik imaqarpoq. Qinnuteqartup aningaasaqarnikkut qanoq ittunik tunuliaqutaqarnera toqqaanissami oqimaassuseqassaaq. Akuersissummik nalunaaruteqarsinnaanermi qinnuteqartup aningaasatigut inissisimanera pingaaruteqarpoq, tassami qinnuteqartup takornarissanut neqerooruteqarnissaminut sullissinissaminullu atatillugu aningaasartuutaasussanut naapertuuttumik matussusiisinaanera isiginiagassaavoq.

Aningaasaqarnikkut sinaakkutit qinnuteqartup suliniummik piviusunngortitsisinnaaneranut sunnuteqarput.

Nr. 3-mut

Siunnersuummi qinnuteqartup iliuusissaminut pilersaarusiaani missingiutaasumi takornarissanut neqeroorutininik tunniussinissaminut qanoq iliuseqarniarnersoq aalajangersarneqarsimavoq. Takornariartitsisarnermut akuersissummik akuerineqarsinnaajumalluni qinnuteqartoq nioqqutiminik naammaginantumik ussassaarisinnaassaguni aningaasatigut nukissaqartariaqarpoq, taamaaliornikkut pisisinnaasunik soqutiginnilersitsisinnaalluni, tamannalu pisinnaatitsissummik pigisalimmut inuiaqatigiinnullu aningaasaqarnikkut ineriartuutaasinnaassaaq. Qinnuteqartup nioqqutissaminik ussassaarisinnaanera aammalu tuniniaaffiusinnaasunik pilersitsisinnaanera toqqaanissami oqimaassuseqassaaq.

Oqimaalutaanermi oqimaassuseqartut aammattaaq ilagaat qinnuteqartup suliffissanik pilersitsiniarluni siunnersuutai najukkanilu nioqquteqartartunik atuiniarnera. Takornarissanut neqeroortitsisinnaaneranut akuersissummik nalilersuiniarnermi qinnuteqartup § 2-mi imm. 6-imi kalaallinik sulisunik aammalu § 2-mi imm. 7-mi kalaallinik pilersuisunik atuiniarnera aamma oqimaalutaatigineqassapput.

Nr. 4-mut

Siunnersuummi qinnuteqartup sumiiffimmi ingerlatsinera imaluunniit ingerlatsinissaminut pilersaarutai eqqarsaatigissagaanni, neqeroortitsisoqarneranut atatillugu qinnuteqartoq sumiiffimmi ingerlatsilereersimaguni, taava tamanna aamma oqimaalutaatigineqassaaq.

Imm 3-mi allassimasut aallaavigalugit toqqaanissamut piumasagaatit oqimaatigiiissaarneqassapput, oqimaalutaariaaserlu qinnuteqaqqusissummi tamanut saqqummiunneqassaaq. Uani ersarissarneqarpoq qinnuteqartoq sumiiffimmi akuersissuteqarfiusussami ingerlatsisooreersoq ajunnginnerusumik inissisimassasoq, tamannali peqqutaalluni automatiskimik akuersissummik tunineqarsinnaanani. Sumiiffimmi ingerlatsisinnaaneranut akuersissutaasussami ingerlatsinerit pineqartut tamakkiisumik ilaannakortumilluunniit ussassaarutaasimasinnaapput, tuniniarneqarsimasinnaapput tunniunneqarsimasinnaallutillu.

Takornarialerinissamut akuersissummik nalunaaruteqarnissamut atatillugu ingerlatsinissamut pilersaarut akuersissummut atugassarititaasunut ilanngunneqassaaq, taamaalilluni pisinnaatitsissummik pigisaqartup pilersaarummik malinninnissani pisussaaffigilissavaa.

Nr. 5 -imut

Siunnersuummi qinnuteqartup takornarissanut neqerooruteqarnissaminut ingerlatsinissaminullu piujuaannartitsinermik tunngaveqartumik ingerlatsinnaanissaanut piginnaasai pisinnaassusaalu siammasissumik paasineqassaaq. Piujuaannartitsineq pinngortitamut, avatangiisunut, silaannarmut, sulineramik inuussutissarsiuqartunut atugassarititaasunut aammalu inuiaqatigiinni nalinginnaasunik soqutigisanut tunngasinnaavoq. Tamatumani assersuutigalugu pineqarsinnaapput qinnuteqartup qanoq aaqqissuussisarnikkut eqqagassanik ikinnerpaaffissamiititsinera, avatangiisunut inussiarnersumik aaqqiissutissarsisarnera, atueqqittarnerup periaatsiniitsinera, pigisanik atuisarnerup aaqqissuullugaanera, qanoq pinngortitamut malunniuttartut annikitsuutinneqarneri suliffeqarfimmik pilersitsinermi aamma inuiaqatigiinni innuttaasut ilaat suliffeqarnerup avataaniittut akulerunneqartarsinnaaneri. Matumani aamma pineqarsinnaapput suliffeqarfiit sulisorisaminnik periarfissaqartitsisut sulisarnissamik atugaqarnissamillu isumatuumik aaqqissuussinernik imaqartunik, ilutigisaanillu peqqissutsimik tarnikkut allatigullu pitsaasumik atugaqarfiusumik. Tassaasinnaapput suliffeqarfiit ilinniartitaanerni unammilligassanik kalaallit suliffeqarneranniittunik isiginiaasartut, ilinniartitaanernik piginnaasatigullu ineriartortitsinermik sulinerup ilaatut ingerlatsisut ineriartortitsiviusunik sulisorisat akornanni suliffeqarfiup ingerlanneqarani ineriartortitsinermilu.

Imm. 2 -mut

Siunnersuummi akuersissummik tunniussinissami tunngavissaqarnerujumalluni qinnuteqartut arlaqartut akornanni naligiittoqarnerani Naalackersuisut atugassarititaasunik arlaqarnerusunik aalajangersaanissamut periarfissaat pineqarpoq. Aalajangersakkanut piumasaqaatit ilassutaasinnaasut naleqquttuusariaqarput, kinaassusersiortuunatik immikkoortitsinatillu. Ilassutiniq piumasaqaasiorsinnaaneq aatsaat atorneqalissaaq toqqaasarnermi piumasaqaatit imm. 1 -imiittut aallaavigalugit nalilersuisoqareernerani, tassanilu qinnuteqartunik naliliinermi naligiittoqarnerani. Tassa imaappoq nalilersuinermi imm. 2-mi eqqaaneqartut toqqaasarnermi piumasaqaataasut Naalackersuisut aalajangersarsinnaasaat siulliullugit atorneqartussaasut, periarfissaqaranilu taakkua tunngavigalugit marluk arlaqartulluunniit akornanni toqqaasoqarsinnaaneranut akuersissuteqarnissamut.

Imm. 3 -mut

Uani ilisimatitsissutigineqarpoq toqqaanissamut piumasaqaatit qanoq oqimaalutarneqarneri neqeroortitsinermi pineqartumi ilisimatitsissutigineqartassasut. Saqqummiinerlu qinnuteqaqqusissutip tamanut nalunaarutigineqarneranut atatillugu pisassaaq. Toqqaasarnermi piumasaqaataasuni aalajangersakkat akornanni oqimaalutaasarnerni immikkoortitsisoqarsinnaavoq salliutitassatut tulliutitassatullu.

§ 11 -imut

Imm. 1 -imut

Siunnersuummi Naalakkersuisut neqeroortitsinermut atatillugu piumasaqaatit minnerpaaffissaanik aaqquissuussinnaasut aalajangersarneqarpoq. Piumasaqaatit minnerpaaffissaat paasineqassaaq piumasaqaatit aalajangersakkat tunngaviusut sanioqqunneqarsinnaanngitsut. Qinnuteqartut piumasaqaatinik minnerpaaffissanik naammassisaqanngitsut toqqarneqarsinnaanngillat, aamma naak atugassarititaasuni allani naammaginatunik tunngavilersuigaluarlutik. Piumasaqaatit minnerpaaffissaat aalajangersarneqarsinnaapput qinnuteqartup pinngitsoorani naammassisassaaturt pissutsini aalajangersimasuni, imaluunniit piumasaqaatit qinnuteqartup toqqaasarnermi atugassarititaasunik nalilersuinermi angusaqarfiginerusimasassaaturt, pointinik aalajangersimasunik pissarsiffigisassaturt imaluunniit naliliinermi qaangigassaaturt.

Aalajangersagarlu assersuutigalugu atorneqarsinnaavoq Naalakkersuisut akuersissummik tunniussisoqarnissani neqeroortitsinermut atatillugu sumiiffimmi pinngortitamik illersuinerup immikkut pingaaruteqarfigisaani minnerpaaffissanik aalajangersaanerani, taamaaliortoqassaarlu pissutsit pineqartut immikkut isiginiarsinnaajumallugit.

Minnerpaaffissanik aalajangersaaneq aamma atorneqarsinnaavoq suliffeqarfiit mikisut sumiiffiup nalaaniittut periarfissinniarlugit. Assersuutigalugu sumiiffiup nalaani suliffeqarfiit anginerit ingerlalluareersullu tassaniippata, sumiiffimmili pineqartumi suliffeqarfiit pingaarnertut ingerlataqaratik. Piumasaqaatinik minnerpaaffissaqartitsineq taamaasilluni atorneqarsinnaavoq najukkami ineriartortitsiniarnerup anguniarneqarnerani.

§ 12-mut

Siunnersuummi inuk pisinnaatitsissummik piginnittuusinnaaneranut piumasaqatimik imaqarpoq.

Siullertut inuk pineqartoq Kalaallit Nunaanni najugaqartutut nalunaarsorsimassaaq, minnerpaamillu ukiuni 5-ni kingullerni najugaqartutut nalunaarsorneqarsimasussaalluni.

Aappaattut pineqartoq Kalaallit Nunaannut tamakkiisumik akileraartussaataaerannik piumasaqaateqartoqarpoq.

Sisamaattut pineqartoq tamakkiisumik pigisaminik atuisinnaassaaq, akiliisinnaajunnaartutut, akiliisinnaanngitsutut imaluunniit sulianik unitsitsisutut inissisimaqqusaanngilaq.

Tallimaattut piumasaqataavoq pineqartoq Naalakkersuisunut 100.000 kr.-init annertunerusunik akiitsoqassanngitsoq akilerneqanngitsunik. Inatsit pineqartoq neqeroortitsinermut inatsimmit aallaaveqarpoq. Pineqartoq akilersuinissaminut

isumaqatigiissusiorsimaguni, taava piunasaqaat manna naammassineqartut isigineqartarpoq.

Naalackersuisut qinnuteqartumut piunasaqaatit tallimat pineqartut pillugit uppersaatinik piunasaqarsinnaatitaapput. Piunasaqaatit ingerlatsinerlut periutsit nalinginnaasut malillugit najugaqarnermut nalunaarsukkat akileraartarnermullu aqutsisoqarfimmi nalunaarsukkat aallaavigalugit misissorneqarsinnaapput. Taamaaliornissamut inuit paasissutissaataat pillugit inatsimmi allassimasut malinneqassapput.

Piunasaqaatit pillugit immikkut pisoqartillugu siunnersuummi § 8-mi allassimasut aallaavigalugit Naalackersuisut immikkut akuersissuteqarsinnaapput.

§ 13-mut

Imm. 1-mut

Siunnersuummi inatsisitigut inuk pisinnaatitsissummik piginnittuusinnaaneranut piunasaqatimik imaqarpoq.

Siullertut inatsisitigut inuk pineqartoq Kalaallit Nunaanni ingerlatsivittut aningaasaliiffiusut imaluunniit suliffeqartittut nalunaarsorneqarsimassaaq.

Aappaattut suliffeqarfik pineqartoq akiliisinnaajunnaartut, akiliisinnaanngitsut imaluunniit sulianik unitsitsisut inissisimaqqusaanngilaq.

Pingajuattut ingerlatseqatigiiffiup nammineq aningaasaataasa affai sinnerlugit toqqaannartumik toqqaannanngitsumilluunniit inuit piginnittuusut § 12-imi allassimasunik naammassinnissasut kiisalu taasisinnaasut affai sinnerlugit toqqaannartumik toqqaannanngitsumilluunniit § 12-imi nr.1-mit 4-mut allassimasunik aamma naammassinnissinnaassasut. Toqqaannanngitsumik piginnittuusut imaluunniit taasisinnaasut § 12-imi nr.1-mit 4-mut allassimasunik naammassinnissinnaassasut pineqartillugit, inuk takornariartitsisartumut suliffeqarfik piginneqatigiiffiusoq assersuutigalugu holding aqqutigalugu piginnittuovoq imaluunniit takornariartitsisartumut taasisinnaatitaavoq.

Suliffeqarfinnik pilersitsisoqarnissaa pinaveersaartinniarlugu § 12-imi piunasaqaatit ikkunneqarsimapput. Ilaatigut avataaniit aningaasaliisoqarnissaa pisariaqartinneqarsinnaasarpoq. Aalajangersagarlu ikkunneqarsimavoq pilersitsisoqarsinnaanissaa aningaasaliisoqarsinnaanissaalu oqimaaqatigiisinniariniarlugit.

Sisamaattut piunasaqaataavoq suliffeqarfimmi peqataasut affai sinnerlugit § 12-imi nr. 1-mit 4-mut allassimasunik naammassinnissinnaassasut.

Peqataasussanut piunasaqataasoq imm. 1-imi nr. 3-mi mianerinninneq Imm. 1-imi nr. 4-mut aamma atuuppoq.

Tallimaattut piunasaqaataavoq suliffeqarfik Naalakkersuisunut 100.000 kr.-init annertunerusunik akiitsoqassanngitsoq akilerneqanngitsunik. Inatsit pineqartoq neqeroortitsinermut inatsimmit aallaaveqarpoq. Suliffeqarfik akilersuinissaminut isumaqatigiissusiorsimaguni, taava piunasaqaat manna naammassineqartutut isigineqartarpoq.

Naalakkersuisut qinnuteqartumut piunasaqaatit tallimat pineqartut pillugit uppernarsaatinik piunasaqarsinnaatitaapput. Piunasaqaatit ingerlatsinermut periutsit nalinginnaasut malillugit najugaqarnermut nalunaarsukkat akileraartarnermullu aqutsisoqarfimmi nalunaarsukkat aallaavigalugit misissorneqarsinnaapput. Taamaaliornissamut inuit paasissutissaataat pillugit inatsimmi allassimasut malinneqassapput.

Piunasaqaatit pillugit immikkut pisoqartillugu siunnersuummi § 8-mi allassimasut aallaavigalugit Naalakkersuisut immikkut akuersissuteqarsinnaapput.

14 -imut

Imm. 1 -imut

Imm. 1 -imi siunnersuutigineqarpoq takornariartitsisarnermut akuersissummik nalunaaruteqartoqarsinnaaneranut piunasaqaatit aallaaviusassasoq qinnuteqartup sillimaniarnermut pilersaarusiamik allaganngukkamik suliaqarsimasarnissaa, tassanilu ingerlatsinerni qinnutigineqartuni aalajangersimasuni neqeroortutigineqartussani iliuusissat suunissaannik allassimasoqassaaq. Sillimaniarnermut pilersaarusiaq akuersissummut qinnuteqaammut ilanngunneqassaaq.

Imm. 2-mut

Ingerlatassanut kissaatigineqartunut tamanut sillimanermut pilersaarusiortoqarsimanissaa siunnersuutigineqarpoq.

Tamatuma assersuutigalugu kinguneraa nannunik takusassarsiortitsisarnermut akuersissummi sillimaniarnermut pilersaaruteqartussaana, tassanilu ilaatigut ingerlattakkap ulorianaateqarsinnaanera allaaserineqassaaq.

Ingerlatsinissat takornariartitsisartup suleqatigisamik avataaneersunut sulisitsineratigut ingerlanneqartartut aamma sillimaniarnermut pilersaarusiunneqassapput.

Imm. 3 -mut

Sillimaniarnermut pilersaarussiaq sukkulluunniit akuersissummik nalunaaruteqarfigineqartumi allaganngorlugu kalaallisut aamma tuluttut takornarissanut tigorianaannngorlugu inissinneqassaaq. Tamanna assersuutigalugu takornariartitsisartup nittartagaaniissinnaavoq.

Imm. 4 -mut

Siunnersuummi allassimasut malillugit sillimaniarnermut pilersaarussiaq nalorninaatinik nalilersuinerneq aamma sillimaniarnermi iliuuserineqartussanik atuuttunik imaqassaaq, takuuk imm. 5-6 -imut nassuiaatitut oqaaseqaatit.

Kinaluunniit Kalaallit Nunaanni susassaqaqfinni ingerlatsinissanik neqerooruteqartoq sillimaniarnermut pilersaarussiaq pisariaqartitsisoqartillugu nutarterisarnissamut akisussaavoq. Takornariartitsisartup nammeneq sillimaniarnermut pilersaarummik nutarterisoqarnissaanut nalilersuisussaavoq, kisiannili siunnersuummi § 25-mi allassimasut malillugit Naalakkersuisut nakkutiginittussaapput aalajangiisinnaallutillu. Assersuutigalugu sillimaniarnermut pilersaarummi nutarterisoqartariaqalersinnaavoq ingerlatsinerup allannguuteqarneratigut ulorianaataasinnaasut nutaat pilerpata, imaluunniit sumiiffimmi aalajangersimasumik pisoqarsimanera aallaavigalugu ingerlatsinerneq mianersugassat nutaanngorsimappata.

Imm. 5 -mut

Sillimaniarnermut pilersaarussiaq ilaassaaq nalorninaatinik nalilersuineq, taannalu peqataasunut tulluarsagaassaaq, tassanilu ingerlatani aalajangersimasuni peqataanermut atatillugu navianaataasinnaasunik nalilersuinerneq imaqassaaq. Assersuutigalugu nannunik sumiiffimmut takusassarsiortoqarnissanik kissaateqarnerneq, pilertortumik takornariarnissami navianaataasinnaasut pillugit nalilersuinerneq takunnissinnaaneq.

Nalorninaatinik nalilersuineq ingerlatsisoqannginnerani takornariartitsinissami peqataasussanut ingerlatassami pineqartumi tunniunneqassaaq, allataassallunilu ersarissumik oqaatsillu paasiuminartut atorlugit. Nalorninaatinik nalilersuineq ingerlatassami pineqartumi pissutsinut naleqquttuussaaq peqataasunullu ersarissumik paasissutissiissutissatut atorneqassalluni.

Ingerlanneqartussamik piareersaasiorterneq nalorninaatinik nalilersuineq atorneqassaaq sulisuusussanik toqqaanermeq, tamatumani aamma angalasut pisortassaannik, piffissami angalaffiusussami, avatangiisini pissutsinik nalilersuinerneq, atortussanik / sakkussanik toqquarnermeq il.il. Tamatuma assersuutigalugu kingunerissavaa atortussat / sakkussat pisariaqartinneqarsinnaasut ingerlatsinissami pineqartumi naleqquttuunissaat.

Imm. 6 -imut

Sillimaniarnermut pilersaarussiaq upalungaarsimanermut pilersaarussiaq ilanngunneqassaaq, tassanilu navianartunik nalaataqarnermi ajutoortoqarneraniluunniit qanoq suleriuseqartoqassanersoq nassuiarneqarsimassalluni. Sillimaniarnermut pilersaarummi sulisut ingerlatami peqataasut ilisimasassaannut, misilittagarisassaannut aammalu piginnaanerisassaattut piunasaqaatit allassimassapput, navianartoqartillugulu qanoq attaveqariaaseqassanersut ilanngunneqassalluni. Tassanilu suliffillit pinartoqartillugu qanoq iliuseqassanersut ersarissumik nassuiarneqarsimassaaq.

Imm. 7-mut

Siunnersuummi aalajangersarneqarsimavoq imm. 1-mit 6-mut allassimasut atorneqassanngitsut, qinnuteqartup sumiiffimmi inatsit alla imaluunniit periuseq alla ingerlatsineq pillugu sillimaniarnermut piunasaqaatitaqareersoq atuutsissallugit pisussaaffilerneqarsimappat.

Unilu ilaatigut pineqarsinnaavoq Kalaallit Nunaanni umiarsuit isumannaatsumik angalasinnaanissaannut assigisaannullu nalunaarut nr. 1697 11. december 2015-meersoq.

Taakkua saniatigut immikkut pisoqartillugu Naalakkersuisut siunnersuummi § 8-mi allassimasut pillugit immikkut akuersissuteqarsinnaapput.

§ 15-mut

Imm. 1 -mut

Siunnersuutaasumi inatsisartut inatsisaat una atorlugu takornarissanut neqeroorutaasartuni akisussaatinneqarnissamut sillimmaserneqartarnissaat allatigulluunniit sillimaniarnikkut qularnaveeqqusiisoqartarsimanissaq aalajangersarneqarsimavoq.

Aalajangersagaq naatsorsuutigineqarpoq atorneqartussatut ingerlatsinerit ajoqusertoqarsinnaaneranut ulorianaateqartutut nalilerneqartillugit.

Akisussaatinneqarnissamut sillimmaserneqartarnissamut allatigut aaqqiissutaasinnaasoq tassaasinnaavoq konto toqqorteriviusoq aningaasanik imalik imaluunniit danmarkimi naalagaaffiup obligatiunianik pigisaqarneq imaluunniit aningaaseriit qularnaveeqqusiinerat.

Taakkua saniatigut immikkut pisoqartillugu Naalakkersuisut siunnersuummi § 8-mi allassimasut pillugit immikkut akuersissuteqarsinnaapput.

Imm. 2 -mut

Siunnersuummi inuussutissarsiortut sillimmasersimanissaannut allatigulluunniit isumannaallisaanermut sillimmaserneqarsimanissaannut piunasaqaat imm. 1-imiittoq pineqarsinnaanngippat, piunasaqaatigineqartariaqannginnera aalajangersarneqarsimavoq. Taamatut pisoqarsinnaavoq sillimmasiisarfiit takornarissanik sullissisup takornarissanut neqeroorutiginiagaannut sillimmasiisinnaanngippata. Assersuutigalugu qimussiussinermi massakkumut inuussutissarsiutillit akisussaatinneqarnissaminnut sillimmasernissaannut sillimmasiisarfiit neqerooruteqarneq ajortut.

Aammattaq imm 1-imi allassimasut atuutsinneqarsinnaanngillat arlaatigut isumannaallisaanermut sillimmasiisoqarsinnaatinnagu.

Takornarissanut neqerooruteqarnissamut akuersissummik qinnuteqarnermut atatillugu siunnersuummi § 6-imi allassimasut malillugit qinnuteqartup Naalackersuisut noqqaassuteqarneratigut neqeroorutaasut pineqartut pillugit inuussutissarsiutilinnut sillimmasiisoqarsinnaanngitsoq allatigulluunniit isumannaallisaanermut sillimmaserneqarsinnaannginneq uppernarsassavaa. Uanilu aamma allanneqarsimavoq Naalackersuisut takornarissanut sullississutaaniartoq pillugu inuussutissarsiutilinnut sillimmaserneqarsinnaanermut periarfissaqarnersoq nalornissutigigunikku taamaallaat Naalackersuisut uppernarsaaseeqqusissasut, taamaattoqarsinnaavorlu akuersissut pillugu qinnuteqaammik suliaqarnissamut tamanna pisariaqartinneqarpat.

Imm. 3-mut

Siunnersuummi aalajangersakkat aallaavigalugit Naalackersuisut immikkut sillimmaserneqarnissamut isumannaallisaanerlu pillugu sillimmaserneqarnissamut piunasaqaatinik aalajangersaasinnaapput. Assersuutigalugu tamanna pisinnaavoq takornarissanut neqeroorutaasooq ajutoortoqarnissaanut navianaataasooq annertuppat, taamaattoqarpallu takornarissanut annaassiniarnissamut allatigulluunniit upalungaarsimanermi suliarineqartussanut aningaasartuutitut sillimmaserneqarsimanissaq piunasaqaataasinnaavoq.

§ 16 -imut

Aalajangersakkami akuersissuummi allassimasut malillugit sulinermut ingerlatsinermulluunniit atatillugu Naalackersuisut kalaallinik sulisitsisinnaanermut allatigulluunniit kalaallinik suliaqartitsisinnaanermut aalajangersaasinnaanerat periarfissinneqarpoq.

Aalajangersakkamittaaq akuersissuummi allassimasut malillugit sulinermut ingerlatsinermulluunniit atatillugu Naalackersuisut kalaallinik pilersuisunit nioqutissanik kiffartuussissutinilluunniit atuinissamut aalajangersaasinnaanerat periarfissinneqarpoq.

Taamannak aalajangersaanerup siunertaa Kalaallit Nunaanni suliffissanik amerlanerusunik pilersitsinissaq ineriartornissarlu. Naalakkersuisulli siunertarinngilaat sumiiffummi najugaqartunik sulisinnaasunik pilersuisinnaasunilluunniit atuinissamut periarfissaqarfiunngitsumi piviusunngortitsiffiusinnaanngitsumilu piumasaaqatinik atuutsitsinissaq.

§ 17-mut

Imm. 1-imut

Pisinnaatitsissummik piginnittoq suliainik aallartitsigani akuersissut aallaavigalugu takornarissanut neqeroortigisassani pillugit ingerlatsinissamut pilersaarusiortoqartariaqartoq, taannalu Naalakkersuisunit akuerineqaqqaartariaqartoq siunnersuummi aalajangersarneqarsimavoq.

Ingerlatsinissamut pilersaarummi ingerlatsinissamut aammalu illuutininik sanaartukkanik assigisaannillu atuinissamut pilersaarutit allassimassapput.

Imm.2-mut

Siunnersuummi ingerlatsinissamut pilersaarusiaq qanoq sinaakkuserneqassanersoq aalajangersarneqarsimavoq. Akuersissutip imarisaa aallaavigalugu suna naapertuuppa, akuersissutinillu aalajangersimasunik nalilersuinermi eqqarsaatigineqassaaq suut ingerlatsinissamut pilersaarummi nalunaarsorneqartariaqarnersut.

Siunnersuummi allassimasut aallaavigalugit ingerlatsinissamut pilersaarummi suliniutip ineriartortinnissaanut anguniakkat nassuiarneqarsimassapput.

Aappaattut ingerlatsinissamut pilersaarummi naapertuussuseq aallaavigalugu akuersissummik ingerlatsinissamut atatillugu pilersaarutit qanoq aallartisarniarneqassanersut, illunik, sanaartukkanik assigisaannillu qanoq atuisoqassanersoq nassuiarneqassaaq. Ingerlatsinissamut pilersaarummi allassimasut aallaavigalugit ingerlatsinissamut illuutininik assigisaannillu nutaanik sanaartortoqartariaqartoq ilaatigut allanneqarsinnaavoq.

Pingajuattut ingerlatsinissamut pilersaarummi akuersissummik ingerlatsinissamut atatillugu § 2-mi imm. 6-imi allassimasut malillugit kalaallini sulisinnaasunik atuinissaq aammalu § 2-mi imm. 7-mi allassimasut malillugit kalaallinik nioqqutissanik kiffartuussissutinillu pilersuisunik qanoq atuisoqassanersoq nassuiarneqassaaq. Ingerlatsinissamut pilersaarummi allassimasut aallaavigalugit ingerlatsinissamut kalaallit sulisorisassat sulisorisassatulluunniit naatsorsuutigisat qanoq amerlatigissanersut nassuiarneqarsinnaavoq.

Sisamaattut ingerlatsinissamut pilersaarummi naapertuussuseq aallaavigalugu akuersissummik ingerlatsinissamut atatillugu sillimaniarnermut piumasaaqatit qanoq

naammassineqassanersut nassuiarneqassaaq. Nassuiaat suliarineqartussaq siunnersuummi § 14-imi sillimaniarnermut pilersaarummut atatillugu suliaqarnertut isigineqassaaq, tassanilu assersuutigalugu naapertuutsillugu ingerlatsinissamut pilersaarummit sillimaniarnermut pilersaarummut innersuussisoqarsinnaavoq.

Tallimaattut ingerlatsinissamut pilersaarummi naapertuussuseq aallaavigalugu akuersissummik ingerlatsinissamut atatillugu pisinnaatitsissummik piginnittup suliasai suleriuusissaalu aalajangersimasut nassuiarneqassapput, tassanilu qulakkeerniarneqartoq tassaavoq pisinnaatitsissummik piginnittoq, pisinnaatitsissummik piginnittup sulisui, suleqatigisat, takornarissat inuillu allat ajoqusernissaminut navianartorsiunnginnissaat. Nassuiaat suliarineqartussaq siunnersuummi § 14-imi sillimaniarnermut pilersaarummut atatillugu suliaqarnertut isigineqassaaq, tassanilu assersuutigalugu naapertuutsillugu ingerlatsinissamut pilersaarummit sillimaniarnermut pilersaarummut innersuussisoqarsinnaavoq.

Arfernattut ingerlatsinissamut pilersaarummi pisinnaatitsissummik piginnittup pinngortitamut illersuinissamut, avatangiisinut illersuinissamut, aalisarnermut aamma pisiniarnermut aammalu sulinerneqataasimullu isumaqatigiissutaasunut pisussaaffinnut qanoq naammassinninniarnerneq nassuiarneqassaaq. Tassani ilaatigut pisinnaatitsissummik piginnittup piumasagaatinut pineqartunut naammassinninnissaminut qanoq ingerlatsiniarnerneq nassuiarneqarsinnaavoq.

Arfineq-aappaattut ingerlatsinissamut pilersaarummi pisinnaatitsissummik piginnittup akuersissuteqarnerup unitsinneqarnerata kingorna avatangiisinut qanoq aaqeeqqinniarnera nassuiarneqassaaq. Tassani ilaatigut akuersissuteqarneq aallaavigalugu ingerlatsinermi sunnerneqarsimasut pillugit pisinnaatitsissummik piginnittup aaqiissuteqarniarnera nassuiarneqarsinnaavoq. Unalu pingaaruteqarpoq suliarissallugu, takornarissanut neqeroorutaasimasoq avatangiisinut ajoqusiisimatillugu.

Imm. 3-mut

Pissutsit allanngorneri peqqutaallutik ingerlatsineq allanngussappat, imaluunniit illunik sanaartukkanilluunniit atuineq allanngussappat, taava pisinnaatitsissummik piginnittoq siunnersuummi matumani allassimasut malillugit ingerlatsinissamut pilersaarummik nutartikkamik Naalakkersuisunut akuerisassanngorlugu nassiussissaaq.

Siunnersuummi allassimasut malillugit allannguutit annikissimappata, taava ingerlatsinissamut pilersaarummik nutaamik nassiussisoqarnissaa piumasagaataanngilaq. Imaassinnaavoq anguniagassatut pilersaarutaasut imm. 2-mi nr. 1-imi allassimasut aaqqilaagassaasut, imaluunniit imm. 2-mi nr.2-mi allassimasut aallaavigalugit illunik atuineq allannguuteqartoq. Taamaakkaluartoq ingerlatsinissamut pilersaarummi allassimasut

sillimaniarnermut piumasaqaatit appariaateqassagaluarpata nutaamik pilersaarusiortoqartariaqartassaaq, taannalu akuerisassanngorlugu nassiunneqassaaq.

Pilersaarut nutaaq Naalakkersuisunut akuerisassanngorlugu piaartumik nassiunneqassaaq, allanngortoqarneraniillu qaammatit pingasut iluanni nassiunneqarsimassalluni. Naalakkersuisulli piffissaliussaq sivitsorsinnaavaat. Taamaattoqarsinnaavoq pisinnaatitsissummik piginnittoq Naalakkersuisunut oqaatigisimaguniuk nutaamik pilersaarusiortoqartariaqartoq, pilersaarummillu nutaamik suliaqarnissaaq eqqarsaatigalugu Naalakkersuisut isumaqarunik piffissaaq sivilunerusoq atorineqassasoq, imaluunniit Naalakkersuisuni suliap ingerlanneqarnissaa ima sivilutigissappat, ingerlatsinissamut pilersaarut allanngugaq piffissap killiliussap iluani naammassineqarsinnaani.

§ 18-mut

Imm. 1-mut

Aalajangersakkami pisinnaatitsissummik piginnittut takornarissanut neqerooruteqarsinnaanermut akuersissummut atatillugu ingerlatsisimaneq pillugu ukiumut Naalakkersuisunut nalunaaruteqartarnissaa aalajangersaaffigineqarpoq.

Pisinnaatitsissummik piginnittup nalunaaruteqartussaataitanerminut tulliuuttut nalunaarutigissavai:

- 1) Takornarissanut neqerooruteqarsinnaanermut akuersissut aallaavigalugu ingerlatat amerlassusaat,
- 2) Takornarissanut neqerooruteqarsinnaanermut akuersissut aallaavigalugu takornarissat sullinneqartut amerlassusaat,
- 3) Pisinnaatitsissummik piginnittup sulisuisa, tassunga ilanngullugit kalaallit, amerlassusaat,
- 4) Pilersuisunik, tassunga ilanngullugit kalaallit, atuineq,
- 5) Pisut siunnersuummi § 14-imi allassimasut aallaavigalugit sillimaniarnermut pilersaarummik allannguisariaqarnermut eqqarsalersitsisinnaasut, aammalu
- 6) Siunnersuummi § 17-imi allassimasut malillugit ingerlatsinermut pilersaarummi killiffiit

Imm. 2-mut

Siunnersuutigineqartumi Naalakkersuisut nalunaaruteqarneq pillugu sukumiinerusumik aalajangersaasinnaanerat aalajangersarneqarpoq. Malittarisassani ilaatigut nalunaaruteqarnermi paasissutissat suut ilanngunneqassanersut qanorlu akulikitsigisumik nalunaaruteqartoqartassanersooq allanneqarsinnaapput. Imaassinnaavoq akuersissutit aalajangersimasut pillugit kvartalikkaartumik nalunaaruteqartoqartassasoq, akuersissutillu

allat sukumiinerusumik nalunaarutigineqartassasut. Aalajangersaanermi assersuutigalugu qaqugukkut nalunaaruteqarnissaq killeqartinneqassanersoq aalajangersarneqarsinnaavoq.

Siunnersuutigineqartoq aallaavigalugu Naalakkersuisut nalunaarusiorsinnaapput, tassanilu akuersissutit assigiinngitsut qanoq nalunaarutigineqartarnissaat aalajangersaaffigineqarsinnaavoq. Assersuutigalugu heliskiingertitsisinaanermut akuersissummut aammalu illuaqqamut akuersissuteqarsimanermut nalunaarusioriaatsit assigiinngissinnaapput. Aalajangersagaq aallaavigalugu nalunaaruteqarnissamut piunasaqaatit suliarineqarnissaat tunngavilersorneqarpoq.

§ 19-mut

Imm. 1-mut

Sunnersuummi § 18-imi allassimasut aallaavigalugit nalunaaruteqarmit paasissutissat pissarsiarineqartut Naalakkersuisunit pisorta qarfinnut allanut Namminersorlutillu Oqartussat suliffeqarfiutaannut siammarterneqarsinnaanerit aalajangersaaffigineqarpoq.

Pisorta qarfinnut allanut Namminersorlutillu Oqartussat suliffeqarfiutaannut siammarterineq pissaaq akuersissummik pineqartumik suliaqarnermut atatillugu. Assersuutigalugu kommuneqarfiup iluani akuersissutinut atatillugu ingerlatsinerit pillugit kommunit oqaloqatigineqarsinnaapput.

Imm. 2-mut

Siunnersuutigineqartumi takornarissanut neqerooruteqarsinnaanerit akuersissutit aallaavigalugit naatsorsuutinik Naalakkersuisut saqqummiussisinaanerat aalajangersaaffigineqarpoq. Naatsorsuutinik tamanut saqqummiussisoqartillugu paasissutissat nipangiussisimasusaatitaanermut illersorneqarsimasut saqqummiunneqaqqusaanngillat.

§ 20 -mut

Imm. 1-mut

Aalajangiussassatut siunnersuutaasoq akuersissuteqarnermut atatillugu akitsuutinut akiliisarnissamut attuumassuteqarpoq. Takornarissanik inuussutissarsiorsinnaanerit sumiiffinni kisermaassilluni ingerlatsisinaanerup nunatta karsianut isertitsissutaanissaa akitsuusiinikkut qulakkeerneqassaaq.

Takornarissanut neqeroorsinnaanerit akuersissuteqarnikkut akitsuutinut akiliisusaatitaaneq aallartittarpoq, akiliinissamullu kingusinnerpaamik ulluliussaq tassaalluni ukioq akitsuutinut akiliiffiusussami decembarip naanera.

Imm. 2-mut

Takornarissanut neqeroorsinnaanermut akuersissuteqarnerup aallartinnerani akitsuummik akiliisussaataaneq aallartissasoq siunnersuutigineqarpoq.

Imm. 3-mut

Akitsuutitut akiliinissamut kingusinnerpaamik ukioq akitsuutitut akiliiffiusussami decembarip naanera ulluliuqarpoq.

*§ 21-mut***Imm. 1-mut**

Siunnersuummi akiliilluni aalisartitsisartunut akuersissutit akitsuutitaat akuersissutinullu allanut akitsuutit assigiinnginnissaat siunnersuutigineqarpoq. Taamannak aaqqiinermi peqqutaavoq, nunani allani, assingusunik neqerooruteqarfiusuni, akitsuutip inissisimaffia, taannalu assigalugu akitsuut inissinneqarpoq

Akiliilluni aalisartitsisinnaanermut akitsuummi tunngaviusumik aammalu ilassummik akitsuuteqarnissaa siunnersuutigineqarpoq.

Imm. 2-mut

Ukiumut tunngaviusumik akitsuut 2.500 kr.-iunissaa siunnersuutigineqarpoq.

Imm. 3-mut

Ilassutitut akitsuutit inummut ataatsimut ullormut 130 kr.-iunissaa siunnersuutigineqarpoq.

Imm. 4-mut

Inatsisartut inatsisaanni nr. 9 1. Juni 2017-imeersoq aallaavigalugu aningaasat annertussusaat ukiumut annertussuseq procentinngorlugu naleqqussaataasartussaq atorlugu aaqqiissuteqartoqartassaaq. Siunnersuummi § 18 imm. 4-mi allassimasut aallaavigalugit aaqqiissut siullesq 1. januaari 2026 pissaq.

*§ 22-mut***Imm. 1-mut**

Siunnersuummi akiliilluni aalisartitsisartunut akuersissutit akitsuutitaat akuersissutinullu allanut akitsuutit assigiinnginnissaat siunnersuutigineqarpoq. Taamannak aaqqiinermi peqqutaavoq, nunani allani, assingusunik neqerooruteqarfiusuni, akitsuutip inissisimaffia, taannalu assigalugu akitsuut inissinneqarpoq.

Akuersutitut allanut akitsuut, tassa § 21-mi akuersissutitut attuumassuteqanngitsunut, akitsuusiinissaq siunnersuummi matumani aalajangersaaffigineqarpoq. Akitsuutillu ukiumut 7.500 kr.-iunissaa siunnersuutigineqarpoq.

Imm. 2-mut

Inatsisartut inatsisaanni nr. 9 1. Juni 2017-imeersoq aallaavigalugu aningaasat annertussusaat ukiumut annertussuseq procentinngorlugu naleqqussaataasartussaq atorlugu aaqqiissuteqartoqartassaaq. Siunnersuummi § 18 imm. 4-mi allassimasut aallaavigalugit aaqqiissut siullesq 1. januaari 2026 pissaaq.

§ 23-mut

Imm. 1

Siunnersuummi pisinnaatitsissummik piginnittup suliap ingerlanneqarneranut allatigullu pisorta qarfinni sullissinermut atatillugu Naalakkersuisut akiitsuusiisinnaanerannut aalajangersaasinnaanermut pisinnaatitaaffiat tunngavilerneqarpoq.

Imm. 2

Siunnersuut aallaavigalugu aningaasartuutit akitsuutinngorlugit matussuserneqarsinnaapput, taamaaliortoqarsinnaavorlu akiliutaasussaq Naalakkersuisut sullissinerannut aningaasartuutaasut assigippassuk.

Siunnersuummi allassimasut aallaavigalugit akitsuut tassaavoq pisorta qarfiup pisorta qarfimmi sullissinerminut atatillugu aningaasartuutissatut naatsorsuutigisaa. Pisorta qarfinnut suliamik suliarinnittuusunut allatigulluunniit pisorta qarfinni suliaqarnermi, tassunga ilanngullugu nakkutilliineq, akuersissutit nalu naaruteqarneq akuersissuteqarnerlu, akiliineq akunnerit atornerqartut aallaavigalugit, akunnermut akiliut atorlugu akiliisoqartarsinnaavoq.

§ 24-mut

Imm. 1

Siunnersuummi Naalakkersuisut nakkutilliisussaatitaanerat aalajangersaaffigineqarpoq. Naalakkersuisut takornarissanut neqeroorutit, pisinnaatitsissummik piginnittunut, ingerlatanut allanullu inatsisartut inatsisaat una atorlugu ingerlanneqartunut nakkutilliisussaa voq.

Imm. 2

Nakkutilliinermut atatillugu Naalakkersuisut aalajangersaasinnaanerat siunnersuummi matumani aalajangersaaffigineqarpoq.

Aalajangersagaq tunngavigalugu ilaatigut Namminersorlutik Oqartussat kommunillu ataaniittut pisortaqaarfiit suliassaqaarfiillu nakkutilliineq pillugu sulianik ingerlatitseqqiiviusinnaapput. Tunngaviusumik Naalakkersuisut aalisarnerup piniarnerullu iluani nakkutilliinerup kommuninut ingerlateqqinneqarsinnaanera pillugu taamak aalajangersaasoqarpoq. Kommunitut ingerlatitseqqiinermi, kommuninut akuersissuteqaarfiusuni suliap suliarisinnaanissaa pineqarpoq.

§ 25-mut

Imm. 1

Siunnersuummi peqqussuteqarsinnaaneq aalajangersaaffigineqarpoq. Inatsisartut inatsisaanni allassimasunik, inatsisartut inatsisaanni matumani aalajangersakkanik imaluunniit akuersissutinut piumasaqaatinut naammassinninnginneq tunngavigalugu aalajangersakkanik piumasaqaatinilluunniit malinneqqusinnermut peqqussusiortoqarsinnaavoq.

Peqqussutit pisinnaatitsissummik piginnittumut allanullu inatsisartut inatsisaannut matumunnga attuumassusilinnut nalunaarutigineqassaaq.

Akuersissummik piginnittut assigisaallu peqqusummik nalunaarfigineqarsimasut, siunnersuut aallaavigalugu Naalakkersuisut killiliinerat malillugu pissutsinut inatsisartut inatsisaanni allassimasunik, inatsisartut inatsisaanni matumani aalajangersakkanik imaluunniit akuersissutinut piumasaqaatinut naammassineqarsimannigitsunut aaqqeeqquneqarsinnaapput.

Imm. 2

Naalakkersuisut akuersissummik piginnittunut peqqussuteqarnerat malillugu pisinnaatitsissummik piginnittoq aaqqiissuteqanngippat, takornarissanut neqeroorsinnaanermut akuersissummik utertitsinissamut aalajangiisinnaapput.

Akuersissummik utertitsisoqarnissaanut aalajangiiniarneq Naalakkersuisut naliliinerannit tunngaveqassaaq, tassanilu unioqqutitsisoqarnerani peqqussutip annertussusaa isiginiarneqassaaq. Siunnersuummi § 7-mi imm. 1-imi allassimasut aallaavigalugit nalilersuinissamut ataatsimiititaliaq pilersinneqarsimappat, taava ataatsimiititaliaq inassuteqaasiornissamik noqqaaffigineqarsinnaavoq.

Siunnersuut una tunngavigalugu Naalakkersuisut takornarissanut neqerooruteqarsinnaanermut akuersissummik utertitsisinnaapput, takornariaqarnermik suliaqartup peqqussut arlaleriarluni tusaanngitsuusaarsimappagu. Utertitsineq nalinginnaasumik pisortat ingerlatsineranni suliassat suliarineqartarneranni atorneqartut malillugit pissaaq.

Imm. 3

Takornariaqarnermut akuersissutinik utertitsisarneq pillugu Naalakkersuisut aalajangersaasinnaanerat siunnersuummi pineqarpoq. Pisuni aalajangersimasuni utertitsisoqartarnissaa, imaluunniit suleriaaseq pillugu malittarisassat, utertitsinermullu atatillugu atugassarititaasut aalajangersakkami ilanngunneqarsinnaapput.

§ 26-mut

Imm. 1

Pisinnaatitsissummik piginnittup piffissap akuersissuteqarfiusup naanerata kingorna pisinnaatitaaffeqarnissaanut Naalakkersuisut aalajangersaasinnaanerat uani aalajangersaaffigineqarpoq.

Aalajangersagaq aallaavigalugu pisinnaatitsissummik piginnittup piffissaq akuersissuteqarfiusup naanerani pisussaaffii suut ataannassanersut suullu pisussaaffigilerumaarnerai Naalakkersusiut aalajangersaaffigisinnaavaat.

Aalajangersaanermittaaq pisinnaatitaaffimmik piginnittup akuersissuteqarneq malillugu ingerlatsiunnaaruni, illunik, sanaartukkanik assigiinngitsunillu pisinnaatitaaffimmik piginnittup suliarisimasaanik kiisalu sumiiffinni pineqartuni ikkussuussimasaanik peersinissamut attuumassusilinnik aalajangersaasoqarsinnaanera allanneqarpoq. Aalajangersakkani sumiiffik akuersissuteqarfiusoq akuersissutip atorunnaarnerata kingorna utertinneqassanersoq aamma aalajangersaaffigineqarsinnaavoq.

Pisinnaatitsissummik piginnittumut pisussaaffeqarsinnaavoq, tassanilu ilaatigut sumiiffimmi pineqartumi avatangiisit uterteqqinneqarnissaannut attuumassutilinnik iliuseqaqqusisoqarsinnaavoq, tamannalu pisinnaavoq assersuutigalugu sumiiffik takornarissanut neqeroorteqarsinnaanermut akuersissuteqartoqarnerata nalaani ajoqusersimappat.

Kiisalu pisinnaatitsissummik piginnittup naggasiutigalugu Naalakkersuisunut nalunaaruteqartussaataitaneramik pisussaaffiliinermik aalajangersaasoqarsinnaavoq.

Imm. 2

Aalajangersakkami ingerlatsinissamut pilersaarummut imaluunniit ingerlatsinissamut pilersaarummi allannguinermi Naalakkersuisut akuersissuteqarnerminnut atatillugu § 17-imi allassimasut malillugit imm. 1-imi piunasaqaataasunut naammassinninnissamut pisinnaatitsissummik piginnittumut aalajangersaasinnaapput, tassunga ilanngullugu sillimmateqarnissaq.

Allanngortoqartillugu Naalakkersuisut piumasqaatinik allaanerusunik aalajangersaasinnaapput, sillimateqarnissamut attuumassusillit ilanngullugu.

Aalajangersimasumik sillimateqarnissamut assersuutigalugu ingerlatap annertussusaa, pisariussusaa, navianaataa assigisaallu aallaavigalugit inissinneqassaaq.

Imm. 3

Siunnersuummi pisinnaatitsissummik piginnittup Naalakkersuisut peqqussuteqarnerannik naammassinninnani, Naalakkersuisut pisinnaatitsissummik piginnittup akiligassaannik sumiiffimmi saliisitsisinnaanannerannik assigisaannillu aalajangersarneqarpoq.

Taamaaliortoqassagaluarpalli § 25 imm. 1-imi allassimasut malillugit pisinnaatitsissummik piginnittoq saliinissamut peqquneqaqqaarsimassaaq.

§ 27-mut

Imm. 1

Siunnersuummi pisut Kalaallit Nunaanni pinerluttulerinermi inatsimmi malittarisassat malillugit akiligassiissutaasinnaanersut aalajangersarneqarsimapput

Aalajangersakkami ima iliortoq akiligassinneqarsinnaavoq:

1) Akuersissummik atuuttumik pigisaqarani takornarissanut akiliisitsilluni neqerooruteqarnikkut § 4, Imm. 1-mi allassimasunik unioqqutitsisoq.

Takornarissanut neqerooruteqarsinnaanermut akuersissut aallaavigalugu ingerlatsissagaanni, pisinnaatitsissummik piginnittoq atuuttumik akuersissummik peqarnissaa piumasqaataavoq. Aalajangersakkami inatsisartut inatsisaanni siunertat atuuffiilu qulakkeerniarneqarput.

2) Pisortaqarfinnut eqqunngitsunik paasissutissiinikkut imaluunniit pututitsiniuteqarnikkut § 6 imm. 1-imi allassimasunik unioqqutitsisoq.

Takornarissanut neqerooruteqarnissamut akuersissummik qinnuteqaatinik suliaqarnissamut ammalu siunnersuummi matumani allassimasunut nakkutilliinissamut paasissutissat eqqortumik tunniunneqarnissaasa pisariaqartinneqarnera tunngavigalugu aalajangersagaq una ikkunneqarsimavoq.

3) Takornarissanut neqerooruteqarsinnaanermut akuersissut malillugu suliarineqartut pillugit nalunaaruteqartussaataaerermut atuutsitsinnginnikkut § 18 imm. 1-imi allassimasunik unioqqutitsisoq.

Imm. 2

Siunnersuummi Inatsisartut inatsisaat aallaavigalugit maleruagassiani, pineqaatissiissutitut akiligassiisoqarsinnaanera aalajangersaaffigineqarpoq.

Maleruagassat § 3-mi, § 4, Imm. 5-imi, § 6, Imm. 2-mi, § 15, Imm. 3-mi, § 16 aamma § 18, Imm. 2-mi allassimasut pineqarput.

Imm. 3

Siunnersuummi Inatsisartut inatsisaanni maleruagassaniluunniit inatsisartut inatsisaat tunngavigalugu suliarineqarsimasuni akiliisitsiniarnermi akiligassaq inatsisitigut inunnet Kalaallit Nunaanni pinerluttulerinermi inatsimmi atuuttumi malittarisassat malillugit akiligassiissutigineqarsinnaasoq aalajangersarneqarpoq.

Imm. 4

Inatsisartut inatsisaat aallaavigalugu akiligassiinermut tunngatillugu siunnersuummi allanneqarsimavoq akiligassat tunniunneqartut nunatta karsianut nakkartinneqassasut.

Imm. 5

Siunnersuummi aallaavigalugu Imm. 5. 4, Imm. 1-mik, § 6, Imm. 1-mik, § 18, Imm. 1-mik imaluunniit § 3-mi, § 4, Imm. 5-imi, § 6, Imm. 2-mi, § 15, Imm. 3-mi, § 16 aamma § 18, Imm. 2-mi allassimasut malillugit aalajangersakkanik unioqqutitsisut Kalaallit Nunaanni pinerluttulerinermi inatsimmi atuuttumi malittarisassat malillugit arsaarinnissuteqartoqarsinnaavoq.

§ 28-mut

Imm. 1

Siunnersuummi allassimasut aallaavigalugit Inatsisartut inatsisaat 1. januaari 2025 atortuulersinneqassaaq.

Imm. 2

Siunnersuutigineqarpoq Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat atorunnaarsinneqassasoq.

Imm. 3

Siunnersuutigineqarpoq Inatsisartut inatsisaata atortuulerfiani takornarialerisunut akuersissutit nalunaarutigineqartut atuutiinnassasut. Akuersissutit pineqartut Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaanni aalajangersakkat malillugit aalajangersarneqassapput.

Imm. 4

Siunnersuutigineqarpoq Inatsisartut inatsisaanni § 21 imm. 4-mi aammalu § 22 imm. 2-mi allassimasut aallaavigalugit aningaasat annertussusaat ukiumut annertussuseq procentinngorlugu naleqqussaataasartussa q atorlugu aaqqiissuteqartoqartassasoq. Tamannalu siullermik pissaaq 1. januaari 2026.

Ilannugsaq 1**Tusarniaanermiit allakkiaq**

Siunnersuut tusarniaassutigineqarsimavoq piffissami 29. april 2024 -imiit 28. maj 2024 -imut, Naalakkersuisut tusarniaanernut qoppersagaanni tamanut saqqummiunneqarluni, nassiunneqarlunilu tusarniaavigineqartartunut tulliuttunut:

Naalakkersuisut Siulittaasuata Naalakkersuisoqarfia
Ineqarnermut Attaveqaasersuutinullu Naalakkersuisoqarfik
Aningaasaqarnermut Akileraartarnermullu Naalakkersuisoqarfik
Aalisarnermut Piniarnermullu Naalakkersuisoqarfik
Isumaginninnermut, Ilaqutariinnut, Suliffeqarnermut Nunamullu Namminermt
Naalakkersuisoqarfik
Ilinniartitaanermut, Kultureqarnermut, Timersornermut Ilageeqarnermullu
Naalakkersuisoqarfik
Naalagaaffinngornissamut Nunanullu Allanut Naalakkersuisoqarfik
Nunalerinnermut, Imminut Pilersornermut, Nukissiuuteqarnermut Avatangiisinullu
Naalakkersuisoqarfik
Meeqqanut Inuusuttunullu Naalakkersuisoqarfik
Peqqissutsimut Naalakkersuisoqarfik
Avannaata Kommunia
Qeqqata Kommunia
Qeqertalik Kommunia
Kommuneqarfik Sermersooq
Kommune Kujalleq
Sulisitsisut
Sulinermit Inuusutissarsiuteqartut Kattuffiat (SIK)
Akademikernes Sammenslutning i Grønland (ASG)
Lærernes Fagforening i Grønland (IMAK)
Nunatsinni Perorsaasut Kattuffiat (NPK)
Peqqinnissaq Pillugu Kattuffiit (PPK)
Kalaallit Nunaanni Aalisartut Piniartullu Kattuffiat (KNAPK)
Avannaani Inuusutissarsiortut
Qeqertalik Business Council
Arctic Circle Business
Sermersooq Business
Innovation South Greenland
Kommunini Pilersaarusiornernut Oqartussat
Explore North Greenland

Destination Arctic Circle
Sermersooq Business
Innovation South Greenland
Destination Diskobay
Eastgreenland.com
Visit Greenland
Nalik Ventures
Air Greenland
Eqqartuussissuserisut Nuna advokater
Eqqartuussissuserisoq Arctic Law
Eqqartuussissuserisut Malling & Hansen Damm
Eqqartuussissuserisoq Meinel
Eqqartuussissuserisoq Gedion Jeremiassen
Eqqartuussissuserisut Inuit Law
Eqqartuussissuserisoq Naja Joelsen
Eqqartuussissuserisoq Aviâja Helms
Eqqartuussissuserisoq Marie Louise Frederiksen
Kukkunersuisut Grønlands Revision
Kukkunersuisut Deloitte
EY
BDO
Air Greenland
Grønlandsbanken
Banknordik

Tamatuma saniatigut tusarniaassutaasut immikkut nassiunneqarputtaa takornariartitsinermi akuersissuteqarfiusunut atuuttunut.

Tusarniaanermi akissutinik tusarniaavigineqartunit ukunannga tunniussisoqarpoq: Sulisitsisut, Qeqqata Kommunia, Kommuneqarfik Sermersuumi Inuussutissarsiornermut immikkoortortaqarfik, Lings Hunting Greenland ApS, Arctic Circle Business, KNAPK, NPK, SIK, Visit Greenland, Nomad Greenland, Aningaasaqarnermut Akileraartarnermullu Naalakkersuisoqarfik, Erik Lomholt-Bek, Grønlandsbanken, Ineqarnermut Attaveqaasersuutinullu Naalakkersuisoqarfik, Kommune Kujalleq aamma Avannaata Kommunia.

1. Sulisitsisut allapput:

- 1.1 Tusarniaaffigineqartup siunnersuummi § 20 [maanna § 13] -mi aktiaatit imaluunniit piginneqataassutit 2/3 -iisa inunnit ataasiakkaanit maanna najugaqartunit piginneqarnissaanut piumasqaat, sumiiffinni akuersissuteqarluni

takornariartitsiffiusartussat iluini ineriartortinnissaanut annertuumik killersuisutut oqaatigaa. Tusarniaaffigineqartup oqaatigaa ineriartornissamut killilersuilluni aqutseriaatsit taamaattut aningaasaqarnikkut imminut napatilernissamut ajoqusiiisuusut.

Tusarniaaffigineqartup oqaatigaa siunnersuut pissutsillu allat, soorlu maanna akerleriit suliassanngortitsisarfianni voldgift-imi suliaq ingerlanneqartoq, aatsitassanut inatsimmi allannguutit, annikitsunik ujarlersinnaanernut inatsit nutaaq aamma aalisarnernut inatsit aningaasalersuisinnaasut unammillertartumik inissisimalernerannik kinguneqartut, tamannalu aamma nunatsinni ingerlatseqatigiiffiusunut takornariartitsinermik ingerlatsisunut, niuertarfeqarnermi inuussutissarsiutinullu allanut sunniuteqarpoq, taakkuami suliniutinik aningaasaliiffiusussanillu taamaatitsiinnarsimapput.

Taamaattumik tusarniaaffigineqartup , siunnersuutimmi aalajangersagaq pineqartoq peerneqarnissaa siunnersuutigaa. Tamatumunngalu ilaliullugu oqaatigalugu aalajangersakkami suna siunertaanersoq ersernerluttoq, taamaattumik aaqqiissutaasussanik siunnersuuteqarnissaq ajornakusoortoq.

Tusarniaaffigineqartuttaaq oqaatigaat aalajangersagaq aallaavigalugu sumiiffinni ingerlatsisut iluaquserneqanngitsut, tassami takornarissanut suleriuseqarneq aningaasarsiornissamullu periarfissat malunnaatilimmik killilersorneqassammata.

- 1.2 Paasissutissanik avitseqatigiittarneq pillugu aalajangersakkamut tunngatillugu, § 26 [maanna § 19]-mi allassimasut, tusarniaaffigineqartup aalajangersagaq annikillineqassasoq avitsisoqarnissaanik pisariaqartitsiviusunut siunnersuutigaa. Tusarniaavigineqartut Namminersorlutik Oqartussat suliffeqarfiutaannut paasissutissanik avitseqateqartarnissaannut fagligimik tunngavissamik takusaqarsinnaanngillat. Namminersorlutik Oqartussat suliffeqarfiutaannut inuussutissarsiornermi periarfissanik paasissutissiisoqartarnissaa tusarniaaffigineqartup ernummatigaa. Tusarniaavigineqartuttaaq pisorta qarfiit unammillersinnaanerannut ernummateqarput, taamaaliortoqassappallu nunaqavissut nunallu avataaneersut aningaasaliisinnaanissaat annikinnerulissaaq.
- 1.3 Qularnaveeqqusiiisarnermut atatillugu aalajangersakkamut, § 27, imm. 2 [maanna § 26, imm. 2], tusarniaaffigineqartup allassimasoq tulliuuttoq allassimanerarpaa: “allannguinnermi Naalackersuisut akuersissuteqarnerminnut atatillugu ... piumasqaataasunut naammassinninnissamut pisinnaatitsissummik piginnittumut aalajangersaasinnaapput, tassunga ilanngullugu sillimmateqarnissaq.” Tusarniaaffigineqartup oqaatigaa oqaaseqaatini allassimasoq allannguutit alliliinerillu illunut sanaartukkanullu attuumassuteqartut. Tusarniaaffigineqartup

oqaatigaa tamanna isigineqartoq inatsimmut oqaaseqaatitsigut inatsisiliornerut, aammalu aalajangersagaq ersarluttoq.

Naalakkersuisoqarfiup suliame oqartussaasup oqaaseqaatai:

1.1. -imut

Aalajangersagassatut siunnersuutaasut inatsisinit atuuttunit aallaaveqarpoq. Massakkut piumasaqaatini inuit allattorsimaffianni nalunaarsorsimanissaq ukiuni 2 -ni nalunaarsorsimanissaq piumasaqaataavoq, siunnersuutigineqartorlu piumasaqaataangilaq nutaaq, piumasaqaataasunilli atuutereersunik sukatsineq.

Naalakkersuisut sukatsinissamik siunnersuuteqarnerannut peqqutaavoq, sumiiffinni innuttaasut iluaqutissaannik takornariartitsinermik inuussutissarsiummi ineriartortitsinissamik qulakkeerinninniarnaq.

Naalakkersuisut tusarniaanermi akissuteqaatit aallaavigalugit aalajangersakkami nalimmassaapput, massakkullu aktiaatileqatigiiffimmi piginneqatigiiffimiluunniit aningaasaatinik piginnittut 2/3 Kalaallit Nunaanni najugaqartariaarutsillugit, maanna piginnittuusut "affai sinnerlugit" Kalaallit Nunaanni najugaqartariaqalerput.

1.2. -mut

Paasissutissanik avitseqatigiittarnissamik pisariaqartitsineq taamaallaat akuersissummut atatillugu sulianik ingerlatsisoqartarneranut tunngassuteqarpoq. Assersuutigalugu qinnuteqartoqarnera aallaavigalugu Naalakkersuisut oqaloqatiginissinnaapput pilersaarutaasup nalaani uumasooqassuseq assigisaallu qanoq inissisimanersut. Aalajangersagaq aallaavigalugu paasissutissat Namminersorlutik Oqartussat suliffeqarfiutaannut niuerfiup iluani unammillerusussusilinnut ingerlateqqinneqarsinnaangillat.

1.3. -mut

Sillimasiinermut tunngatillugu allannguisinnaanermut piumasaqaat pisinnaatitsissummik piginnittup akuersissuteqarnermut atatillugu allanngortikkusutaanut attuumassuteqarpoq. Aalajangersakkami suna pineqarnersoq oqaaseqaatini ersarissarniarneqarsimavoq.

2. Visit Greenland allappoq:

- 2.1 Tusarniaaffigineqartup aalajangersakkatut siunnersuutaasumut ataatsimut isigisummik tapersiinertik oqaatigaa.
- 2.2 Tusarniaaffigineqartup akuersissummik allaffissornikkut ingerlatsinermi ilinniagaqarnissap aamma piginnaasanik ineriartortitsinissap pingaarutai, akuersaarpai. Taamaattumik tusarniaaffigineqartup siunnersuutigaa akuersissut

aallaavigalugu ingerlatsinissamut pikkorissarsimanissaq akuersissummik tunniussisoqarnissaanut piumasagaataassasoq.

- 2.3 Tusarniaaffigineqartup nalilersuisarnernut ataatsimiititaliat aqutugalugit kommunit aalajangersarneqartartunut sunniuteqarnerulernissamik periarfissaqalernissaat nersualaarpaa. Taamaakkaluartoq § 5 -imi [maanna § 7] oqaatigineqartut ernummatigineqarput. Tusarniaaffigineqartup siunnersuutigaa tamatigut nalilersuisarnermik ataatsimiititaliamik pilersitsisoqartarnissaa, taamaaliornikkut kommunini assigiissaartumik ersarissumillu ingerlatsisoqassagaluarpoo. Taamaattumik tusarniaaffigineqartup siunnersuutigaa pilersitsinissaq periarfissaannaani ingerlanneqartartussanngortinneqarnissaa.
- 2.4 Tusarniaaffigineqartup neqeroortitsiffioreersup iluani nutaamik neqeroortitseqqeqqaanngikkaluarluni sumiiffimmut akuersissuteqarnissamut, qinnuteqaat kingusinnerpaamik neqeroortitsinerup naaneranit qaammatit 18-it tikitsinnagu tigusimagaanni akuersissummik tunniussisoqarsinnaanera pillugu aalajangersagaq ilalerpaat.
- 2.5 Tusarniaaffigineqartup oqaatigaa inuit Kalaallit Nunaanni inuit allattorsimaffianni nalunaarsorsimanngitsut akuersissummi aalajangersakkat naapertorlugit ingerlatsisinnaannginnerannut aalajangersaasoqarnikkut, sumiiffimmi aningaasatigut ineriartortitsinissaq piujuartitsinissarlu qulakkeernissaanut pisariaqartuusooq.
- 2.6 Tusarniaaffigineqartup oqaatigaa avatangiisinik illersuinissamut pisussaaffiit eqqortinneqarnissaannut § 13, imm. 5, aamma § 24, imm. 6 aamma imm. 7 -imi pineqartut [pisinnaatitsissummik piginnittup saliisariaqarneranut pisussaaffii maanna § 17, imm. 2, nr 6 aamma 7-mi aalajangersarsimalerput] pingaaruteqartuusut. Tusarniaaffigineqartup siunnersuutigaa avatangiisinut tunngatillugu pitsaassutsit naapertuuttut aammalu aalajangersakkap atuutsinneqarnissaanut qanoq nakkutiginnittoqassanersoq aalajangersaasoqassasoq. Tassunga ilanngullugu pisorta qarfiit kikkut nakkutilliinermut akisussaasuussanersut.
- 2.7 Tusarniaaffigineqartup piffissap akuersissuteqarfiusup ukiut 10 -it angullugit sivissusilimmut tunniunneqarsinnaanissaa, kiisalu ukiunut 20 -inut sivitsuisinnaanermut periarfissaqartitsisoqarnera taperserpaa. Tusarniaaffigineqartup piffissaliussap ataatsimut ukiunut 30 -inut inissinneqarsinnaanera ersarissunik sinaakkusiinerarlugulu akuersissutinik ingerlatsinermi ataqatigiissitsisoqarnera oqaatigaa.

- 2.8 Tusarniaaffigineqartup oqaatigaa piginnittuunermi allannguutissatut siunnersuutaasut najukkani namminerni nakkutilliinermik aningaasarsiornerullu imminut napatissinnaanermik nukittorsaasinnaasut, ilutigisaanillu nunanit allaneersunut ingerlatsisunut imaluunniit aningaasalersuisunut ingerlatseqatigiiffinnut ingerlanerlioreersunut unammillernermik pilersitsilluni.
- 2.9 Tusarniaaffigineqartup kalaallinik atorfinitsitsisarnissamut sulisitsinissamullu tunngatillugu pisussaaffimmut atatillugu oqaatigaa piumasaqaatini kalaallit sulisussat kikkuuneri ersarissarneqarnissaat amigaataasooq. Tusarniaaffigineqartup inuit allattorsimaffiat aallaavigineqassasooq siunnersuutigaa.
- 2.10 Sillimmasiisarnermut aamma qularnaveeqqusiisarnermut atatillugu pisinnaatitaaffimmik piginnittup peqqinnissaqarfimmut isumaqatigiissusiortarnissaanut tunngassuteqartut, takornarissanut peqqissutsitigut sullissinissanut, annaassiniaanissanut attuumasuuteqartut pillugit aningaasartuutissanullu sillimmaserneqartariaqarneq pillugit oqaaseqaateqartup oqaatigaa, taamaaliorneq pinartoqartillugu assigiissaakkamik suleriuseqarnissamik qulakkeerinnittoq.
- 2.11 Tusarniaaffigineqartup oqaatigaa piffissamut ikaarsaariarfiusumut aalajangersakkat eqaatsumik ikaarsaartoqarnissaa qulakkeeraat.

Naalakkersuisoqarfip sulianut oqartussaasup oqaaseqaatai:

2.1. -imut

Oqaaseqaateqarnissamut pissutissaqartitsinngillat.

2.2. -mut

Naalakkersuisut tusarniaaffigineqartup isummersuutaat isumaqatigaat pissusissamisuussamat ingerlatsinerit ilaanni naleqquttuusassasooq tigussaasumik ilinniakkatigut piginnaaneqarnissaaq. Akuersissutilli assigiinngiiaartuupput, taamaattumillu Naalakkersuisut naleqquttuutinngilaat piumasaqaatinik pineqartutut nalunaarsuinissaaq.

2.3. -mut

Kommunit tamarmiullutik kissaatiginngilaat sumiiffimmini akuersissuteqarfiusartunik peqarnissaa. Tamannalu siunnersuut pillugu kommuninit tusarniaanermi akissuteqaataanni aamma takuneqarsinnaavoq. Taamaattumik aalajangersaanermi tamanna pisinnaavoq allassimavoq. Sumiiffinni akuersissuteqarluni ingerlatsiviusussani, suliap ingerlannissaannut nalilersuisartunik ataatsimiititaliamik pilersitsisoqartarsinnaanissaa suleriusaassaaq.

2.4. -mut

Oqaaseqarfiginissaanut pissutissaqanngilaq.

2.5. -imut

Oqaaseqarfiginissaanut pissutissaqanngilaq.

2.6 -imut

Avatangiisinut tunngatillugu nakkutilliinermi pineqartut tassaapput pisinnaatitsissummik piginnittup akuersissutip atorunnaarnerani piumasaqaatinik naammassinninnissaa. Naalakkersuisut imaluunniit § 34, imm., 3 naapertorlugu oqartussat allat kommunilluunniit nakkutilliinissamik suliaassinneqarsimasut, nakkutilliinissamut akisussaasuupput.

Akuersissuteqareernerup kingorna pisinnaatitsissummik piginnittup pisussaaffiinik nakkutilliineq tunngavigalugu pinngortitamut avatangiisinullu mingutsitsinninnissamut nakkutilliineq sunnerneqarnaviannngilaq. Taakkunungami attuumassusillit avatangiisinut pinngortitamullu inatsit aallaavigalugu aalajangersarneqarput.

2.7. - imut

Oqaaseqarnissamut pissutissaqartitsinnngilaq.

2.8. -mut

Ilassutitut oqaaseqarnissamut pissutissaqartitsinnngilaq. Taamaattoq 1.1. -imut oqaaseqaatigineqartut takukkit.

2.9. -mut

Ersarissummik suussusilersuineramik nassuiaatini § 2, imm. 6 -imi ersippoq "kalaallit sulisut" paasineqassasut tassaasutut sulineramik inuusutissarsiteqartut Kalallit Nunaanni inuit allattorsimaffianni nalunaarsorsimasut. Nalorninartut pillugit aalajangersakkamut § 16 -imut innersuussisoqarpoq.

2.10. -mut

Oqaaseqarnissamut pissutissaqartitsinnngilaq.

2.11. -mut

Oqaaseqarnissamut pissutissaqartitsinnngilaq.

3. SIK allappoq:

- 3.1 Tusarniaaffigineqartup inuit takornariartitsinermi suliffeqartut, aamma nioqquteqartartut takornariartitsinermik ingerlatsivinnut Kalaallit Nunaanni inuit

allattorsimaffianni nalunaarsorsimassasut tamakkiisumillu Kalaallit Nunaannut akileraartussaataasussaannerat tamakkiisumik taperserpaa.

- 3.2 Tusarniaaffigineqartup inuit Kalaallit Nunaanni inuit allattorsimaffianni allattorsimanngitsut, sumiiffimmi akuersissuteqarfiulluni ingerlatsiffiusumi, ingerlataareersut assinginik ingerlatseqqusaannginnerat tapersersorpaa.
- 3.3 Nalilersuinermut ataatsimiititalianik pilersitsinissamut atatillugu tusarniaaffigineqartup oqaatigaa pilersitsineq kommunimut immikkut aningaasartuutaassanngitsaq.
- 3.4 Tusarniaaffigineqartup akuersissuteqarfiusoq tallimanik sivitsorneqassasoq taperserpaa. Tusarniaaffigineqartup aamma taperserpaa akuersissut ukiut 30 -t qaangiunneranni nutaamik neqeroorutigineqartassasoq.
- 3.5 Tusarniaaffigineqartup taperserpaa inuit takornariatitsinermik inuusutissarsiutini suliffeqartut inuit allattorsimaffianni nalunaarsorsimanissaat, kiisalu tamakkiisumik Kalaallit Nunaannut akileraartussaataasasut, taamaakkaluartoq ernummatigaat kalaallit siunissaq ungasinnerusoq eqqarsaatigissagaanni takornariatitsinermik ingerlatsinissaminut aningaasaliisinnaassuseqassanersut, malittarisassatigullu avataaneersut aningaasaliisarannut killilersuisoqarnissaa. Tusarniaaffigineqartup oqaatigaa kalaallit takornariatitsinermik ineriartortitsinerannut nunanit allanit aningaasaliissutit pingaaruteqartut.

Naalackersuisoqarfiup sulianut oqartussaasup oqaaseqaatai:

3.1. -imut

Oqaaseqarnissamut pissutissaqartitsinngilaq.

3.2. -mut

Oqaaseqarnissamut pissutissaqartitsinngilaq.

3.3. -mut

Nalilersuisartunik ataatsimiititalianik pilersitsinerit kommuninut aningaasartuutaanissaat imaluunniit allaffissornerup annertunerulernissaa naatsorsuutaanngilaq. Nalilersuisartunik ataatsimiititanik pilersitsineq tassaaginnarpoq kommunit akuersissutinik tunniussisarnermi qitiusumik inissisimanerat.

3.4. -mut

Oqaaseqarnissamut pissutissaqartitsinngilaq.

3.5 -imut

Pissutissaqartitsisimangilaq annersunik oqaaseqarnissanut. Taamaattoq takukkit 1.1. -imut oqaaseqaatigineqartut.

4. Nunatsinni Perorsaasut Kattuffiat (NPK) allappoq:

- 4.1 Tusarniaavigineqartoq sulianik ingerlatsinermut atatillugu kommuninik peqataatitsinerunissamut isumaqataavoq.
- 4.2 Tusarniaaffigineqartup aamma ilalerpaa aalajangersakkamik ilanngussisoqarnera inuit Kalaallit Nunaanni inuit allattorsimaffianni nalunaarsorsimangitsut akuersissuteqarfiusuni sumiiffinni ingerlatsisinnaannginnerinut attuumassusilimmik.
- 4.3 Tusarniaavigineqartuttaaq sumiiffimmi takornariartitsisinnaanermut pisinnaatitsissummik piginnittoq Kalaallit Nunaanni najugaqarnissaa tamakkiisumillu akileraartartuunissaa isumaqatigaa.

Naalackersuisoqarfiup sulianut oqartussaasup oqaaseqaatai:

4.1. -imut

Oqaaseqarnissamut pissutissaqartitsinngilaq.

4.2 -mut

Oqaaseqarnissamut pissutissaqartitsinngilaq.

4.3. -mut

Oqaaseqarnissamut pissutissaqartitsinngilaq.

5. KNAPK allappoq:

- 5.1 KNAPK siunnersuummut namminermut oqaaseqaatissaqanngilaq, kisiannili siusinnerusukkut allagaasimasut uteqqinneqarput. Allakkani erseqqissarneqarpoq piniartut pisinnaatitaanerat piniarsinnaanermut tammajuitsussarsiniartunik piniartitsiviusartuni, tammajuitsussarsiniartunillu piniartitsisartut inuussutissarsiutigalugu piniartutut allagartaqarsinnaanatik taakkuami takornariartitsineq inuussutissarsiutigamikku. Tusarniaaffigineqartup oqaatigaa tammajuitsussarsiniarlutik piniariartartut killeqanngiusattumik piniarsinnaasartut. Tusarniaaffigineqartup kissaatit nalunaarutigaa tammajuitsussarsiniartunik piniariartitsisartut nalunaartassasut qaqugukku sumiiffiup akuersissuteqarfiusup atornissaanik, ataatsimiittoqartassasorlu tammajuitsussarsiniartitsisartut aamma piniartut akornanni paaseqatigiikkumalluni kiisalu suleqatigiikkumalluni inatsimmi piumasqaataasut naammassiumallugit.

Naalakkersuisoqarfiup sulianut oqartussaasup oqaaseqaatai:

5.1. -imut

Allanguuteqartoqarnissaanut pissutissaqartitsinngilaq. Taamaattoq Naalakkersuisoqarfiup sumiiffinni aalajangersimasuni takornariartitsinermut akuersissutinik suliaqaqqinnissamut tusarniaaffigineqartup oqaaseqaatigisai nalunaarsorpai.

6. Oeqqata Kommunia allappoq:

- 6.1 Tusarniaaffigineqartup takornariartitsinermut akuersissuteqartarnermi akisussaaffiup tamarmiusup kommuninut nuunneqarnissaa pissusissamisoornerussasoq oqaatigaa, maannakkutut inatsimmi atuuttumi akisussaaffiup avinneqartarnera atorunnaarsillugu.
- 6.2 Taamaakkaluartoq tusarniaaffigineqartup kommunit nalilersuisarnermut ataatsimiititaliat aqqutigalugit annerusumik peqataanissaat, kommuninut sulianik ingerlatitseqqiisinnaaneq kiisalu nalunaaruteqartoqarnerani kommunit peqataaninneqarnissaat.
- 6.3 Nunamut ammasumut, tunngaviusumik 2011-imi kommuninut nuunneqareersunut tunngatillugu Kommunip pisortat pilersaarusiortarneranni annertunerpaamik akisussaaffik kommunimiissasoq kissaatigaa. Tusarniaaffigineqartup tamatumunnga atatillugu siunertamut naapertuussasoraa pilersaarusiortarnermut inatsisip aamma takornariartitsinermi akuersissuteqartarnermut inatsisip imminnut naapertuunnerusumik aqqiissuussaanissaat.
- 6.4 Tusarniaaffigineqartup takornariartitsinermut atatillugu inatsisiliat nunatsinni innuttaasunik salliutitsinissaat isumaqatigaa, makkununga atasuni:
 - Suliffeqarnermi kalaallit sulisussat atorneqarneri,
 - Kalaallinut sulisartunut ilinniarfissat ilinniaqqiffissallu,
 - Namminersorlutik Oqartussat tapiissutaannik agguaassineq
 - Akuersissutinik tunniussisarneq.
- 6.5 Tusarniaavigineqartulli malittarisassat § 20, imm. 2 -mi aamma 3 -miittut. (Imarisaa aallaavigalugu tusarniaaffigineqartup § 20, imm. 1 nr. 2 aamma 3 tusarniaassutigineqartumi pigunarpai. Taanna maanna tassaavoq § 13, imm. 1 nr. 2 aamma 3.] allassimasut isumaqatiginngilaat. Tusarniaaffigineqartup oqaatigaa kommuni Kalaallit Nunaallu aningaasaliissutinik ilisimasanillu takornariartitsinermut ineriartuutaasussanik pisariaqartitsisoq. Kommunittaaq oqaatigaa takornariartitsinermut aningaasaliissutissanik salliussinerup soorlu erngup nukinganik nukissiornermut aatsitassarsiornermullu kiisalu kommunimut Kalaallit Nunaannullu aningaasaleerusussutsimut tunuarsimaartitsilissasoq.

- 6.6 Akuersissutip atorunnaarsinneqarnerata kingorna sanaartukkanik illuutinillu paaasarnissamut aalajangersakkamut tunngatillugu tusarniaavigineqartoq isumaqarpoq aalajangersagaq kommunimi akuersissutaasut eqqarsaatigalugit pisariaqartinneqanngitsoq. Aningaasaliisartut sanaartukkanut aningaasaliinerat takornariaqarnerup iluani suliffissaqartitsiinnarsinnaasut kommunip naqissuserpaa. Sanaartukkanik piginnittut takornariatitsinerup iluani suliaqaannarniarpata sanaartukkat piiarneqartarnissaat kommunip pissutissaqartinnigilaa.

Naalackersuisoqarfiup sulianut oqartussaasup oqaaseqaatai:

6.1. -imut

Oqaaseqarnissamut pissutissaqartitsinnigilaa.

6.2. -mut

Oqaaseqarnissamut pissutissaqartitsinnigilaa.

6.3. -mut

Pilersaarusiornermut inatsimmut attaviusut eqqarsaatigalugit, siunnersuummi § 12, imm. 1 nr. 2 aamma § 15, imm. 2 -mut atatillugu Inatsisartunut inatsimmi malittarisassat inatsimmit atuuttumit aallaaveqarput, aalajangersakkallu assigalugit. Tunngavilersuutaasinnaasorli atorpeqarsimanngilaa. Taamaasilluni immikkoortunut pilersaarummi takornariatitsinerup akuersissuteqarfiusartussanik aalajangersaasoqarsimanngilaa. Tamanna tunuliaqutaralugu Naalackersuisoqarfiup aalajangersakkat arlariit siunnersuummiit peersimavai. Siunnersuummi allannguutit pilersaarusiornermut inatsimmut naapertuunnerulersillugit suliarineqarsimapput.

6.4. -mut

Oqaaseqarnissamut pissutissaqartitsinnigilaa.

6.5 -imut

Immikkoortumut 1.1. -imut nassuiaatitut oqaaseqaatit takukkit.

6.6. -imut

Pisinnaatitsissummik piginnittup akuersissutip atorunnaarnerata kingorna sanaartukkanik illuutiniq ass. qimatsiinnannginnissaa aalajangersakkakut qulakkeerniarneqarpoq. Sanaartukkat, illuutit ass. illuatungiusunut allanut tunniunneqarsinnaappata tamanna tulluarnerujussuussaaq. Pisinnaatitsissummik piginnittup akuersissuteqarnerup aalajangersimasumik suliaqarneranut atatillugu sanaartortitsinertut isiginiarneqarsinnaavoq, taakkualu assigiinngitsorujussuussinnaapput.

7. Aningaasaqarnermut Akileraartarnermullu Naalackersuisoqarfik allappoq:

- 7.1 Tusarniaaffigineqartup oqaatigaa § 21 -mi [maanna § 20 tulluuttullu] oqaasertalersuineq assigiissaagaanngitsoq. Qallunaatut inatsisip oqaasertaani atorneqarpoq “afgift”. Inatsimmut nassuiaatitut oqaasertalersuineri atorneqarluni “vederlag”, akileraarutaanngitsoq, kisiannili “afgift”. Tusarniaavigineqartoq isumaqanngilaq ersarinngitsoq pineqarnerisoo akitsuut tunngaviumik inatsimmi § 43 -mi ilaasoq, akiliutaanersoo akuersissummik tunniussaqaqarnertut imaluunniit akuersissummut akiliutaanersoo.
- 7.2 Tamatuma saniatigut tusarniaaffigineqartup maluginiarsimavaa siunnersuummi § 12, imm. 2-mi [tusarniaaffigineqartup § 12, imm. 1 nr. 2 oqaluuseraa] aamma § 15, imm. 2-mi [maanna atorunnaartoq] allassimasut malillugit sumiiffinni takornariartitsineri akuersissuteqarfiusumut kommunini pilersaarusiornertut oqartussaassuseq Naalackersuisunit piginnaaffigineqarpoq. Tusarniaaffigineqartup erseqqissarpaa taamatut piginnaatitsissut nassaassaareersoo pilersaarusiornertut inatsimmi § 9-mi. Siunnersuut taama isikkoqartillugu akuersineqassagalarpat, oqartussaassutsip sumiinnera aammalu nuna tamakkerlugu aammalu kommuninilu pilersaarusiornerti aqqissuussineq qanoq ingerlanneqartassanersooq nalornilersitsissaaq.

Naalackersuisoqarfip sulianut oqartussaasup oqaaseqaatai:

7.1 -imut

Siunnersuusiami allannguutinik suliaqartoqarpoq. Akitsuusiisarnertut aalajangersakkat maanna oqaasertalersorneqarput §§ 20-22-mut. Akitsuutit pineqarneri erseqqissarniarlugit allannguutit suliarineqarsimapput.

7.2 -mut

Takukkit siunnersuummut nassuiaatitut 6.3-mut oqaasertaliussat.

8. Erik Lomholt-Bek allappoq:

- 8.1 Tusarniaaffigineqartup oqaaseqarfigai siunnersuummi § 1, imm. 2 -mut tunngasut. Inissiat, illuutit allat, sanaartukkat, aqqissuussinerit, aqquernerit aamma attaveqaasersuineri atortut akuersissummut atasuusut pineqarneri tusarniaaffigineqartup erseqqissaqquai.

Naalackersuisoqarfip sulianut oqartussaasup oqaaseqaatai:

8.1. -imut

Aalajangersakkami takornarissanut neqeroortigineqarsinnaasuni neqeroornertut, nioqquteqarnertut imaluunniit takornariartitsineri nioqqutigisanik tunniussisarnertut pisut pineqartut ersereerpoq. Tamatuma saniatigut inatsisartut inatsisaanni suna aalajangersarniarneqarnerisooq isiginiarneqassaaq: Inatsisartut inatsisaanni takornarissanut

neqeroortitsinnaanermut akuersissutit pineqarput. Taamaasilluni aalajangersagaq sanaartukkanut ingerlatsinermut atasunut tunngassuteqanngilaq.

9. Nomad Greenland allappoq:

- 9.1 Tusarniaaffigineqartup oqaatigaa siunnersuut avataaniit aningaasaliisinnaasunik pissarsiniarnermut malunnaatilimmik sunniuteqarnerlussinnaasoq, taakkualu Kalaallit Nunaanni takornarissanut suliniutinut annertuunut pisariaqarlunnartuugaluarlutik. Tusarniaaffigineqartup Kalaallit Nunaanni aningaaseriviit ikinneri tunngavigalugit ernummateqarnerarpoq, tamannami unammillersinnaassuseqarnermut killilersuigami, taamaalillunimi sumiiffimmi ingerlatsisut aningaasaateqarnissaminnut aningaasanik attartornissamut atugassarisaat aalajangersimasumik inissisimmata. Ilanngullugulu aningaasanik attartornissamut atugassarititaasut, soorlu ernit qaffasissut, inuttut nammineq qularnaveequsiinissamut piumasagaatit, aningaasaliisartullu amerlasuut kissaatiginnimmassuk nipangiinnarluni – tassa ingerlatsinermut malunnaatilimmik sunniuteqarani - peqataanissat taamaallaat 33 % -inik piginneqataassuteqarnikkut pisinnaanera erseqqissarneqarpoq. Tusarniaaffigineqartup oqaatigaa aningaasalersuisussanik naammattunik pissarsiniarsinnaanerit aalajangersakkat annikillisisit.

Tusarniaaffigineqartup oqaatigaa aningaasaliissutissanut naammattunik periarfissaqannginnerup kingunerisaanik suliffeqarfiit nunatsinneersut annikinnermik aningaasaliissuteqarsinnaaneq aallaavigalugu takornariartitsinikkut neqeroorutigineqarsinnaasut akikitsuinnarmik neqeroorutigisinnaalissagaat. Akikitsunik neqerooruteqarsinnaanikkut, takornarissat annikitsuinnarmik aningaasartuuteqarlutik tikittartut taamaallaat soqutiginnilersinneqassapput, taamaalilluni takornarissat aningaasartuuteqarnerusartut qammarneqanngitsoorlutik Tamannalu naggataatigut takornariartitsinerup iluani ataatsimut isertitassanut annikinnerulersitsissaaq piujuartitsinermillu tunngaveqarluni takornarissanut pitsaasumik nioqquteqartitsiniarnermut ineriartuutaanani.

Aningaasaliinermut tunngatillugu tusarniaaffigineqartup aqqissuussat “Offentlige-Private Partnerskaber”, Verdensbanken aamma Den Europæiske Investeringsbank (EIB) eqqaagaluarpai, kisiannili taakkunani maannakkumut malittarisassat aallaavigalugit killilersuinerup kingunerissavaa eqaatsumik sukkasuumillu kiisalulu nunanit allaniit pilertortumik aningaasaliisinnaassuseq ingerlatsisinnaannginneq.

- 9.2 Mittarfinnut nutaanut aningaasalersuutinut tunngatillugu tusarniaaffigineqartup oqaatigaa tiguisinnaassutsip ataqatigiissakkamik ineriartortinneqarnissaa qulakkeerneqartariaqartoq. Takornarissanut periusissiami anguniarneqartut

naammassiniarlugit tusarniaavigineqartoq tigussaasunik siunnersuusiorpoq suullu aningaasalersorneqarsinnaanersut aamma taakkartorlugit:

- Unnuisarfinnik pisariaqartitsineq: nunani allani aningaasaliisartut najukkani suliffeqarfinnik suleqateqarlutik akunnittarfinnik unnuisarfinnillu pitsaasunik sanaartorlutillu ingerlatsisinnaapput, tamannalu takornariartartunik qaffasissunik akiliuteqartartunik qammaanerussaaq.
- Attaveqaasersuusersuinermit tapersiissutit: piujuartitsinermut tunngaveqarluni takornariartitsinermut avataaniit aningaasaliisartut atortagaannik sanaatoriaatsinik minguitsunik atuineq aammalu atortussanik avatangiisunut mianerinnittunik atuineq.
- Piginnaasanik ineriartortitsineq: nunani tamalaani takornarialerinernik ingerlatsisut suleqatigalugit inoroorsaarnerup, angallassinernup allaffissornerullu iluani pikkorissaanernik atuutilersitsineq.
- Immikkut ilisimasat aamma misilittakkat: nunani allani aaqqiissutaasarsimasut iluatsilluartut atorluarlugit mittarfinnut takornarissanullu attaveqaasersuutinit aningaasaliissutit iluanaarutigineqapallassinnaapput.

Tusarniaaffigineqartup misilittakkat uanngaanneersut eqqaavai:

- Bhutan: periusissiaq "high value, low volume" taaguutilik, tassani takornarissat akiliisinnaassuseqarluartut piujuartitsinermut akitsuusiinikkut soqutiginnilersinniarneqarnissaat anguniagarineqarpoq. Periusissiaq aallaavigalugu Bhutan takornariarfinngornikuuvoq akisooq, tassanilu misigisassat immikkuullarissut inuiaqatigiinnut aningaasatigut iluanaarfiulluartartut periarfissaapput.
- Kina: sukannersut piginnittuunermut killilersuutit peqquataallutik nunanit allanit aningaasaliisartut (FDI) suliassaqarfinnut assigiinngitsunut annikinnerulersitsipput, aningaasaliisartummi niuerfiit niuernerup iluani iluanaaruteqarniarluni ingerlatsiffiunerusut aningaasaliiffigerusunnerusarpaat, taakkunanimi nakkutilliinerusoqarsinnaallunilu iluanaarnerusoqarsinnaammat. Killilersuutit peqquataallutik Kinami ineriartorneq attatiinnarnissaanut periutsit immikkuullarissut aningaasaliissutillu pisariaqartinneqartut pissarsiarineqanngitsoorsimapput.
- India: nunanit allanit niuernerup iluani aningaasaliissuteqarsinnaanermut killilersuutit atuutilersinneqarnerisa kingorna ineriartorneq arriillisimavoq aningaasaliisartullu killeqalerlutik. Aalajangersakkanillu sakkukilliliinerup kingorna Indiamut aningaasaliisartut annertuseriarsimapput, taakkualu niuernerup iluanut ineriartortitsilersimapput aningaasatigullu iluanaarutit annertusisimallutik.
- Singapore: aningaasaleeriaaseq ammanerusup atorneratigut nunanit allanit aningaasaliisinnasut soqutiginnilersinneqarsimapput, taakkualu nunap

aningsaatigut inissisimaneranut iluaqutaasimapput. Singaporimi eqaatsumik killilersuinngitsumillu politikkeqarnikkut nunanit allanit aningaasaliisinnaassuseq FDI-mi qaffasissiq atorneqalersimavoq, taannalu aningaasaqarnikkut annertusiartornissamut, nutaaliornissamut ineriartornissamullu iluaqutaavoq.

- 9.3 Tusarniaaffigineqartup oqaatigisani tunuliaqutaralugit oqaatigaa sumiiffimmi takornarissat soqutigisaasa illersorneqarnissaat piujuartitsinermillu tunngaveqarluni ineriartornissap aammalu avataaniit aningaasaliisartunit pissarsiarineqarsinnaasut aallaavigalugit Kalaallit Nunaanni aningaasat piginnaanerillu pisiaqartinneqartut akornanni oqimaaqatigiissaarinissaq pisariaqartinneqarnerarpaa. Piginnittooriaatsit aningaasaliiffiusinnaasullu allaanerusut eqaatsut atuutilersinneratigut Kalaallit Nunaanni takornariaqarneq ineriartortinneqarsinnaavoq piujuartitsinermillu tunngaveqartinneqarsinnaalluni, tamannalu nunaqavissunut nunanillu avataaneersunut iluaqutaasinnaavoq.

Naalackersuisoqarfiup sulianut oqartussaasup oqaaseqaatai:

9.1. - imut

Takukkit nassuiaatitut 1.1. -imut oqaaseqaatit.

9.2. -mut

Ataqatigiissaakkamik ineriartortoqarnissaa anguniarlugu Naalackersuisut takornarissanik inuussutissarsiornerup iluani pilersaarummik suliaraqarlutik aallartinnikuupput.

Naalackersuisunit ilisimaneqarpoq suliassaqarfinni arlalinni ataatsimut iliuuseqarnikkut suliassaqarfiup iluani ineriartorneq pilersinneqarsinnaasoq.

9.3. -mut

Takukkit nassuiaatitut 1.1. -imut oqaaseqaatit.

10. Kommuneqarfik Sermersuumi Inuussutissarsiornermut immikkoortortaqqarfik allappoq:

- 10.1 Tusarniaavigineqartoq oqaaseqarpoq iluarisimaarnartoq kommunit akuersissuteqartarnermi suliart ingerlanneqartarneranni annertunerusumik peqataatinneqarnerat. Taamaattoq tusarniaaffigineqartup oqaatigaa inatsisartut inatsisaanni aamma killiliussat assut ersernerluttut, tassami paragrafini amerlasuuni Naalackersuisut imaluunniit oqartussat aalajangiisinnaassusermik tunineqarsimasut inatsisartut inatsisaat aallaavigalugu siunissami nammineerlutik sinaakkusiorsinnaammata, taakkualu suli ersarissarneqarnikuunatik.

- 10.2 Tusarniaaffigineqartup oqaatigaa akuersissummik tunniussaqaarnissamut allaffissornerujussuarmik pilersitsisoqassammat. Tusarniaaffigineqartup suliat ingerlanneqaarnissaannut nukissanik atorluaasoqaarnissaa anguniarlugu nalilersuisoqaarnissaa siunnersuutigaa.
- 10.3 § 2, imm. 5 aamma 6 -imut [maanna § 2, imm. 6 aamma 7], tusarniaaffigineqartup apeqqutigaa suna assigiinngissutaanersoq najugaqavissumut aamma inuit allattorsimaffianniinnermut tunngassuteqartut pillugit.
- 10.4 § 3, imm. 1 -imut [maanna allatut oqaasertalerneqarsimavoq, § 2, imm. 2-milu takuneqarsinnaallunilu], atatillugu tusarniaaffigineqartup sumiiffimmi akuersissuteqarsimasumik pilersaarusiormut atatillugu pilersuisut pilersuisuinut tunngasunik paasiniaavoq taakkua aamma akuersissummik ingerlatsinissamut piumasqaatinut ilanngunneqarsimanersut, tassunga ilanngullugit najugaqartuunissamut, tamannalu isumaqarnerseq illuaqqanik / akunnittarfimmik ineriartortitsinnermut nunanit allaniit illussanik titartaasartumik atuisoqarsinnaanngitsoq.
- 10.5 § 4, imm. 5 -imut [maanna§ 3, imm. 2-mut ilanngunneqarnikoq], tunngatillugu tusarniaaffigineqartup apeqqutigaa eqqortumik paasinninnerunersoq ingerlatsisut assigiinngitsut arlariit sumiiffimmut ataatsimut akuersissuteqarfigineqarsinnaasut assigiinngitsunik ingerlatsisussatut, assersuutigalugu eqalunniartarnermik aamma sisorartitsisarnermik.
- 10.6 § 11 -imut [maanna§ 4, imm. 5] atatillugu tusarniaaffigineqartup apeqqutigaa kommuni nalilersuisarnermut ataatsimiititamik pilersitsinngikkaluarluni § 5 [maanna § 7] naapertorlugu piginnaatitaasinnaanersoq.
- 10.7 § 12 -imut atatillugu tusarniaaffigineqartup oqaatigaa immikkoortumut pilersaarut aallaavigalugu kommuni peqataatinngitu aammalu sumiiffimmi pilersaarutaasut allat avaqqullugit akuersissummik tunniussisoqarsinnaanera.
- 10.8 Tusarniaaffigineqartup oqaatigaa taaguutit ersarissumik qanoq paasineqassanersut nassuiaanertaqanngitsumik aammalu malittarisassat suut aallaavigalugit aalajangersaasoqarnerseq oqaatiginagu pisinnaatitsissummik piginnittup nunaqavissunik sulisoqaarnissaanut pilersuisoqaarnissaanullu tunngasunik aalajangersaaneq ingattajaarnerusoq.
- 10.9 § 20 -imut tunngatillugu [maanna § 13] tusarniaaffigineqartup oqaatigaa pissusissamisussasooq takornariartitsinnermut inatsit malinneqaarnissaa,

piumasaqaammilu inuit piginnittut 49 %-ii najugaqarnermut allattorsimaffimmiinngikkaluarlutillu akileraartussaataaannngikkaluartut akuerineqarsinnaagaluartut oqaatigalugu.

10.10 § 22 -imut tunngatillugu [maanna § 23] pisortani sulianik ingerlatsinermut aningaasartuutit pillugit, tusarniaaffigineqartup oqaatigaa takornariartitsinermut inatsimmut naapertuuttumik allannguisoqartariaqartoq.

10.11 Tusarniaaffigineqartup oqaatigaa akuersissummut nakkutilliinermullu atatillugu kommuninut pisinnaatitsinermik tunniussisoqarsinnaanera paatsuunganartortaartoq. Tusarniaaffigineqartup apeqqutigaa siunnersuummi tamatuminnga tunngavilimmik allannguisoqarnersoq.

10.12 Ilanngullugulu tusarniaaffigineqartup oqaatigaa takornarissanut neqerooruteqarsinnaanermut akuersissuteqarneq pillugu inatsisartut inatsisaat, takornarialerisut ass. pillugit inatsisartut inatsisaata imminnut attuumassusaat nalorninartillugu.

10.13 Tusarniaanermut akissummi tusarniaaffigineqartup ilanngussimavai oqaaseqaatit Sanaartornermut Avatangiisinullu Ingerlatsivimmeersut, imaattunik oqaaseqaatertaqartut:

A. Ingerlatsiviup kissaatigaa ingerlatat suut akuersissuteqarfiusinnaanersut aammalu nakkutilliisariaqarnermut tunngasut ersarissaasoqarnissaa, tak. § 4, imm. 4 [maanna siunnersuummi peerneqarnikoq]. Aalajangersagaq paasineqassanerluni qaqqaliartitsisinnaanermut akuersissuteqartoqassagaluarpas, taava maani najugallit tamaani qaqqasiorsinnaanngitsut ilaqquttat Danmarkimeersut peqatigalugit?

B. Tusarniaaffigineqartup § 12, imm. 2 -mut [maanna siunnersuummi peerneqarnikoq] erseqqissaasoqarnissaa kissaatigaa, tassami nunaminertamut atuinissamut tunngaviummik suliassaqarfimmut pilersaarut aalajangersaasuusussaammat. Ingerlatsiviup immikkoortumut pilersaarummi takornariartitsisarnermut akuersissuteqarfiusunik toqqaasoqassanngitsoq siunnersuutigaa.

Naalackersuisoqarfiup sulianut oqartussaasup oqaaseqaatai:

10.1. -imut

Sumiiffinnut aalajangersakkamut tunngatillugu agguataarineq siunnersuummi ersarissarniarneqarsimagaluarpoq, siunnersuummi § 12, imm. 1, nr. 3 aamma § 15, peerneqarsimapput.

10.2. -mut

Naalackersuisoqarfiup aaqqissuussineq nalilersuiviginiarpaa.

10.3. -mut

Suliffeqarfiit Kalaallit Nunaanni angerlarsimaffeqartut pineqarneri ersarissarneqarpoq. Kalaallit Nunaanni angerlarsimaffeqarnermut tunngatillugu CVR -imut nalunaarsuiffimmi nalunaarsorsimaneq innersuunneqarpoq.

10.4. -mut

Akuersissummik tunniussisoqarsinnaavoq sumiiffik pineqartoq tamanut neqeroortigineqareernerata kingorna. Neqeroortitsinerup siunertaraa ammasumik naapertuilluartumillu ingerlatsisoqarnissaanik qulakkeerinninnissaq, neqeroortitsereernerup kingorna piumasagaatit allaaserineqartut aallaavigalugit pineqartumut naleqqunnerpaamut akuersissummik tunniussisoqassaaq. Toqqaasarnermi piumasagaataasut taakkualu qanoq oqimaalutarneqassanersut neqeroortitsineri ersissapput. Toqqaasarnermi piumasagaataasut § 10 -mi ersipput. § 10, imm. 1, nr. 3 naapertorlugit pingaaruteqarpoq akuersissut naapertorlugu ingerlatsineri qanoq annertutigisumik qinnuteqartup kalaallinik sulisussanik aamma kalaallinik pilersuisartunik atuinera.

Tunngaviusumik suliniummut titartaatitsineri illussanik titartaasartunik nunanit allaneersunik atuneq akornutissaqanngilaq.

10.5. -imut

§ 4, imm. 5 [maanna § 3 imm.2-mut ilanngunneqarnikoq] allassimasut ima paasineqassapput, ingerlatsinerit allat sumiiffimmi pineqartumi akuersissummumut pineqartumut unammillertuunngippata ingerlanneqarsinnaasut. Tassa imaappoq akuersissutit marluk piffissanut ukiup ingerlanerani aalajangersimaqqissaartunut tunngasut sumiiffimmi ingerlanneqarsinnaasut, piffissaliussami assigiimmi ingerlatsisoqannginnassaaq. Ingerlatsisimanerit aallaavigalugit ukiup qanoq ilinera aallaavigalugu assigiinngitsunik ingerlatsinissamut akuersissuteqarnissamut sumiiffimmut aalajangersimasumut arlalinnik neqeroorteqartoqarnikuunngilaq. Taamaattoq akuersissummik piginnittut kissaatigisarsimavaat sumiiffimmi assigiinngitsunik ingerlatsisinnaaneq, assersuutigalugu illuaqqanik pilersinneqarsimasunik atuilluarsinnaaneq anguniarlugu.

10.6. -imut

Aalajangiisinnaassutsip kommuninut ingerlateqqinneqarsinnaanissaa pineqanngilaq, nalilersuinernulli ataatsimiititaliamik pilersitsisariaqannginneq. Kommuninut suliassamik ingerlatitseqqinnermi nalilersuineranut ataatsimiititaliaq aallaavigalugu suleqatigisartakkat naapertuuttut peqataatinneqarnissaat qulakkeerneqassaaq, assersuutigalugu uumasut piniarsinnaassutsillu nalilersorneqarnissaa.

10.7. -imut

Aalajangersagaq siunnersuummit peerneqarpoq.

10.8. -mut

Siunnersuut sumiiffimmi najugalinnik sulisoqarnissamut pilersuisoqarnissamullu aalajangersakkamik imaqarpoq. Massakkumut Naalakkersuisut aalajangersakkamik atuinissaminnik pilersaaruteqanngillat, taamaakkaluartoq siunissamut Inatsisartut inatsisaat isumannaallisarneqarsimavoq. Naalakkersuisut isiginnittaasiat aallaavigalugu, aalajangersagaq Kalaallit Nunaanni takornariartitsinerup iluani inerisaanissamut sakkussaavoq naleqquttoq, taannalu aallaavigalugu inuussutissarsiorfiup iluani suliffissat piginnaanerillu aalajangersimasut pilersinneqarsinnaapput. Suliffeqarfiit naammassisinnaanngisaannik piumasaqaasiortoqarnissaa aalajangersakkap siunertarinngilaa.

10.9. -mut

Tusarniaanermi akissuteqaatit Naalakkersuisunit tusaatissatut tiguneqarput, taakkualu aallaavigalugit aalajangersakkat naleqqussarneqarsimapput, maannakkullu aktiaatileqatigiiffimmi piginneqatigiiffimmiluunniit aningaasaatinik piginnittut 2/3 Kalaallit Nunaanni najugaqartariaarutsillugit, maanna piginnittuusut “affai sinnerlugit” Kalaallit Nunaanni najugaqartariaqalerput.

10.10. -mut

Aalajangersagaq suliap ingerlanneqarneranut pisortaqarfinnilluunniit allatut suliartaqarneranut akitsuusiisoqarsinnaaneranut aaqqissuunneqarsimavoq.

10.11. -imut

Naalakkersuisut kommunillu akornanni suliassaarfik pillugu pilersaarummi sumiiffinnut toqqaanissamut oqartussaassutsip sumiinnera ersarissarniarlugu taamatut aalajangersaasoqarsimavoq, siusinnerusukkullu § 15 -iusoq siunnersuummit peerneqarluni. Suliniut akuersissuteqarfiusartunik toqqaasarneq suli kommunit oqartussaaffigaat, tak. pilersaarusiornermut inatsit. Kommunimi pilersaarutit aallaavigalugit sumiiffinnik akuersissuteqarfiusussanik tunniussisoqarnissaa kommunip kissaatiginngippagu, taava akuersissuteqarfissanik pilersitsisoqarnavianngilaq.

10.12. -mut

Sumiiffinni aalajangersimasuni takornarissanut neqerooruteqarsinnaaneq pillugu inatsisartut inatsisissaattut siunnersuummi sumiiffimmi akiliisitsilluni kisermaassilluni ingerlatsisinnaaneq pineqarpoq, takornariaqarnermut attuumassusillit allat takornarissanut neqerooruteqarneq assigisaallu pillugit inatsisartut inatsisissaattut siunnersuummi sinaakkuserniarneqarput.

10.13 -imut

A) Aap, aalajangersagaq aallaavigalugu inuit Kalaallit Nunaata avataani najugaqartutut nalunaarsorsimasut, sumiiffimmi akuersissuteqarfiusussaasumi ingerlanneqarsinnaasutut akuersissutaasut assinganik ingerlatseqqusaanngillat.

B) Immikkoortunut pilersaarut pillugit aalajangersakkat siunnersuummit peerneqarput.

11. Lings Hunting Greenland ApS allappoq:

11.1 Tusarniaaffigineqartup suliniutit nutaat ilassilluarpai, taassumami nunaqavissunit misilittagalinnit, sumiiffinnillu ilisimasaqartunit akuersissutit ingerlanneqassasut ineriartortinneqarlutillu pingaartikkamiuk. Tusarniaavigineqartoq isumaqarpoq akuersissutit aallaavigalugit avataaniit aningaasaliisoqarani ingerlanneqarsinnaanissaat piviusorsioortuusoq – tamannali aatsaat pisinnaavoq anguniakkat angunissaannut sapiissuseqarluni, piareersimalluni ilungersorlunilu suligaanni.

11.2 Nalilersuisarnermut ataatsimiititaliamut tunngatillugu tusarniaaffigineqartup kissaatiginartippaa ataatsimiititaliap aalajangiinissamini tamarmiusunik inuttaqartarnissaa, taamaaliornikkut aalajangiinerit toqqissisimanaqqullugit.

11.3 Tusarniaaffigineqartup ernummataasa annersaraat 2025-mi ingerlatsinissamut pilersaarutit malillugit taamaallaat Kangerlussuarmiit sapaatip-akunneranut pingasunik timmisartuussisoqartarnissaa taannalu Sisimiullu avinneqartartussaalluni. Takornarissanut inuussutissarsiutillit allallu pisariaqartitaat naammassisinnaajumallugu neriupput aaqqiissummik allamik nassaartoqarumaartoq.

Naalackersuisoqarfiup sulianut oqartussaasup oqaaseqaatai:

11.1. -imut

Oqaaseqarnissamut pissutissaqartitsinngilaq.

11.2. -mut

Siunnersuut Naalackersuisunit nalimmassarneqarsimavoq, maannakkullu nalilersuinermit ataatsimiititaliamik pilersitsisoqarsinnaanera aalajangersarneqarsinnaalerluni. Tassunga atatillugu Naalackersuisut nalilersuinermit ataatsimiititaliap inuttaasa tamarmiusarnissaannut

tunngatillugu aalajangersaajumaarput, taamaakkaluartoq eqqumaffigineqassaaq inassuteqaasiornissami piginnaasat siammasissut pilersinniarneqarnissaat.

11.3. -mut

Oqaaseqaat tusaatissatut tiguneqarpoq. Takornariaqarneq pillugu immikkoortumut pilersaarummik suliaqarnermut atatillugu ajornartorsiut Naalackersuisunit qaqilerneqarumaarpoq. Imikkoortumut pilersaarummi siunertaavoq suliassa qarfiit akimorlugit takornariaqarnermut inuussutissarsiorfiup iluani suleqatigiilluni ineriartortitsinerup qulakkeerneqarnissaa.

12. Avannaata Kommunia allappoq:

- 12.1 Kommunalbestyrelsep inatsississamut siunnersuut pitsaasutut isiginngilaa, taamaattumillu Avannaata Kommuniani atuutsinneqannginnissaa siunnersuutigineqarluni.
- 12.2 Kommunalbestyrelsip oqaatigaa takornarissanik sullissisartut, sumiiffinni assigiinngitsuni kisermaassiniarlutik ingerlatsiniartartut, naak pisinnaatitaaffeqanngikkaluarlutik, atuisullu misigisarsimagaat nunaminertat tamanit atorneqarsinnaagaluartut killilersuutaalartartut. Kommunalbestyrelsip ernummatigaa tamanna peqqumaatissanik katersisarnermut pinngortitamilu toqqissisimasumik pisuttuarsinnaanermut periarfissanut sunniuteqarsinnaanera.
- 12.3 Kommunalbestyrelsip oqaatigaa nunap immikkoortuini aalajangersaasarnerit kommuninit aqunneqartumik pisariaqartut, qitiusumi aqunneqaratik, kommunimmi taakkuummata sumiiffinnut ilisimannittut.

Naalackersuisoqarfiup sulianut oqartussaasup oqaaseqaatai:

12.1. -imut

Suliniut sumiiffinnik akuersissuteqarfiusussanik toqqaasarnernik imaqartoq kommuniniippoq. Kommunip kissaatiginngippagu akuersissuteqarfiusussanik kommunimi peqarnissaa tamanna pinaviannigilaq.

12.2. -imut

Oqaatigineqartut tusaatissatut tiguneqarput. Siunnersuutigineqartulli aallaavigalugit peqqumaatissanik katersisinnaaneq nunaqavissullu pinngortitami angalaarsinnaanerat sunnerneqarnaviannigilaq.

12.3. -mut

Sumiiffinnik toqqaasarneq kommunit suliniuteqarnerisigut pisarpoq, tamannalu sumiiffimmi pissutsinik peqataatitsineruvoq.

13. Kommune Kujalleq allappoq:

- 13.1 Tusarniaavigineqartoq nalilersuineranut ataatsimiititaliorsinnaanermut oqaaseqaateqanngilaq. Tusarniaaffigineqartup oqaatigaa sumiiffinnik toqqaasarnissanut killiliussat ersarinneruppata taava sumiiffik pillugu takornarissanik ingerlatsisumut aammalu pinngortitami immikkuullarissut innarlerneqannginnissaannik suliaqarnermi allaffissornikkut suliassat ajornannginnerussasut.
- 13.2 Taamaattoq kommunip oqaatigaa takornariartitsinermik ingerlatsineq nunat tamalaat akornanni suleqatigiinnermik tunngaveqartuusooq, tamannalu inatsisartut inatsisaanni ersittariaqaraluarnarlugu. Tusarniaaffigineqartup nunanit tamalaanit aningaasaliisoqarsinnaaneranut aaqqiissutissat ujarthorpai. Aningaasaliissutillu taakkua unnuisarfinnut neriniartarfinnullu pitsaasunik sunniuteqartarneri ersarissarlugit. Nunanit allanit aningaasaliisartut sumiiffinnut naleqqussakkanik ingerlataqarnissamik piginneqatiginninnissamillu siunertallit, aningaasaliinissamut aaqqiissutit aallaavigalugit qunusaarneqartariaqanngillat,

Naalakkersuisoqarfip sulianut oqartussaasup oqaaseqaatai:

13.1. -imut

Oqaaseqaateqarnissamut pissutissaqartitsinngilaq.

13.2. -mut

Takuuk 1.1. -imut oqaaseqaatigineqartut.

14. Arctic Circle Business allappoq:

- 14.1 Tusarniaaffigineqartup oqaatigaa akuersissuteqarfiusuni takornariartitsinermik suliaqarsinnaanissaq anguniarlugu sumiiffinni pikkorissaanernik ingerlatsisoqartariaqartoq.
- 14.2 § 2, imm. 1 -imut atatillugu tusarniaaffigineqartup oqaatigaa sumiiffinni najugallit illoqarfinnut allanut aallarlutik neqeroorutinik atuisartut, tamannalu aamma takornariarnerusartoq. Tusarniaavigineqartullu apeqqutigaa sooq tamanna takornariartitsinermut inatsimmi tusarniaassutigineqartumi atuutinneqannginnersoq.
- 14.3 § 2, imm. 3 -mut atatillugu tusarniaaffigineqartup apeqqutigaa taaguut ”professionel”-ip atornerqarnera, tamannalu isumaqarnersoq “amatøritut “ taallutik akiliisitsillutik ingerlatsisartunut aalajangersakkat atuutsinneqanngitsut.

- 14.4 § 4, imm. 4 -mut [maanna siunnersuummit peerneqarsimasoq] atatillugu tusarniaaffigineqartup inunnut nunatsinni inuit allattorsimaffiani allassimanngitsunut akuersissuteqarfiusup iluani ingerlatap assinganik ingerlatsisinnaanerup inerteqqutaalerneru tapersersorpaa. Tusarniaavigineqartulli inuussutissarsiutini allani taamatulli illersuineramik pilersitsisoqartariaqartoq ujartorpaa.
- 14.5 Naalackersuisut nalilersuisarnermut ataatsimiitaliami ilaasortat pillugit arlaannaannulluunniit attuumassuteqarnermut tunngatillugu aalajangiisinnaanermut aalajangersagaq pillugu tusarniaaffigineqartup oqaatigaa aalajangersagaq kommunit Naalackersuisunut tunngatillugu aamma atuutsinneqartariaqartoq.
- 14.6 Tusarniaaffigineqartup apequtigaa akuersissummik pigisaqartup sumiiffimmi akuersissuteqarfigisamini allaanerusunik ingerlatsinissani kissaatigisimaguniuk, ingerlakkusutat aallaavigalugit akuersissut annertusineqarsinnaanersoq.
- 14.7 Pisinnaatitsissummik pigisaqartup sulianut ingerlatanulluunniit aalajangersimasunut kalaallinik sulisoqartariaqarnerannut Naalackersuisut aalajangersaasinnaanerat pillugu tusarniaaffigineqartoq isumaqarpoq namminersorlutik oqartussat kikkut sulisorineqarnissaannik aalajangersaaniarpata tamanna ingattajaarnerusoq. Tusarniaaffigineqartup oqaatigaa taamaattoqassappat tamanna immikkut inatsisitut aaqqissuuttariaqassasoq, inuussutissarsiortunut ataatsimut atortuusutut, takornariartitsinermuinnaanngitsoq. Tusarniaaffigineqartup oqaatigaa takornariartitsinerup iluani avataanit sulisitsisarneq naapertuuttuusinnaasoq, tassami misilittakkat ilisimasallu Kalaallit Nunaanni pigineqanngitsut taamaaliornikkut pissarsiarineqarsinnaammata.
- 14.8 Takornariartitsinermik ingerlataqartut kalaallinik pilersuisunik atuisussaatitaanerannut aalajangersaaneq pillugu tusarniaaffigineqartup oqaatigaa, inuussutissarsiorfimmi pilersuisoq atasiinnaq nassaarineqarsinnaaguni inuussutissarsiornerup iluani unammillersinnaassutsimut ajoqutaasinnaasoq. Pilersuisummi akit annertussusissaa nammineq inississinnaasassagamiuk.
- 14.9 Taaguummumut ” Tamakkiisumik pigisaminik atuisinnaasoq”, takuuk. § 19, imm. 1 nr. 4 [maanna § 12, imm. 1, nr. 3] pillugu tusarniaavigineqartoq aperivoq aningaasat pigisat aningaaserivimmit, aningaasaateqarfimmit imaluunniit aningaasaliisartunit attartornikkut pissarsiarisimagaanni, tamanna pigisaminik tamakkiisumik atuisinnaanertut paasineqassanersoq. Tusarniaasup apequtigaa tamanna

aallaavigalugu annertuumik aningaasaateqarnissaq piunasaqataanersoq, tamaassappammi tamannami suliffeqarfimmut pitsaanerpaajunaviannngimmat.

14.10 Tusarniaaffigineqartup oqaatigaa § 20 -mi [maanna § 13] aningaasaateqarnissamik piunasaqaat suliniutinut annertuunut, nunanit allaneersunit aningaasaliisoqarnissamik aammalu misilittakkatigut ikiorneqarnissamik pisariaqartitsiffiusunut unammilligassaqartitsisoq.

14.11 Tusarniaaffigineqartup oqaatigaa kaaviiartitanut akitsuusiinissamik aalajangersaaneq, tak. § 21, imm. 1 nr. 2 [maanna § 20 tulliilu] navianarsinnaasoq. Tusarniaaffigineqartup malugeqquaa annertuumik kaaviiartitaqarneq isumaqannngimmat suliffeqarfik sinneqartooruteqartoq, tamannalu amigartooruteqarnermik kinguneqarsinnaanerarpaa suliffeqarfiullu ingerlaannarsinnaanera nalorninartorsiortinneqarsinnaalluni.

14.12 Ingerlatsinissanut pilersaarutit akuerineqartussaanerannut, tak. § 24 imm. 2 [maanna § 17, imm. 2] tunngatillugu tusarniaaffigineqartup malugeqquaa Naalakkersuisut suliamik ingerlatsinerat eqqaaneqarsinnaasoq.

14.13 § 25 naapertorlugu nalunaaruteqartussaataaneq pillugu [maanna § 18] tusarniaaffigineqartup oqaatigaa kvartalikkaartumik nalunaaruteqarneq pissusissamisoorinnaaneq, nalunaarusiornermi suliffeqarfinnut nukinnik atuinarsinnaammat. Akuersissuteqarfiusunut angisuunut tunngatillugu annerusumik aqutsisoqarnissaa pisariaqartinneqarnerutillugu, tamanna ilanngunneqartarsinnaanera tusarniaaffigineqartup oqaatigaa.

14.14 § 26 -imut [maanna § 19] tunngatillugu tusarniaaffigineqartup oqaatigaa allassimasut tunngaviusumik unammilleqatigiinnermut inatsimmik unioqqutitsinerusinnaasoq. Tusarniaaffigineqartup apeqquserpaa sooq Namminersorlutik Oqartussat suliassanik ingerlatsinermut akulerunneqarnissaat. Tusarniaaffigineqartup ilassutigaa allanneqartariaqartoq paasissutissat Namminersorlutik Oqartussat suliffeqarfiutaannut inuussutissarsiortunik akuersissuteqarfiusunut sullitaqartunut siammarterneqartassanngitsut.

14.15 Sanaartukkanik paaasarneq pillugu, tak. § 27 [maanna § 26], tusarniaaffigineqartup oqaatigaa aalajangersagaq siumoortumik ilisimatitserneernissamik imaqqanngitsoq. Tusarniaaffigineqartup eqqaavaa tamanna siumoortumik piffissaqartitsilluarluni nalunaarutigineqartartussaasoq, illuutillu taamaallaat allamut tunineqarsinnaanngikkaangata piiarneqartassasut.

Naalackersuisoqarfiup sulianut oqartussaasup oqaaseqaatai:

14.1. -imut

Naalackersuisut isumaqataapput takornariaqarnerup iluani pitsaasumik ineriartortoqassappat suliassaqarfiit akimorlutik suleqatigiittariaqartut. Tamannalu tunngavigalugu Naalackersuisut suliassaqarfiup iluani ineriartortitsinissamut pilersaarummik aallartitsinikuupput.

14.2. -mut

Naalackersuisut tusarniaasup akissuteqaataat maluginiarpaat, taamaakkaluartoq siunnersuutip uuma suliarineqarnissaa eqqarsaatigalugu siunnersuutit allat pillugit oqaaseqarusunngillat.

14.3. -mut

Siunnersuummi sumiiffinni aalajangersimasuni kisermaassilluni ingerlatsinissamut akuersissummik tunniussisarneq pineqarpoq. Taamaasilluni ingerlatsinermi inuussutissarsiutigalugu ingerlatsisuunissap toqqaannangikkaluamik piumasaqaataanera erserpoq, tassunga ilanngullugu takornarissanut neqeroorut pineqartoq pillugu akiliutinik tigusineq. Ingerlatsisut proffessioneliunngitsut aalajangersakkami matumani ilaatinneqanngillat. Ilisimatitsissutigineqassaaq oqaaseq "professionel" oqaatsit eqqarsaatigalugit aalajangersakkamit peerneqarsimammat.

14.4. -mut

Tusarniaavigineqartut akornanni sumiiffimmi akuersissuteqarfiusumi qanoq annertutigisumik allatigut inuussutissarsiutinik ingerlatsisoqarsinnaanissaa assigiinngitsunik isumaqarfigineqarpoq, taamaammallu Naalackersuisut pissutissaqartinngilaat tamanna piffissami matumani allannguiffigissallugu. Tamanna aamma siunnersuut pillugu tusarniaanermi akissutigineqartuni ersersinneqarpoq.

14.5. -imut

Siunnersuut naleqqussarneqarsimavoq, maannakkullu siunnersuummi § 7, 3-mi aalajangersaasoqarsimavoq, taannalu aallaavigalugu Naalackersuisut nalilersuisartutut ataatsimiititaliami ilaasortassanik toqqaasarnermut, siulittaasumik toqqaasarnermut aammalu taasisarnermut aalajangersaasinnaapput. Pisuni kommuni isumaqarsimappat inunnt Naalackersuisut sinnerlugit nalilersuisartutut ataatsimiititaliami toqqarneqarsimasut akornanni arlaannaannulluunniit attuumassuteqannginnissaq eqqortinneqanngitsoq, tamanna pillugu kommuni naalackersuisoqarfimmut suliassaqartuusumut nalunaaruteqarsinnaapput.

14.6. -imut

Suliffeqarfiup ingerlatsinissamut pilersaarutaanik allannguina aallaavigalugu akuersissummi nalimmassaasoqarsinnaavoq. Ingerlanniakkap suussusaa aallaavigalugu nalilerneqassaaq

ingerlanniagaq akuersissutip pioreersup iluaniinnersoq imaluunniit sumiiffimmi nutaamik akuersissusiortoqassanersoq.

14.7. -imut

Piginnaatitsisummi Naalakkersuisut pisinnaatinneqanngillat aalajangiisinaanermut kikkut suliffeqarfimmi atorfinitsinneqarsinnaanerannik. Tamatuma saniatigut takukkit 10.8. -mut nassuiaatitut oqaaseqaatit.

14.8. -mut

Naalakkersuisut takornarissamik ingerlatsisumut aalajangersimasumik atuisariaqarnermik aalajangersaanera aallaavigalugu ataasiinnarmik ingerlatsiffiusup iluani unammillersinnaassutsimi ajornerulersitsinissaq aalajangersakkami siunertaanngilaq. Tamatuma saniatigut 10.8.-mut oqaaseqaatit.

14.9. -mut

Aalajangersakkap siunertaa tassaavoq aningaasatigut suliassamik kivitsisinnaangitsumut akuersissummik nalunaaruteqannginnissaq. Pigisanik ”atuisinnaaneq” isumaqarpoq, aningaasaatigisat allamut akiliutigisassatut inissisimangitsut killilersugaanngitsullu. Suliffeqarfiit akuersissummik pinissaannut aningaasanik annertuumik tigoraaannarnik peqareertarnissaat siunertaanngilaq. Tassunga tunngatillugu Naalakkersuisut tusarniaaffigineqartoq isumaqatigaat, tassa taamaattoqassappat suliffeqarfinnut tamanna pissusissamisunnitsoq. Suliffeqarfinnut inuiaqatigiinnullu aningaasanik pigisanik erniortitsineq iluanaarutaaffiunerussiaaq.

14.10. -mut

Takukkit 1.1. -imut oqaaseqaatigineqartut.

14.11. -imut

Missingiummi allannguisoqarnikuuvoq. Akitsuusiisarneq pillugit aalajangersakkat maanna §§ 20-22-mi oqaasertalerneqarput. Akitsuutit sorliit pineqarnersut erseqqissarniarlugu allannguisoqarsimavoq. Aningaasat annertussusissaannik aalajangersimasumik aaqqissuussisoqarpoq. Tamanna kaaviiartitanut akitsuutitut aaqqissuunneqanngilaq.

14.12. -imut

Ingerlatsinissanut pilersaarussiaq suliarineqaqqaartoq suliffeqarfiup akuersissuteqarnissamut neqeroorneranut atatillugu. Ingerlatsinermut pilersaarussiaami aaqqiissuteqarnermut allannguinernulluunniit suliap suliarinissaanut piffissami annertuumik atuisoqarnissaa naatsorsuutigineqanngilaq. Annertuumilli allannguisoqartillugu pineqartunut sunniuteqarfiussami tusarniaasoqarnissaa pisariaqarsinnaavoq. Aalajangiineq ilisimasat naammattut tunngavigalugit pinissaa tusarniaanerup siunertaraa.

14.13. -imut

Pisinnaatitsissummik piginnittoq ukiumut nalunaarusiortarnissaa aalajangersakkamit pisissaaffilerneqarpoq. Kvartalikkaartumik nalunaarusiortarnissap pissusissamisuumnginnera pillugu Naalakkersuisut tusarniaaffigineqartoq isumaqatigaat.

14.14. -imut

Akuerissuteqarnermut tunngatillugu suliaqarnermut taamaallaat paasissutissanik siammarterisoqartassaaq. Assersuutigalugu qinnuteqartoqarneranit naalakkersuisut paasiniassavaat pilersaarutaareersunut paasissutissat arlaatigut sunniuteqassanersut, kiisalu sumiiffimmi uumasooqassutsimik assigisaannillu nalilersuinissamut attuumassusillit qanoq inissisimanersut. Aalajangersagaq aallaavigalugu niuernermin unammillernermit ajoqutaasinnaasumik paasissutissat namminersorlutik oqartussat suliffeqarfiutaannut siammarterneqassanngillat.

14.15. -imut

Pisinnaatitsissummik piginnittup illuutinik, atortunik assigisaannillu qimatsiinnannginnissaa anguniarlugu aalajangersagaq ilanngunneqarsimavoq. Soorunami sanaartukkat, illuutit assigisaallu suliarineqarsimasut allanut ingerlateqqinneqarsinnaappata, tamanna orniginartinneqarneruvoq. Aalajangersagaq aamma atuarneqartussaavoq isiginiarlugu pisinnaatitsissummik pigisaqartup akuersissummut tunniunneqarsimasumut atatillugu sanaartukkat suliarisinnaasaat assigiinngissinnaasut. Sumiiffimmi sanaartorneqarsimasunut assigisaannullu aammalu ingerlatsisoq sumiiffimmi qanoq ingerlatsilereersimanera aallaavigalugu qanoq sivistigisumik piffissaliisoqassanersooq oqimaalutarneqassaaq. Suliffeqarfilli matuneqalernersooq aamma isiginiarneqartariaqarpoq, maluginiarneqassallunilu akisussaaffiit Naalakkersuisunit allanut tunniunneqarsinnaajunnaarsinnaaneri.

15. Aningaaserivik Grønlandsbanken allappoq:

Tusarniaaffigineqartup akissuteqaatai tusarniaassutigineqartoq una aammalu Takornariartitsinermit, sumiiffinni nunami aalajangersimasuni zone-nut agguasarneq il.il. inatsisissatut siunnersuutaasumut attuumassuteqarput. Ataaniittuni aallaavigineqarput takornarissanut neqeroorteqarsinnaanermut inatsisissatut siunnersuummut oqaaseqaatit suliassaqarfinni pineqartuni.

15.1 Tusarniaaffigineqartup oqaatigaa naatsorsuutigineqartoq Kalaallit Nunaanni takornariartitsinermin ataatsimut anguniagaasut makkuusut:

- Takornariartitsinerup aningaasarsiutiginerani malunnaatilinnik siuariaateqartitsinissaq,
- Ingerlatsinerit Kalaallit Nunaanni sumiiffinnut amerlanerusunut siaruarterneqarnissaat,

- Najukkani naleqarnerulersitsinissat, aamma
- Naleqarnerulersitsinerup inuiaqatigiinni amerlanerusunut siaruarternissaa.

Tusarniaaffigineqartup oqaatigaa qulaani taakkartorneqartut inuiaqatigiinnik ineriartortitsinermut atuutsinneqartariaqartut, aammalu inuiaqatigiit takornariaqarnerup iluani ineriartortitsinissamut pitsaanerpaamik paasinninnissaat tapersersuinissaallu qulakkeerreqarsinnaalluni. Kalaallit Nunaatalu akiitsuisa malunnaatilimmik annertulisinneratigut mittarfinnut aningaasaliinikkut tamatuma anguneqarsimanagera oqaatigineqartariaqarpoq. Taamaattumik aningaasaliissutit erniortitsiviusussaapput, tamannalu anguneqarsinnaavoq aningaasanik atuinerunikkut, tamatumalu iluatsinnissaanut takornariaqarnerup iluani malunnaatilimmik ineriartortoqarnissaa pisariaqarpoq.

Takornariaqarnerup malunnaatilimmik qaffariaateqanngippat, mittarfiliornernut aningaasartuutit maannakkut aningaasatigut ingerlatsiviusunit akilersorneqalissapput, tamannalu inuiaqatigiinnut tamanut ajoqutaasinnaavoq. Taamaattumik takornariaqarnerup iluani aningaasatigut ineriartortoqarnissaa pingaaruteqarpoq. Takornariaqarnerup iluani ineriartortitsinissamut sinaakkusiineq aqqutigalugu naleqalersitsiffiusunut tamanut sumiiffinnullu nutaanut aningaasaliisinnaaneq anguniarneqassaaq. Tusarniaaffigineqartullu isumaa aallaavigalugu tamanna anguneqarsinnaanngilaq avataanit aningaasaliisinnaasut ilisimasallillu sumiiffimmi ingerlatsisunik suleqateqarsinnaanngippata.

Tusarniaavigineqartoq isumaqarpoq siunnersuummi anguniakkat siuliani eqqartorneqartunut naapertuuttuusut, kisiannili tusarniaavigineqartoq isumaqarpoq sakkussatut aqqissuussat naammattumik naammassisaraqarfiusinnaanngitsut. Tamatumunngalu tusarniaavigineqartoq isumaqarpoq siunnersuutikkut apeqquserneqarsinnaasoq Kalaallit Nunaat nunatut aningaasalersuiffiusinnaasutut.

Nunanit allaneersut annerpaamik 33 %-imik piginnittuusussaatitaanera kingumoortumik sunniuteqartumik aalajangersaanertut tusarniaaffigineqartup oqaatigaa, tamannalu inatsimmik atuuttumut malinninniarnermut nalornisilersitsinnaanerarlugu. Tusarniaaffigineqartup oqaatigaa Naalakkersuisut isumaqarsorinartut Kalaallit Nunaanni pissutsinut ilisimanninneq piginnittuniittoq. Tusarniaavigineqartullu oqaatigaa Islandimi Savalimmiuniluunniit pineqartoq pillugu inatsisitigut piunasaqaataanngitsoq. Kalaallit Nunaanni pissutsinut ilisimanninneq sumiiffimmi najugaqartunik kalaallinik sulisoqarnikkut imaluunniit sumiiffimmi kalaallinik ilinniarnikkut piginnaasatigullu ilinniarsimanikkut uppersarneqarsinnaasunit sulisoqarnissakkut piunasaqaatigineqarsinnaagaluartoq.

Tusarniaaffigineqartup takujuminaatsippaa sooq aningaasaliisut aningaasatigut 100 %-imik aningaasaliigaluartut agguaqatigiissillugu 1/3-mik piginnittoqqusaannginneri aallaavigalugit Kalaallit Nunaat nunanit allanit aningaasaliisartut aningaasaliisinnaaneranik mattussisoqassasoq. Kalaallit Nunaanni sumiiffinni nutaani illoqarfinnilu minnerusuni ullumikkut takornariaqarfiunngitsuni takornariaqarnissamut aningaasaliisoqarnissaa anguniagaasariaqaraluartoq tusarniaaffigineqartup oqaatigaa. Sumiiffinni ingerlatsisut sumiiffimmi allami ingerlatsisumik suleqateqaratik namminneerlutik naqqanit aallartissinnaanissaat tusarniaaffigineqartup piviusorsioruusorinngilaa. Tusarniaaffigineqartup oqaatigaa nunanit allaneersut piginnittuusinnaanerannik killiliineq tassaassasoq takornariartitsinerup sumiiffinni nutaani ineriartornissaanik killiliineq.

”Takornariartitsinermi 2023-2024 ikaarsaariarnermut periusissiaq”-mi “sinaakkutinik iluaqutaasussanik siuarsaaneq”-mi anguniakkanut tusarniaaffigineqartoq innersuussivoq. Tusarniaaffigineqartoq isumaqanngilaa siunnersuummi allassimasut sinaakkutinik iluaqutaasussanik siuarsaaneramik imaqartut, allallutillu naak Kalaallit Nunaanni takornariaqarnerup iluani inuussutissarsiorfimmi periarfissanik atuilluarnissamut aningaasaatigineqartut naammangikkaluartut siunnersuummi allassimasut aallaavigalugit Kalaallit Nunaannut aningaasaleerusussutsimik annikinnerulersitsimmata.

- 15.2 Kalaallit Nunaanni takornariartitsinermik inuussutissarsiutit piffissap ingerlanerani kalaallinit amerlanerusunit suliffiulertariaqartut tusarniaaffigineqartup isumaqatigaa. Tamatumunnga atatillugu tusarniaaffigineqartup oqaatigaa inatsisissatut siunnersuummi suliffeqarfiit kalaallinit pigineqartut avataanit tikisitsillutik sulisisinnaanerak killilersorneqarsimanngitsoq, taamaalilluni suliffeqarfiit pineqartut Kalaallit Nunaannilu piginnaanngorsaagatillu suliffissaqartitsilernissaat anguneqarsinnaanani. Piginnittuunissamut piumasaqaatit pineqartut piginnaasatigut qaffasaanissamut pisariaqartinneqartumut alloriartitsinngitsut tusarniaaffigineqartup oqaatigaa. Piginnaasatigut pitsanngorsaaneq piffissaq sivisooq suliniutigineqartariaqarpoq, Namminersorlutillu Oqartussat takornariartitsinermik suliaqartunik ilinniarfinnillu suleqateqarunik angusaqarnerussapput, taamaaliornikkullu sumiiffinni sulisinnaasut takornarialerinerup iluani assigiinngitsutigut suliaqarsinnaalissapput.
- 15.3 Tusarniaaffigineqartup ataatsimut isiginnittaasia aallaavigalugu inatsisartut inatsisissaannik suliaqarnermi periuseq ”one size fits all” aallaavigineqarsimasooq oqaatigaa, tasanilu takornariaqarnermi ingerlatat ataatsimut inatsisitigut

aalajangersaaffiginiarneqarput. Siunnersuummili ”sumiiffinni immikkut toqqakkani” atorneqarsimavoq, tamannalu isumaqarpoq sumiiffinnut killilersuisoqarsimasoq. Taamaattumik paasinarpoq kalaallit piniariaasiat pisariaqartitaallu aallaavigalugu tammajuitsussarsiniarluni piniartitsinissamut akuersissuteqarsinnaanermut nalunaaruteqartarnissaq. Taamaakkaluartoq tusarniaavigineqartoq isumaqarpoq takornariartitsinermut ingerlanneqartussanut tamanut akuersissutinik qinnuteqartoqartariaqartoq.

Tusarniaaffigineqartup oqaatigaa ullumikkut takornariartitsinermik ingerlatsinerit annertuut imaatigut aalisariarnermik, arfernik takusassarsiornermik imaluunniit pisuttuarnissanut assigisaannillu angallassinikkut pisartut. Taakkunungalugu angisuumik angallateqarnissaq sillimaniarnikkullu periusissanik assigisaannillu piumasaaqateqarnissaq naammalluni. Tusarniaaffigineqartup isumaa aallaavigalugu ingerlanneqartunut taakkununga akuersissutinik pissarseqqaartoqarnissaa ingattajaarneruvoq. Immikkuullarissunilli misigisassarsiorniartilluni assersuutigalugu nannunut tunngatillugu, allatut iliornissaq pisariaqarsinnaavoq. Soorlu aamma kangerlunni ”piujuartussanik” tupperluni tammaarfissanik sanaartorfiusuni allatut iliornissaq pisariaqarsinnaasoq tusarniaaffigineqartoq isumaqarpoq.

- 15.4 Allassimasut ” Kalaallit Nunaanni ukiuni tallimani kingullerni najugaqartut nalunaarsorsimasoq” tusarniaaffigineqartup ima paasivaa, pineqartoq qinnuteqannginnermini ukiuni tallimani kingullerni najugaqarsimanissaa pineqartoq. Tusarniaaffigineqartup oqaatigaa tamanna kalaallinut Kalaallit Nunaata avataanut ilinniariarsimasunut, imaluunniit nunani allani suliffeqarsimasunut, Kalaallit Nunaannullu uterusuttunut ajoqutaasinnaasoq.

Tusarniaavigineqartoq isumaqarpoq inuit allattorsimaffianni ukiuni tallimani nalunaarsorsimanissamik piumasaaqat peerneqassasoq, taamaaliornikkullu inatsisissatut siunnersuutini marluusuni piumasaaqatit assigiissilerlugit, imaluunniit ataatsimut naliliinermik tunngavilerlugu piumasaaqat kalaallinut atasuunermik piumasaaqatinnngorteqqullugu.

- 15.5 § 21 -imut [maanna § 20 tulliilu] oqaaseqaatigineqartut pillugit tusarniaaffigineqartoq paasissutissiiffigeqquvoq, akitsuutininut tunngatillugu inummut ataatsimut ullormut 130 kr.-imik akitsuuteqartoqassanersoq paasiniarpaa. Tusarniaavigineqartullu oqaatigaa Savalimmiuni unnuinermut ataatsimut 20 kr. - imik akitsuuteqartitsisoqartoq.

- 15.6 Tusarniaaffigineqartup pissusissamisoorsoraa ullumikkut ingerlatsisunut aalajangersaasiortoqarani siunissami ingerlatsisussanut aalajangersaasoqassasoq.

Naalackersuisoqarfiup sulianut oqartussaasup oqaaseqaatai:

15.1. -imut

Takukkit 1.1. -imut oqaaseqaatit.

15.2. -mut

Toqqaanissamat piomasaaqatini § 10-mi allassimasuni qinnuteqartup najukkami sulisunik pilersuisunillu atuinissanut tunngasut aalajangersaaffigineqarnissaat naapertuuppoq. Tamatumalu saniatigut siunnersuut aallaavigalugu Naalackersuisut sumiiffimmi najugalinnik sulisussanik pilersuisunillu atuinissamat aalajangersaasinnaapput. Naalackersuisut tusarniaavigineqartoq isumaqatiginngilaat pisinnaatitsissummik piginnittoq imaaliallaannarluni avataaneersunik sulisoqarsinnaaneranut attuumassutillit pillugit.

15.3. -mut

Sumiiffinni aalajangersimasuni ingerlatanut aalajangersimasunut akiliisitsilluni kisermaassilluni ingerlatsisinnaaneq siunnersuummi aalajangersaaffiginiarneqarpoq. Taamaaliortoqarniarporlu pisinnaatitsissummik piginnittoq immikkuullarissunik misigisassarsiortitsisinnaalernissaa anguniarlugu, tassungalu atatillugu annertuumik aningaasaliisinnaanissaa periarfissaalersinniarlugu.

15.4. -mut

Takukkit 1.1.-imut oqaaseqaatit.

15.5. -imut

Siunnersuummi allannguisoqarnikuuvoq. Maannakkullu akitsuutinut tunngasut §§ 20-22-mi aalajangersarneqarsimallutik. Akitsuutit akinut aalajangersimasunut inissinneqarsimapput. Unnuinermut akitsuusiisoqanngilaq. Aningaasat 130 kronit akiliuteqartitsinikkut aalisartitsisarnermut attuumassuteqarpoq.

15.6. -mut

Naalackersuisut inatsisartut inatsisaat pisinnaatitsissummik pigisaqartunut nutaanut atortuulersinneqassasoq pissusissamisoortutut nalilinggilaat. Allannguutit qanoq annertugineri aallaavigalugit akuersissummik pigisaqartut qanoq sivisutigisumik ikaarsaariarfeqarnissaat inissiiffigineqassaaq. Naalackersuisut naliliinerat aallaavigalugu piffissaq ikaarsaariarfittut aalajangerneqartoq naammattut nalilerneqarpoq.

16. Ineqarnermut Attaveqaasersuutinullu Naalackersuisoqarfik allappoq:

16.1 Tusarniaaffigineqartup oqaatigaa inatsimmi atuuttumi § 3-mi allassimasut aallaavigalugit maannakkut siunnersuummi taaguutit ersarinnerusut. Tamannalu tusarniaaffigineqartup iluarisimaarpaa. Taamaattoq tusarniaaffigineqartoq isumaqarpoq iluaqutaassasoq taaguutit atorineqartut siunnersuummut ”Takornariartitsinermut, sumiiffinni nunami aalajangersimasuni zone-nut agguasarneq il.il. inuussutissarsiutigalugu ingerlatsinermi aammalu killeqartumik sumiiffiit ilaanni angalaarsinnaaneq pillugit Inatsisartut inatsisaanniittunut.” naleqqussarneqartuuppata.

Tusarniaaffigineqartup iluarisimaarpaa taaguutit “kalaallit pilersuisut” aamma ”kalaallit sulisinnaasut” kinaassusersiortuunnginneri piviusorsioertuunerilu.

Tusarniaaffigineqartup § 13 imm. 1-imi [maanna § 10] neqeroortitsisoqarnissaanut toqqaasarnermi piumasaqaasersuisinnaanerup naapertuuttuunera, attuumassuseqannginnera immikkoortitsinnginneralu iluarisimaarpaa.

16.2 Tusarniaaffigineqartup § 19 -imut [maanna § 12] tunngatillugu oqaatigaa inummut akuersissummik tunniussisarnermi Kalaallit Nunaanni inuit allattorsimaffianni allassimasimasumut attuumassutilik “piffissami minnerpaamik ukiuni tallimani” allassimasooq ataannartumik pineqartoq naatsorsuutigineqartoq.

Tamatumalu saniatigut tusarniaaffigineqartup aamma oqaatigaa ukiunut tallimanut annertunerulersitsinissaq pissusissamisuumngitsunik kinguneqarsinnaasoq. Tassami inuit piffissap ilaani allami najugaqartariaqarsimaneri akuersissummik ingerlatsisinnaanerannut sunniuteqarsinnaagami. Tamatumunngalu ilaliullugu tusarniaaffigineqartup oqaatigaa isumaliutigisariaqartut pissusissamisuumngitsunik kinguneritinneqarsinnaasut § 19, imm. 2-mi [Pisinnaatitsissummik piginnittup piumasaqaatinik piffissami akuersissuteqarfiusumi tamani naammassinnittusaaneranut piumasaqaatit maanna § 4, imm. 2-mi allassimapput] allassimamat § 19, imm. 1 -mi [maanna § 12] piumasaqaataasut piffissami akuersissuteqarfiusumi tamarmiusumi naammassineqarsinnaasariaqartut.

Tusarniaaffigineqartup siunnersuutigaa Kalaallit Nunaanni inuit allattorsimaffianni allattorsimanissamat immikkut akuersissuteqarsinnaanermut aalajangersaasoqarnissaa. Assersuutigalugu piffissap ilaani allami najugaqartariaqarsimaneq pillugu immikkut akuersissummik qinnuteqartoqarsinnaanera periarfissaalersillugu.

Atugassarititaasut allat § 19, imm. 1 nr. 2-5 -mi [maanna § 13] allassimasut tusarniaaffigineqartup naapertuuttuunerarpai.

- 16.3 Tusarniaaffigineqartup oqaatigaa § 19 -imut [maanna § 12] isumaliuutersuutigineqartut aamma § 20 -mut [maanna § 13] atuuttut. Tusarniaaffigineqartup siunnersuutigaa Kalaallit Nunaanni inuit allattorsimaffianni ukiuni tallimani nalunaarsorneqarsimanissaq pillugu immikkut akuerineqarnissamut qinnuteqartoqarsinnaassasoq.
- 16.4 Pisinnaatitsissummik pigisaqartup ”kalaallinik sulisoqarsinnaanera aamma kalaallinik pilersuisoqarsinnaanera” ingerlatassamut pilersaarummi allassimanissaa pillugu tusarniaaffigineqartoq isumaqarpoq tamanna ingerlatsinissamut pilersaarummi qaammarsaavigissallugu pingaartuusoq, ilutigisaanillu isumaqarluni aalajangersagaq piviusorsiortoq immikkoortitsinanilu.
- 16.5 Piffissamut ikaarsaariarfiusussatut siunnersuutigineqartumut atatillugu tusarniaaffigineqartup oqaatigaa inuup imaluunniit inatsisitigut inuup soorunami periarfissaqarfingikkaa Kalaallit Nunaanni ukiuni tallimani najugaqarsimanermut piunasaqaat 1. januar 2026 sioqqullugu naammassinissaa.
- 16.6 Tamatuma saniatigut tusarniaaffigineqartup oqaasertanut atatillugu oqaaseqaatit ilannguttarsimavai.

Naalackersuisoqarfiup sulianut oqartussaasup oqaaseqaatai:

16.1. -imut

Oqaatsit atorineqartut assigiissarneqarnissaat sulissutigineqarsimavoq. Taamaakkaluartoq inatsisini pineqartuni marluusuni arlariinni taaguusertuutit assigeeqqissaanngillat pissutsit assigiinngitsut marluk aalajangersaaffigineqarneri pequtaallutik.

16.2. -mut

Naalackersuisut tusarniaavigineqartumit oqaatigineqartut tunngavigalugit oqaasertaliineq naleqqussarsimavaat.

Tamatuma saniatigut 1.1.-mut innersuussisoqarpoq.

16.3. -mut

Takukkit nassuiaatitut oqaaseqaatini 1.1. Siunnersuummili maluginiarneqassaaq immikkut akuersissuteqarsinnaaneq § 8-mi ilanngunneqarsimammat, taannalu aallaavigalugu piunasaqaatit §§ 12-15-imi aammalu §§ 17-18-imi kiisalu siunnersuummi aalajangersakkat allat pillugit Naalackersuisut piunasaqaatinut immikkut pisoqartillugu immikkut akuersissuteqarsinnaalerput.

16.4. -mut

Oqaaseqaateqarnissamut pissutissaqartitsinngillat.

16.5. -imut

Takukkit 1.1-mut oqaaseqaatit.

16.6. -imut

Siunnersuummi oqaaseqaatigineqartunik oqaasertalersuinermut tunngasut siunnersuummi annertuummik ilaapput.